

萬有文庫

第二集七百七種

王雲五主編

張文忠公全集

(六)

張居正撰

商務印書館發行

張文忠公全集

(六)

張居正撰

國學基本叢書

# 明張文忠公全集

## 文集一

### 承天大志紀贊

#### 基命紀

臣聞帝王之興。其先必有明聖顯懿之德。豐功厚利積累之業。以肇基明命。而濬發厥祥。昔周之盛。大命既集。乃詩人頌述休美。必遡其自於文王曰。周雖舊邦。其命維新。蓋文王不回之德。式克昭事於天。受帝祉而施子孫。假哉天命。由此乎基也。我皇上應期挺生。膺圖握紀。仰萬年之明盛。陟三五之登闕。駿命之隆。超軼有周遠矣。實由我獻皇帝。天縱聖哲。日躋誠敬。淵仁厚德。邁於周文。而章聖皇太后。明章婦順。又於太姒徽音。有加美焉。積功累仁。祈天永命。由來遠矣。是以忻豫通於上下。精誠貫於神明。上帝眷歆。篤生神聖。纘紹丕圖。光昭鴻業。由樸棧之化。宣下武之光。本作豐之功。成宅鎬之烈。天錫顯號。胙社曰興。固昭代中興之基所由肇也。夫蓄基厚。則發之必宏。嗣德昌。則培之愈固。二聖宥密。所基既厚。且宏。而皇上又振耀前猷。茂恢令緒。德總百王。規摹萬世。以永凝佑命。寢啓昌期。曷有紀極。臣稽實錄所載。二聖肇基。帝業紀其尤大彰著者。列於首篇。以徵世德。作求卜景祚於萬禩云。

贊曰。古稱河間好文。東平樂善。非有甚盛德事也。然且邈哉。乎希聞矣。彼藉尊崇而富有。無萬幾之兢業。克懋乃德。固已難矣。若乃慎修永圖。敦仁廣澤。且天立厥配。懿美並耀。其又可易得哉。惟我二聖。積厚流

光教訓成俗。內外和理。誠前聖靡得而兼焉。觀夫寅畏上帝。則唐堯之欽昊天也。宣布慈惠。則虞舜之洽民心也。訓恭務齋。則神禹之克儉勤也。屏嗜黜玩。則成湯之遠聲色也。昭垂女訓。則慶都之育神聖也。耿光大烈。炳炳巍巍。天人之道備矣。夫擅一德。居一功。猶足以承休垂裕。矧夫備美統善。格天心。新駿命。烏奕千載者哉。敬識其大者。昭示方來。俾與天壤無極也。

## 龍飛紀

孔子敍書。斷自唐堯。贊之曰。大哉。堯之爲君也。巍巍乎。惟天爲大。惟堯則之。夫堯以上。先天開人。所可述者多矣。然皆闕而不載。而獨於堯。亟稱焉。豈非以其蘊德最隆。際時尤盛。起唐都而爲天子。乃天之所特授者耶。漢文而下。無庸論矣。惟我皇上。應五百之昌期。承二聖之積慶。天人協順。爰自興邸。入纂丕圖。萬邦黎獻。靡不快覩焉。曰。聖天子。今之帝堯也。夫史稱帝堯。其德如天。如神。光四表格。上下生而感。赤龍之祥。卽政而榮。光出河。龍馬銜甲。其事神矣。我皇上。宏仁天覆。大智神啓。旣與廣運之德。異世同符。而河清雲慶。祥光燭天。帝王之有真。又已炳示幾先。效靈神寶。卽赤精榮光。龍馬之應。未足以喻其宏顯也。於是膺歷數。順人心。龍飛五位。開泰運。恢帝紘。視放勳有光焉。非天所特授。其曷有此哉。昔者宸蹕之渡河也。父老相與歡忻。頌述曰。吾聖主始生。此河清者三日。黃河清。聖人出。今果然矣。是天下之鼓舞闔澤。莫不尊親。又不待時雍協和。而後爲康衢之歌。華封之祝矣。巍巍乎大哉。同天同堯。一人而已。謹述天命。本帝德。推人情。著之茲篇。與陶唐並稱焉。

贊曰。易曰。天地之大德曰生。聖人之大寶曰位。夫聖人之以位爲寶也。豈徒崇高富貴云哉。其畜德宏而

備道廣。志在生民。而量包天地。匪位將無以究厥施耳。龍之爲靈也。道能神化。然必乘雲氣。凌太清。茫洋窮乎元間。然後能霖雨下土。而澤被九垓。聖人之於位也亦然。故乾之九五曰。飛龍在天。利見大人。孔子繫之曰。聖人作而萬物覩。又曰。首出庶物。萬國咸寧。皇上德合天地。明並日月。序參四時。先後乎天而不違。正易之所謂大人也。乘龍御天。德廣被而道大施。懷生之類。靡不霑潤乎汪濊之澤。洪鬯茂和。信矣哉。雲行雨施。天下平矣。登極之日。時雨霑旱。萬象咸新。豈非天罔示之以象哉。天且弗違。而況於人乎。詩曰。顯顯令德。宜民宜人。受祿於天。保佑命之。自天申之。天之所申佑。斯爲億萬年無疆之休也。

### 聖孝紀

臣聞古先哲王立愛以教睦。率德以興行。蓋未有不以孝理天下者。然盡倫立極。則惟至聖者能焉。是以孔子序列古之帝者。獨稱舜爲大孝。武王爲達孝。豈不以二聖人者。尊養之至。繼述之善。固往哲之尤盛者乎。惟我皇上。冠道履德。體容窮幾。固已總百王之條貫。包萬善而時出矣。乃天篤至性。於事親尤肫肫焉。粵自中興。丕膺新命。永惟我皇考聖母。啓佑之恩。昊天罔極。故踐祚之初。首命廷臣。議舉尊崇之禮。而當時議者。率牽章縫之謬見。執叔季之陋儀。紛紜靡定。時塵睿思。親賜折衷。然後觀其會通。協於禮義。鴻號之稱定。則一本之義昭。宗祀之禮成。則嚴父之教顯。卜藏之事謹。則慎終之慮悉。省巡之政舉。則時邁之頌興。至於山陵所在。永懷周慮。備物盡制。又極詳且悉焉。蓋自書契以來。舜武之後。光揚恢廓之典。未有盛於今日者也。夫聖神廣運。德莫大焉。光撫函夏。尊莫尙焉。化隆休洽。時莫盛焉。以德則本茂。履位則道光。治隆則時豫。三者備矣。用能修曠古非常之典。以成帝王極至之孝。然則所謂盡倫立極者。非我皇

上其孰能之。孔子曰：昔者明王事父孝，故事天明；事母孝，故事地察；皇上盡宗子之道，建三極之中，愛敬通於神明，德教刑於四海，神人禔福，靈貺駢蕃，休哉！臻茲蓋有繇矣。顧臣愚不足以仰窺聖德，大孝之全第錄其係於舊邦者如此云。

贊曰：臣伏讀獻皇帝實錄，我皇上七歲授孝經，卽問皇考以先王至德要道之義，皇考喜甚。他日以語侍臣，無不頓首賀者。臣仰而歎曰：大哉！聖人之孝乎！聖性得之天所授也。異日者，大禮尊稱及明堂宗廟山陵巡省諸典禮，蓋重且大矣。皇上聖不自聖，每一舉事，卽徧詢羣臣可否。當其時，薦紳章縫之士，簪筆待問者，雲集朝廷，然每議下，輒惶顧咨度，莫知所裁，且或誕其說而左焉。迨我皇上容思英斷，折衷羣言，詞宣爲經，動協於義，羣臣稟聖謨，受成畫，奉而行之，驗之往古，質之經義，無一不契者。然後相與惶悚懼服，歎神聖之莫及也。繇此觀之，聖孝根心，非天所授，詎能然乎！且夫析衆疑而闡湮典，大智也；不阻不回，斷之在獨，大勇也；修義明禮，萬世爲則，大烈也；廣愛覃恩，以幸海內，大惠也；承天道，順人情，上下和洽，嘉祥屢降，大順也。然皆自尊親一念以始之，信乎聖人之德，無以加於孝矣。

## 大狩紀

臣聞古者天子五年一巡狩，狩必徧於四嶽，則夫荆襄隨郢之域，固南嶽所適奠也。是以堯巡丹水，舜覲南后，考其政教之跡，類帝懷神，輯瑞覲牧，禮問百年，歸格藝祖，至爲明備。然未有躬萬乘而爲其親勞者也。仰惟我皇上，堯仁舜孝，超軼前古，粵自藩封，入登大寶，緬惟皇考，山陵遠隔，未申展謁之忱。及後慈聖上仙，議將南狩，又以窳窳事重，必求允臧，遂乃躬御六飛，弭節純山，周回遠覽，審觀厥祥，圖之再三，其兆

乃定於是退而御行宮。朝諸侯。燔柴燎。享上帝。修秩祀。以懷柔百神。明黜陟。以震疊羣辟。發德音。以鎮撫遺老。敷大賚。以綏惠罷氓。神人之禮。旣該。上下之情。以洽。猶慮久役之勞民也。星馳電邁。振旅而旋。當其時。奧巖窮谷之民。戴白垂髻之衆。莫不聳觀駭聽。雀躍行謳。驩聲震乎雷霆。濺澤溢於江漢。蓋自唐虞以來。聖帝時巡之轍。復見於今日矣。然其始也。本以篤二人之永懷。其旣也。遂以修千古之曠典。宏仁大孝。一舉兼該。斯又前軌未聞。殊常之盛事。經生學士。所爲誦說而難遭者也。臣謹自大駕發軔之初。迄於回鑾。列次其事。以上繼詩書之盛。且侈郢人千載一時之遇焉。

贊曰。君人者。出王遊衍。莫非天也。豈不信哉。往者南巡。初議羣臣言。蓋人人殊矣。皇上稽於有衆。斷自聖心。及輦輅所經。豫順以動。以之感人。則羣黎百姓。罔不忻戴。且道經二千里之餘。師行邁數萬之衆。而往返不踰六旬。大事定乎萬禩。湛恩渥澤。徽章彝軌。一舉而衆善咸集焉。豈非聖孝感孚。聖誠肫至。故萬靈衛其出入。九穹爲之綏佑者乎。詩曰。時邁其邦。昊天其子之。懷柔百神。及河喬嶽。允王維后。夫天之所子。固天下萬世之所戴。以爲后者也。獨郢人云乎哉。

### 寶謨紀

臣聞書言。聖有謨訓。明徵定保。又曰。丕顯哉。文王謨。自昔聖帝明王。其豐功駿德。旣已措之躬行。施之當世矣。猶以澤歷久而易盡。言無文而不遠。於是乎敷之彝訓。以爲定保之徵。記之簡編。以發經緯之蘊。是以百世之下。雖去聖已遠。而誦其詩。讀其書。則模範存焉。斯聖人。不朽之業。所以垂教思於無窮者也。我獻皇帝。聖質天成。睿思神授。昔居西館。已著英聲。及封國以來。二十餘年之間。絕嗜寡好。孳孳典學。國政

有暇。獨以觚翰自適。是以述作之精。卓然冠古。篇章繁富。亡慮數十萬言。臣嘗伏而讀之。其裁製之恢宏。文詞之粹嫩。固無容喙矣。乃其屬意纂言。皆根極理要。闡發性命。則研精極深。敷覽古今。則出經入史。雜物撰德。則顯微畢具。立法申鑒。則美惡備彰。識深而旨遠。義奧而理元。蓋典謨訓誥。經世之文。天球宏璧。希代之寶也。昔者淮南鴻烈之著。河間考工之篇。徒以摛揆藻麗。夸詡誦聞。非有聖哲之極論。道德之奧旨。然且樹聲藝苑。迄於今傳焉。矧聖謨丕顯。流輝宇宙。蓋將爲懸諸日月。不刊之典。豈徒鎮耀楚域。爲法當代而已哉。臣謹分類哀輯。并錄獻皇后之女訓。附載於後。用彰我二聖貽燕之澤。於無窮焉。若夫聖德淵涵。精微之蘊。則所謂性與天道。不可得而聞也。

贊曰。昔周人稱文王之文。光於四方。顯於西土。太姒嗣音。佐文德以成周南之化。則葛覃卷耳之詩作焉。夫古之帝者。述德敷言。託之琬琰。垂範百世。若典謨訓誥。章章具矣。乃若后理陰教。以聽天下之內治。而能發爲文詞。與王者並。則繇周而來。蓋希覩之也。天佑我明。聖神繼作。我太祖成祖。暨孝慈仁孝。扶元黃於始泮。綴象緯以垂光。御藻宸章。壺範內訓。藏之天府者。彪炳煥爛。莫可殫述矣。而我獻皇帝。以天挺濬哲之資。緝熙聖學。觀列祖之耿光。獻皇后儷德配天。修文翊治。嗣徽音於二后。用能佑啓聖主。以隆文明之盛治。比於有周。不啻過之矣。豈非乾坤光岳之氣。萃靈於昭代。出河呈洛之禎。煥發於今日哉。夫雲漢爲章。下土同仰。隋和炫彩。世所共珍。今二聖之瓌章瑋製。播在寰區。惟茲臣庶。家傳人誦久矣。而臣獨以係之舊邦者。邇周南之首化。見文教之所繇興也。



我皇上稽古右文。經緯二儀。闡泄神祕。瓊章寶翰。炳若日星。固萬方共仰。以爲彝訓者。不獨郢中有也。臣述郡誌。顧上紀御製者何良。以聖德莫加於孝。而孝思所寓。則皇考聖母肇造之邦。莫有先焉。仰惟皇上夙承先訓。寤寐不忘。繼辭寢園。瞻思如在。是故當萬幾之勤事。而篤二人之懷。履天位之尊安。而重桑梓之念。志意所紓。被之金石。典禮所定。勒之簡書。或博喻以該情。或簡言以達旨。或剖疑以立準。或紀烈以揚休。鴻篇短什。體製雖殊。皆出於御筆之親裁。非臣下所能贊一詞者。臣處下土。而仰末照。顧不足以悉其經緯。罄其形容。然聖心之蘊。因言以宣。苟缺逸而不載。臣之罪也。於是集所見聞。彙以成帙。雖布之朝堂。紀之行在。其時其地。或有不同。以其情寓乎孝思。而事關乎帝蹟。咸連類附之。不敢遺焉。若夫繹闡鴻猷。敷敷聖治。嗣喜起之音。而萃謨訓之體者。則祕之金匱。藏在石室。茲不敢具錄云。

贊曰。夫文之作。豈不生於情哉。故善琴者。鼓宮而陽和升。百草坼。鼓商而金風應。萬葉零。非意之也。情之所感者深也。臣伏誦我皇上之製。瓊文藻思。精工粹麗。固非臣愚所能贊矣。乃其本原奧旨。則庶幾竊窺萬一焉。蓋我皇上一念純篤之孝。由於天植。而倫制兼盡。尊養並隆。又前古之所未備者。是以折衷羣疑。則典禮斯定。發揮至愛。則性術昭宣。隨感而彰。自然炳蔚。蓋因心以貫道。所謂情深而文明者也。薄海內外。佩服聖訓。靡不油然而興。孝弟之心。熙然成不嚴之治。是豈徒以言語教詔爲哉。至德要道。所感者深矣。彼漢歌大風。唐賦慶善。止以誇詡彊盛。愴懷往昔。已爾。遙追來孝。未之聞焉。固不足以語此也。書曰。俾萬姓咸曰。大哉王言。又曰。一哉王心。誦王言之大者。其尙推本於王心哉。

### 陵寢紀

臣聞炎帝葬於長沙。虞舜葬於九嶷。今皆在楚之封域。夫南國山川之勝。自古記之矣。按輿志。郢荆之山。發自終南太華。而桐柏總其要會。折而北。爲厲山。神農之所育也。折而東。爲白水諸山。漢光武之所興也。又折而東南。爲大洪山。結秀於純德。則我獻皇帝之劍履藏於斯焉。扶輿清淑之氣。鍾於斯焉。左瞻聊屈。右眺三山。章山表其南。花嶺踞其北。又有沔漢之水。方數千里。際天而來。縈繞前後。山趨水會。鳳翥龍翔。信乾坤之隩區。陰陽之福地。蓋天作高山。以爲我二聖棲神之幽宅。以蔭我皇上福祚於無疆者也。往者龍飛之始。天下竊見聖衷遠慕。有陟屺之思。於是浮言胥動。爲遷陵之請者。蓋紛紛矣。及後慈聖上仙。禮宜合祔。則雖二三輔弼親信之臣。亦靡不瞻顧惶惑。而莫之敢主。惟我皇上。睿謨神斷。孝思天啓。始折羣淆。決策南祔。又親御六飛。時巡楚服。周覽山川形勝。躬定二聖兆域。然後王氣完而先靈妥。典禮協而羣情安。蓋南北紛紛之議。至是始決焉。於是作新宮。備規制。置官署。守衛增。封表邑。勝概與孝陵天壽並峙矣。夫靈山濬源。寶藏所出。根深柢固。枝葉乃繁。我皇上聖德中興。恢宏大業。雖昊穹之所篤佑。而陰發於地靈者。亦不可誣也。臣謹以山川形勝。陵宮規制。各爲一圖。用備九重瞻覽。少慰風木之思。又岳懷王常寧善化二公主園墓。置守冢。命輔臣撰碑志。皆皇上廣因心之孝。愛其所親者。亦並錄之云。

贊曰。先儒謂養生者。不足以當大事。惟送終。可以當大事。若我皇上之事親也。可謂致敬致愆矣。顯揚大典。既極其尊崇。山陵又極其愆慎。卽如遷陵一事。謀之十有餘年。其議乃定。至於庀工。襄事。營兆。卜吉。雖一樹一器。無非聖衷之所區畫。聖孝之所流通。是以靈祇昭格。山川毓秀。昔爲睿考卜兆之時。居民感夢。其事固已異矣。及慈宮南祔。則山陵託物以告。異石之處。川后安流。而增久澗之漲。甘露再降於陵樹。昭

哉天之篤我明祜也。昔漢明帝夜夢其先。悲不能寐。明旦上陵。遂獲瑞露之應。夫一念之誠。猶感通如是。況大孝永慕。歷萬年而無替者乎。然則天親之眷佑我皇上。蓋方興而未艾也。

### 宮殿紀

臣讀詩至小雅斯干。蓋詩人祝其君考室。見祥云。其二章曰。似續妣祖。築室百堵。說者以爲周之盛王。能興文武之業。修復其宮室。詩人所爲美也。嗟夫。先王之德。入人深矣。思先王而不見。思其居處。幸親後王之興也。肯構似續。其舊則歡欣嘆美。形之祝頌。不亦宜乎。昔我獻皇帝。天錫名邦。受茲赤社。應翼軫以建基。奠維垣之丕業。蓋夙夜基命。恆於斯矣。迨我皇上。膺運龍飛。入踐皇極。固已化國爲天下。猶以枌榆故里。王迹所興。瞻懷不置。及六飛南幸。光臨舊邸。追惟我二聖履綦之跡。又儼然如將見之。於是卽邸第之遺規。恢爲新式。改藩垣之舊號。煥以鴻名。乃營外朝。乃葺內寢。乃建享殿。乃備潛宮。模帝都而作範。勞睿思以親題。宏規華構。煥日月而壯全楚矣。夫以我先帝之澤在人。奚啻周人之思文王。而我皇上。似續肯構。飭藩國以天子之制。所以昭先德。繫民思。又豈直修復其舊已哉。臣竊揆之。使當時詩人。獲觀今日。又不知何如其嘆美祝頌也已。臣謹考其規制。繪爲一圖。而詳其建置如左。用昭我皇上恢宏締構之美。垂之無窮。庶幾有鴻筆之臣。作爲歌頌。以續斯干者乎。臣姑俟之焉。

贊曰。夫聖人之誕生爲天下主也。卽其居室所在。亦豈偶哉。昔黃帝爲有熊國君之子。居於軒轅之邱。生而神靈。竟代神農。以有天下。史稱聖治。爲五帝首。而號曰帝軒氏。本之以帝所居。軒邱云。昔我獻皇帝之初建邦也。蓋常究度於四國矣。爰契我龜。卒定於茲。錫名曰興。天所命也。及神聖誕生。將受赤帝之符。啓

靈長之祚。則有非常之光。見於宮中。上燭乾維。下徹坤軸。遠邇震輝。以爲希瑞。乃復御蹕光臨。肆覲羣后。修禋祀之文。舉班瑞之典。布省方之教。播時邁之頌。則向之闕宮藩邸。遂化爲紫宮天庭。帝者之居矣。然則黃帝以軒邱而大有熊之號。我皇上以興邸而啓中興之業。後先輝映。千古一轍。蓋所謂帝省其山。眷顧與宅者。斯豈人之所能爲哉。惟我國家受天丕命。光宅九有。高皇帝定鼎金陵。文皇帝建都燕薊。我皇上龍飛襄郢。三大都在寰宇間。皆據百二之雄勝。萃岳瀆之靈秀。鴻圖華構。鼎峙於南北。譬之三垣麗天。太乙之所更居也。嗚呼盛哉。臣旣備舊邸宮室規制。而終之以此。俾三二京。四三都者。得其考云。

## 禮樂紀

臣聞儒者之論禮樂曰。大人舉禮樂。天地將爲昭焉。又曰。揖讓而治天下者。禮樂之謂也。語其功化之隆如此。至論其實。則曰。禮以節文事親。樂以樂之。又不越乎庸德之行。何哉。蓋殊事合敬。異文合愛者。禮樂之用。而愛敬之施。必始於家邦。然後舉而措之天下。能四達而不悖也。明興積德百有餘年。至我皇上。以聖德而居尊位。兼總述作之權。命有司。憲遺經。蒐彝典。於是制作大備。登三成。五光祖宗之鴻業。郁郁乎盛矣。然其大禮與天地同節。大樂與天地同和。用之郊廟朝廷。而達諸天下者。固非臣之愚所能殫述。若夫愛敬始於家邦。以隆大孝。創爲盛禮。備樂總羣議。而裁之聖心者。臣蓋得以記其梗概焉。謹條具其禮儀祭告之文。及樂章樂器之數。爲禮樂紀。蓋雖未及備大聖人盡制之全。抑儒者所論禮樂之實。以基治化者。則庶幾乎具於此矣。

贊曰。記禮者。謂禮樂之數可陳也。其義難知也。今臣所記禮儀禮器樂章。皆有司祝史之事。所謂其數云。

爾。烏足以窺大聖人制作之精乎。然因其易者。求其難者。數舉而義斯寓焉。故荀卿有言。不知其義。謹守其數。然則儀章器數。又安可略哉。矧我皇上。大孝尊親。生事葬祭之典。其大者固已竭情盡慎。斟酌損益。建諸天地而不悖。質諸鬼神而無疑矣。乃其登降揖讓之節。聲容綴兆之祥。亦莫不加聖心焉。極情文之大備。舉鉅細而畢該。蓋所謂兼總條貫。金聲而玉振之者也。昔者孔子睹廟器而知持盈之理。聆琴音而思文王之德。倘有通元識微之士。能於器數之間。仰溯聖人之蘊者。則有司存焉。

### 苑田紀

臣聞設苑以資觀遊。授田以守典籍。有國者所不廢也。然而靈囿之詠。獨歸周文。而土田之錫。亦惟於魯。頌稱之。豈非以文王敬德。不敢盤於遊田。而僖公之賢。意者其取於民有制耶。我獻皇帝。胙社於興。大開厥宇。苑田之制。於今可觀記焉。臣竊考之。而仰見帝德之不可尙已。夫以宗國藩垣之重。荆楚饒沃之區。加以當時禮越諸藩。分不嫌於厚植。化洽南紀。民咸樂於子來。即使侈其經營。廣其疆理。亦誰曰不宜哉。然乃抑畏自將。稼穡爲念。日儆儆焉。無淫於觀於逸。於遊於田。以奉厥邦常。祇若明命。蓋觀于陽春臺賦。而不遑暇逸之念。可想見也。至于土田宣畝。又皆出於錫予之舊。數十年無改闢焉。而蠲租之令。靡歲不下。省耕省斂。靡時不行。是所謂不敢盤于遊田。而取民有制者。非耶。夫戒逸豫而尙憂勤。敬也。薄稅斂而恤蒸庶。仁也。敬故上帝時歆。仁故下民祇協。肇基駿命。而永彰令聞。其本深矣。蓋書稱文王無逸。必繼之以受命享國之永。而魯之所以頌僖公者。亦曰受祉而昌大焉。理之不誣。固如此。於戲。此臣所以紀苑田也。

贊曰。詩有之。維桑與梓。必恭敬止。重父母之所遺也。夫桑梓且然。況其所燕適而世守者乎。惟我皇上至德天植永懷。所以丕承顯謨。昭光振耀者。旣罔不備。而於此苑田之遺。亦惓惓靡忘焉。龍飛之始。卽命戶曹移示守臣。若曰。惟茲田土。其戒兼并。均出納計。斂蓄恤災傷。所分與諸臣校者。悉如故已。而從帖山陽春臺。又並創爲亭。用勒琬琰。以識先帝登覽之跡。一何其注思之深耶。夫皇上統一萬邦。光宅寓內。以上林爲苑。天下爲田。其於先業。旣已恢宏而昌大之矣。顧猶重懷乎此者。何哉。誠念夫慶澤之昭垂。而期于基業之永紹。反本隆始。固善繼善述之一端也。臣旣列次諸紀。而終之以此。蓋聖德大孝。於是爲備云。

# 明張文忠公全集

## 文集二

### 軒皇問道治世長生頌

臣聞在昔受命之君。有握符應運。致世昇平者矣。未必能長生也。元都羽客。有御風躡景。超舉青冥者矣。未必能治世也。兼而有之。惟古之軒皇爲然。史稱其正名百物。監撫萬區。溘化泮蟲蛾。協氣蒸輿蓋。其致治之盛。旣如此。閱世千禩。乘雲上昇。合釜山之瑞符。衍泰元之神筴。其仙化之跡。又如彼。豈非後王之高躡。古今所希觀者哉。揆厥所由。蓋嘗訪廣成於崆峒。聞至道焉。其辭曰。抱神以靜。形將自正。心靜神清。無勞汝形。無搖汝精。乃可以長生。夫至道之要以壽身。而其緒以壽天下。固至人之妙詮。而君天下之鴻寶也。彼異端者流。掇虛崇誕。謂軒皇受丹經。傳九品。及服食金液之術。豈不淺之乎。闕聖闕哉。仰惟皇上。三極凝真。千齡毓粹。蚤徵靈瑞。叶壽邱之符。幼秉英喆。類徇齊之聖。運蒼九重。洽垂裳之化。卜歷萬禩。契得天之紀。若夫齋明祇栗。寅奉上帝。合宮祀也。燕閒邃穆。服膺古訓。巾几銘也。提綱挈維。式序在位。官師正也。斲雕蠲煩。阜般兆人。華胥俗也。天聲綦隆。王會畢臻。阪泉威也。洪流循軌。龍首效奇。媯川圖也。巍巍焉。煌煌焉。所謂統一道真。而迓治世長生之嘏者。允與軒皇合轍也。時維秋仲。十有七日。乃聖誕之辰。薄海內外。含生之倫。罔不延睇雲霄。稽顙宸闕。以效華封之祝。而臣叨首輔弼。夙荷隆恩。慶忭之忱。實萬恆品。謹博采軒皇治世長生之蹟。而要歸於主道。託之丹青。摛爲頌詩。用祝皇上萬萬歲壽。夫道者。萬福之宗。

身者萬化之根。道立而福不臻。身治而世不泰。平者未之前聞也。惟我皇上。味廣成之至言。遵軒皇之遐軌。正心修身。以會千聖之真。保精頤神。以降五位之福。則恩從祥風。翔德與和氣。游百度。咸熙乎易簡。萬國畢登於仁壽。皇上方將履乾久視。撫泰長生。後三光而不彫。配霄極以俱永。斯非薄海際天。所共欣願者哉。臣誠不勝忠愛惓惓。謹作頌曰。

上天佑民。樹以后王。疇膺大寶。而化聿光。疇撫泰平。而壽彌昌。倬惟軒皇。河圖誕受。統輯萬區。羣元畢阜。巍巍駿功。爲帝者首。泰元鼎策。得數之全。康齡不老。度歲百千。子孫萬葉。配天永延。匪直也斯。淵源至道。齋心大庭。崆峒是造。佩服真詮。探元洞奧。丕鑠我皇。寅御瑤圖。蚤徵靈瑞。大電繞樞。徇齊敦敏。與軒同符。廣庭森嚴。法宮淵靚。出入起居。作所惟敬。凝真養和。體道自性。綽哉運治。禮陶樂鎔。文明萬國。協于時邕。外寧內謐。華胥之風。坐享昇平。垂裳而理。仰奉寶慈。式燕以喜。祉綏九祐。祥開百子。節臨秋仲。景貺彌申。甲觀畫堂。虹彩紛綸。泰元神策。與軒合真。臣拜稽首。祝皇萬壽。岡陵符堅。松柏儷茂。誕膺百祿。以昌厥後。願言壽民。濯痍煦寒。願言壽國。磐石孔安。化洽無垠。聲垂不刊。美哉至道。壽身暨國。如戶有樞。如星有極。惟皇克念。寶之無斁。唐節天長。九齡納儆。愚臣繪圖。以代金鏡。壽我聖皇。無疆維慶。

神母授圖萬年永賴頌

按道書雲笈七籤云。雲華夫人。居於具茨之山。雲樓玉臺。碧宮瓊闕。靈官侍御。獅子抱關。天馬啓圖。毒龍電獸。八威備軒。神禹造拜。求治水之術。夫人命侍女凌容華。出丹玉之笈。開上清寶文。以授禹。遂能導波決川。奠五岳。別九州。以收地平天成之功。萬世永賴。臣聞聖王膺天駿命。君主萬方。必有翼聖之貞符。開



天之寶範。乃克興造。功業福彼。元元粵若。大禹奠五岳。導百川。地平天成。和寧四極。啓闢以降。神頌神靈。明德者歸焉。世傳神母。授禹玉笈。寶文通水之理。而後禹得以施其疏鑿之力。夫巍巍禹績。萬世賴之。非有稟承。其何能濟。神授之禎。豈其爽哉。洪惟我聖母慈聖宣文皇太后。聖善天成。睿明神啓。蚤膺符命。叶元雲之徵。兼苞藝文。垂彤史之訓。啓迪英聖。則宮闈之師保。登翼太平。則笄珈之堯舜。蓋天祐我國家。篤生聖君。爲億兆立極。必鍾毓聖母。爲一人開先。非偶然者也。先是涿水橫溢。居者靡寧。行者病涉。上軫慈衷。捐數萬之貲。壘石爲梁。以濟往來。俾徒旅獲如砥之安。輿輶無濡輪之困。日者河淮汜汨。災被郡國。黎萌蕩析。餓飢弗康。聖母感之。特諭我皇。亟圖俾乂。神護密運。河伯效靈。畚鍤方興。昏墊化爲甘壤。璧馬未薦。瀕洞儻爾安瀾。疏鑿之功。指掌可竟。平成之烈。跂足以須。微夫慈誠內啓。休應響答。疇克臻茲。卓哉煌煌。與神母授禹之符。如出一轍矣。時維仲冬。載臨慶誕。長樂之觴。甫獻中嵩之祝。交騰而洪流適以循軌。奏千里榮光。六宮瑞靄。若有期會。並映一時。古稱聖神生。河瀆應。宣房塞。萬福來。靈祇佑。孰有殊尤。燦爛若斯者乎。臣叨首輔。薦被渥恩。快覩嘉祺。慶躍無極。敬繪神母授禹圖。摛爲聲詩。庸申慶祝。頌曰。皇矣上帝。幹運太清。眷綏明德。以奠羣生。授謨啓聖。厥符孔貞。粵昔大禹。疏河導谷。遐清地紀。仰正天軸。九州攸寧。萬世禔福。厥有神母。瓊闕是居。昇以靈祕。金簡綠書。微禹若母。兆人其魚。於鑠我皇。功崇德厚。濬發祥源。曰維聖母。鴻化翼登。昭哉啓佑。赫赫天命。皇丕承之。英英皇皇。母慈訓之。奠丕丕基。兆人是依。嗟彼河淮。怒溢瀾漫。萬室成淵。千里無岸。我皇憂之。衣宵食旰。請于聖母。聖母曰咨。捐儲簡僚。滌源導支。無留巨浸。痛我遺黎。慈誠感通。靈答如響。陽侯息波。支祁奠壤。萬旅罷鍤。千艫濟餉。猗嗟休績。厥匪偶然。

禹功帝烈。接躅比肩。迺惟母授。萬載同詮。慶逢慈誕。泰元增筴。海晏河清。乾明坤懌。襲吉會昌。靈休孔赫。臣拜稽首。天子萬年。福祿來崇。如日如川。纘禹之緒。躡古無前。臣拜稽首。聖母萬壽。永錫祚允。克昌厥後。儷彼神母。榮鏡宇宙。敬賡天保。祈嘏祝釐。炳若丹青。綴以聲詩。鏤之玉版。配天永垂。

萬壽無疆頌

臣聞天之道惟純。故能亘古今。歷浩劫。而其運不息。聖人之德惟純。故能配天地。宰民物。而其壽無疆。今夫天。茫旻漠漠。瀕濛鴻洞。運於於穆之中。超乎非想之外。其純如此。是以動而不居。運而無積。噓之爲陽。吸之爲陰。噓已復吸。吸已復噓。環之無端。推之不窮。彼星歷家。以天道爲不可測也。乃占斗建。作甲乙。日積爲歲。歲積爲紀。乘而爲十。百千萬。衍而爲元。會運世。其術雖精。然天載之神。非象數所究。上元肇於甲子。而鴻濛之初。爲甲子者。不知其幾也。萬世之後。爲甲子者。又不知其幾也。以數窮天。不知天者也。聖道卽天道。淵淵穆穆。爲而不有。長而不恃。若是者。其德純也。故聖人之靈。或居天上。或降寰中。或爲帝王。而長生治世。或爲眞宰。而秉教司權。其誕降也。若有期。而生於無極之始。先天以固存者也。其應化也。若有迹。而超乎無極之外。後天而不老者也。蓋道宰數。數難窮道。故謂聖壽爲可數計者。不知聖道者也。仰惟皇上。以聰明神聖之資。證元始沖一之道。出王游衍。罔不在帝左右。蓋純粹至精。與天合一。誕聖之初。榮兆河清。帝曜光楚。四紀于茲。道化汪濊。內恬外熙。頰禽素毳。神芝靈草。應圖而至。將非至德極元。何能永綏。佑命若斯之盛乎。茲秋仲十日。爲靈鳳之期。而景度昌辰。適與日會。則自茲以往。相推不窮。卯卯會祥。旦旦逢吉。循環之數。昭然可覩矣。而臣竊以爲皇上之壽。不可以幹枝時日之數計者。亦如天之不可以

數窮耳。昔絳縣老人計其生平四百甲子。聞者異之。夫甲子而曰四百。比之天道。只且暮耳。星家以帝堯之生起于日之癸。月之巳。星之元。其筭一百二十有七。蓋得天地之中數也。夫天道本無所謂始。無所謂中。無所謂終。今得數而曰中。是有終也。伏惟我皇上受命穆清。應真持世。配天悠久。巧歷所不能究。卽堯之適得中數者。且不足以擬其盛。而況可以甲子計者乎。臣不勝慶忭。謹因玉景會元之旦。拜手稽首而獻頌曰。

皇矣上帝。運化於穆。靜幹乾機。默旋坤軸。翕闢弛張。環輪共轂。一元迭運。終始相屬。容成大撓。隸首區公。布歷推筭。仰測鴻濛。三統五紀。四分九宮。機智可盡。太虛無窮。穆穆聖皇。配天建極。緝熙至道。罔遊于佚。功俸吹萬。神存抱一。獨化陶鈞。基命宥密。唯天瞻德。俾熾而昌。斂時五福。以致萬方。嶽祇貢祉。川后輸藏。四靈畢至。九譯來王。在昔誕聖。流虹繞電。今茲四紀。昌辰逢旦。綠籍標年。紫圖益算。南極宵朗。卿雲晝爛。古稱封禪。七十二君。皇風邈矣。龜板徒云。亦有冥靈。爰及絳老。八千何修。四百何少。蓬萊清淺。或化爲陸。畢彼嵩喬。或淪爲谷。夫惟大道。虛無自然。數不可究。言安能詮。元穹得之。宰化司權。我皇得之。治世長年。紫宮絳闕。金堂玉關。九華承蓋。六氣扶輪。夷猶大始。嘯吸混元。萬靈稽首。率土皈尊。穹哉皇哉。浩劫永存。

聖壽無疆頌

臣聞天得一以清。故常覆而四時行。地得一以寧。故常載而萬物生。聖人得一以貞。故久道而天下化成。伏惟皇上躬神聖之資。履冲和之德。握圖受命。廿有八載。嗣大歷服。壽考作人。雖元穹降佑。有明蓋皇上乘道含貞。得一合符之明效也。若夫道化汪濊。至治旁洽。文德敷矣。命將出師。獯鬻遠遁。武功定矣。諸福

之物。可致之祥。羣趨而畢。至休徵應矣。功德巍巍如此。嘉祥協應如彼。故宜天壽平格。神降之休。然皇上  
方且兢兢不倦。圖惟永終。由此推之。天之保艾我聖躬。寧有既乎。昔周公美高宗享國之永。召公頌成王  
弗祿之康。並載詩書。光昭簡冊。臣以淺薄。謬參輔佐。竊觀景命益昌。皇齡增算。不任踴躍忻忭之誠。敢因  
誕聖之吉。敬獻無疆頌一首。文辭蕪陋。雖不足揚鴻休光聖治。譬之候蟲時鳥。感氣而鳴。亦冀以發揮冥  
工。仰答元造者也。謹頓首稽首而上頌曰。

天門開兮仰穹蒼。卿雲爛兮景星煌。雲罕靄兮華蓋張。會百神兮發清商。鼙鼓碎兮震巖廊。玉鏘琅兮引  
鳴璫。萬國集兮朝未央。旅庭實兮擁珪璋。獻萬壽兮祝聖皇。天佑皇兮作君師。惟天惟大皇。則之和輯。九  
有馭四夷。端冕垂拱致雍熙。明德馨香協神祇。和氣凝兮景福綏。祥禎應兮日益滋。應龍見兮昇殿楣。表  
靈異兮揚光輝。皇之德兮荷帝禧。荷帝之禧御中區。膺寶歷兮奉靈符。驂日月兮斂雲駟。布太和兮壽羣  
生。匝宇宙兮華胥人。山作杯兮河爲觥。鸞沆瀣兮吸玉精。歲歲爲樂兮奉聖君。願億載兮有萬民。壽如天  
兮以長存。

得道長生頌

臣聞黃虞以來。英君誼辟。應運而興者。載之史冊。班班可考。臣竊以爲皆有聖人之資。而未備聖人之道  
也。夫道包絡宇宙。滂漉羣生。恢之彌形。想之外。總之會太乙之先。是萬物之始。經緯之紀也。聖人者。本始  
以知萬物之源。治紀以知經緯之端。故虛愉恬靖。湛然守一。知常襲明。淵乎若得而窺焉。以此養生。則抱  
一含虛。攝有歸真。與天地同其悠久矣。以此治天下。則執簡握機。因應隨化。使知者效其畫。材者畢其能。

而明主不勞而治功成矣。故巖棲谷飲，絕粒噲精者，守形之士也。雖苦而無成，探策岱宗，馳馭崑崙者，荒唐之轍也。或誕而不經，自非至聖，孰能與之。恭惟我皇上，履運中興，撫世立極，躬稟神聖之資，而又兼備神聖之道，澄心於於穆，握紀於精微，受命以來，修政一度，釐典飭工，制作軼百王，謨烈光列聖，文德昭矣。法太乙以命將，按五雷以治兵，南戡北掃，元武布昭，雖有小醜孽逆，旋起旋滅，武功定矣。黃祇效順，幽明叶應，虔修大典，以昭事上帝，薄海內外，無不仰庇元庥，道化成矣。然皇上身不出乎軒陛，而化已行於域中，機獨運於元冥，而應已響於寰宇，賞一行，則雨露均濡，威一振，則颶霆同迅，人但知神功偉烈，超越百代，夫孰知皇上淵衷之默宰乎。蓋聖人之道，內以養生，外以治天下，其要甚微，而其功甚逸。我皇上蓋獨得之矣。是以天壽平格，神降之休，高真擁佑，景福茂增，神芝靈草，徧滿五嶽，揚光獻瑞而來者，不可縷數。由此推之，則天之保艾我聖躬，豈有既乎。臣末學淺陋，管窺蠡測，蒙皇上簡擢，寘之近地，仰贊元修，臣誠惶恐，慮無以報稱者，敬因誕聖之吉，敢拜手稽首而獻頌曰：

右一章 聖人出

龍飛清漢，矯翼天閭，肆煥其大號，改度易章，肆九伐七伐，肅彼遠方，海外有截，荒服來王。

右二章 御六龍

皇在九五，神道設教，得一惟貞，同元體妙，機運高清，功施海徼，譬彼日月，幽巖朗照。

右三章 合神符

受千福百祥。自天降康。絜我后靡怠。昭事皇皇。對越伊邇。肸蠁孔彰。惟此明德。格於穹蒼。

右四章告成功

煌煌靈芝。萬年一秀。今獨何爲。光徧宇宙。曰天子萬年。受天之祐。何以媿之。昔唯軒后。

右五章永元麻

離肅殿箴

北極紫宮。惟皇宅中。身爲民表。心與天通。斯須不和。則乖戾起。斯須不敬。則傲慢叢。念常生於所忽。禍乃發於無窮。是以聖人事心。天命是勅。欽厥止日。謹萬幾處深宮。心周八極。不以嗜欲滑和。不以逸豫滅德。無作好。無作惡。藹藹熙熙。如春斯煦。無荒色。無荒禽。兢兢惕惕。如淵斯臨。勿謂燕閒。人莫與觀。一喜一怒。作人燠寒。絃急者絕。器平者安。優優和衷。爲君實難。勿謂宥密。人莫與弼。一動一言。恆爲度律。危懼則存。驕泰則失。昭昭神明。相在邇室。在昔成周。宇內太和。由離離其在宮。友琴瑟而不頗。亦曰懿恭。小民懷保。由肅肅其在廟。克對揚於祖考。我皇睿哲。是謂智臨。匪高明之不足。貴育德於靜深。我皇撫運。是謂開泰。匪豐亨之不臻。懼此心之或佚。樂以平其情。雖鐘簾不設。而若聞希聲。然後心和氣和。而天下平。禮以飭其志。雖升降未施。而若持重器。斯謂無逸。乃逸而天下治。故曰。沖和者養威。澹泊者養祿。惕勵者養安。憂勤者養樂。以古爲師。于何不儀。平平周道。惟皇建之。以心爲鑑。于何不見。穆穆文王。惟皇所憲。朽索在手。勿謂無傷。覆車在隄。奈何弗防。和不可流。敬不可忘。慎終如始。萬壽無疆。

聖母圖贊

附寶感電黃帝母曰附寶見電光繞北斗樞星感而生帝

軒轅聖母厥有靈符煜煜神電明輝天樞精通景貺慶啓瑤圖紀靈迎日百王所模天開皇統其兆則殊  
女節應星

有美軒妃神風遐邵睨彼長虹中天垂耀光流華渚於昭慶兆乃誕金天首宏帝道不有聖跡曷彰靈造  
慶都毓聖

大哉唐帝德與天同靈鍾聖母冥感神通元雲入戶赤龍在宮遂開景運萬國時雍濟濟岳牧是謂雲龍  
塗山翼夏

禹錫元圭周行四隩啓生而出八年不復實有塗山內襄椒屋遂登夏道永承天祿澤遠淵深昭哉有淑  
簡狄生商

於鑠聖緒長發其祥瑤臺有女元鳥來翔乃遺之卵覆於玉筐簡狄吞之感而生商元王之允是爲成湯  
太任胎教

立教之方罔不在始思齋太任震夙聖子視聽有儀周旋中禮所以文王緝熙敬止穆穆母儀光於圖史  
太姒嗣音

妣氏繼任益彰內治南國化行德音是嗣誕武興周日昌而熾樛木螽斯壺行純備葛覃垂詠光範來季  
明德崇儉

富貴惜福天佑益隆明德偉識儉素是崇身服大練化行漢宮裁抑外家克己示公弼明翊章邈矣休風

長孫進賢

唐宗烈烈。踵美三王。實維哲后。左右椒房。調和直諒。獎進忠良。用俾房魏。勳庸顯彰。煌煌彤管。千載遺芳。

宣仁守舊

宋哲冲年。握圖在宥。尙賴王母。單心擁佑。政必法祖。人惟求舊。一洗熙寧。化爲元祐。休哉女德。唐虞比懋。

接引佛讚

妙湛宏慈。兩足尊能。以總持不動力。拔諸沈淪。出苦海。引入毘盧大寶閣。我願學及無學人。自度度他。智無礙。畢竟無有得度者。是則名爲天人師。

鐘鼎硯銘

鑄之端山之陽。登之翰墨之場。胡舍其鏗鏗鏗鏗。而爲磷磷琅琅。發其條理。翊我文章。將以鳴治世之盛。而垂述作之光。

工科左給事中邱岳并妻勅命一道

奉天承運。皇帝勅曰。國家做古。諫議之職。分設六科。慎簡才賢。實諸近列。咨其獻納之猷。冀底敷言之績。厥惟重矣。非端慎明允。練國章而識治體者。烏能勝斯任乎。爾工科左給事中邱岳。清素勵於持操。敏達優於服政。昔居劇邑。夙著賢聲。繼陟諫垣。益隆譽問。銓書奏最。亟用嘉焉。茲特進爾階。徵仕郎。錫之勅命。以爲爾榮。夫古人不慕專城之柄。符竹之榮。而願出入禁闈者。爲其身依清近。而雅言易聞也。爾尙以古之賢臣自期。勵志紆猷。拾遺補闕。用裨治化之成。無負掄授之意。其爾尙亦有顯陟矣。欽哉。勅曰。爲人臣



者靖共以事君爲人婦者淑慎以相夫其道一也故國家推恩臣下並及其配焉所以勸交儆厚人倫也爾工科左給事中邱岳妻黃氏夙閑姆訓克慎婦儀綜理惟勤柔嘉維則其賢足徵矣茲特封爾爲孺人尙其無忘雞鳴之誼以永燕譽之休

工科左給事中邱岳父母勅命一道

奉天承運皇帝勅曰朕聞植根深者不期茂而自茂植德深者不期昌而自昌故邱園之子考槃之人身或不食而後乃榮茂茲天道也爾邱尙忠乃工科左給事中邱岳之父孝友著於家庭恂實表乎閭里享不副德而有子登庸斯亦足以成厥志矣用贈爾爲徵仕郎工科左給事中秩命之榮具如其子雖祿養之弗逮而潛德之已彰冥漠有知服茲寵錫勅曰母之于子不獨內愛篤也蓋亦有義方之訓焉故國家寵命臣工必借及其父母示罔極之恩同嚴親之教一也爾熊氏乃工科左給事中邱岳之母勤淑相夫式修壺範端嚴教子丕著母儀茲特封爾爲太孺人遠貽閨闈之光用介期頤之祉



# 明張文忠公全集

## 文集三

### 辛未會試程策 一 二三

問。易之泰曰。天地交。而萬物通也。上下交。而其志同也。言泰者。固在君臣相與間矣。夫泰之時。和氣洽。而理道昌。一有壅闕。不足爲泰。在昔明君良臣。相與開泰於先。保泰於後者。用何道歟。君臣遇合。蓋古以爲難。而胡以交歟。唐虞三代。尙矣。漢以下。有講經論理。夜分乃寐者。有制諫官。隨宰相入議政事者。有降手詔。給筆札者。有請輪侍從直宿。以待宣召者。亦庶幾所謂交泰歟。嘗伏讀大誥。首君臣同遊。聖謨遠矣。頌盛德者。謂開泰莫如二祖。保泰莫如宣孝二朝。當時謀臣策士。耆舊老成。侍帷幄。圖國政。以佐致昇平者。可悉數歟。朝講之儀。載在令甲。備矣。乃又不時宣召。得無煩且勞歟。我皇上臨御以來。講學勤政。嘉興百執事。共登太平之理。湛恩威命。卽敍遐荒。斯亦交泰之驗矣。抑古人有言行百里者。半九十。且夫平能憂陂。往能思復。泰之旨也。願推廣其說。以爲今日保泰之助。

夫君臣之際。其天地之交乎。是故先天而開泰也。相與定一代之鴻圖。後天而保泰也。相與建萬世之長策。聚精會神。相得而益彰。顯志宏業。相須而共濟。盛美溢乎當世。聲光流于無窮。蓋自唐虞以及昭代。致理之原。古今一揆矣。愚請繹泰之義。先著君臣之所以交。然後鋪張我祖宗休烈。可乎。易。天地交泰。后以裁成天地之道。輔相天地之宜。以左右民。夫泰之言通也。后以裁成輔相爲事。蓋身視臣庶。而家視寰宇。

使元首與股肱弗相聯屬。則精神不貫而身病。使主伯與亞旅弗相親比。則意氣不洽而家睽。故天道下濟。地道上行。網緼訢合。以生萬物。交也者。天地之所不能違也。而況於人乎。人臣懷忠信之心。抱匡濟之畫。孰不欲委質清時。結心明主。然而冠履之分嚴。而宮庭之地隔。其情易渙。而其勢易疏也。明主知其然。故首出庶物。而下芻蕘。兼制四海。而先轡御朝。而議政。坐而論道。所以優體也。虛懷而聽。造膝而籌。所以致親也。日晏侍食。夜分徹炬。所以示渥也。辟左右。借顏色。披衷懷。忘忌諱。所以盡情也。君咨于內曰。爾惟麴蘖。爾惟鹽梅。臣順于外曰。斯謀惟后。斯猷惟后。所以一德也。泰九二。以剛中應五。而五以柔中虛己。以從之。此之謂君臣之交。故泰之初。拔茅彙征。與共開焉。泰之極。難貞無咎。與共保焉。二言所爲。五不言所爲。二臣道也。以任事爲忠。五君道也。以任人爲大。二勝其任。則五可無爲。故曰。以祉元吉而已。此之謂君臣交而爲泰也。夫都兪咨命。喜起賡歌。唐虞尙矣。三代相與。載在詩書。君臣之情。猶可想見。由漢而下。肇造元勳。中興名佐。代固有之。然率外合而中疑。文具而情闕。建武數引公卿講論。而責以吏事。則其體失也。貞觀宰相入閣議事。而隨以諫官。則其中疑也。慶歷龍圖天章閣降手詔。給筆札。而固辭不對。則臣負其君也。治平中。司馬光請命侍從。輪直資善堂。夜宿崇文院。以待宣召。而卒未行。則君負其臣也。何以庶幾于交泰哉。愚嘗伏讀大誥。首君臣同遊。曰。歷代君臣同心一氣。立綱陳紀。昭示天下。爲民造福。是以感格天地。時和年豐。家給人足。大哉聖謨。我皇祖列聖之所以交羣臣而昌泰運者。率用此道矣。請陳其略。高皇帝延攬英賢。廓清華夏。所與參密議而贊鴻猷者。時則有若基。若濂。若安。若禕。若溢。若琛。若琛。若彥。良其人焉。文皇帝親禮儒碩。綏靖邦家。所與商幾務而從征討者。時則有若縉。若廣。若淮。若儼。若榮。若士奇。若

幼孜其人焉。夫天造草昧，干戈不遑，家難劬勩，創夷初起，而君臣之相與如此，是以神流氣鬯，天地太和，延及羣生，施于方外，而一代之鴻圖定矣。所謂開天地之泰者，非邪？列聖相承，久安長治，宣宏之際，尤稱邕隆。章皇帝心存無逸，耆舊不遺，閣臣則若榮若士奇，若溥、部、僚，則若義若原吉，若濬、齋，宮便殿，召對者數矣。至于登山泛舟，賜章給饌，一則曰同心同德，兩無猜嫌，一則曰以遊以豫，庶幾古昔，又何其歡洽也。敬皇帝志大有爲，老成具在，執政則若溥，若健，若東陽，若遷、臺省，則若文升，若大夏，若珊、平、臺、煖，閣、召對者數矣。至於天顏開霽，廟算周詳，疏擬則或更數字，或削數語，執奏則或移晷刻，或至累日，又何其披豁也。夫奕葉承平，法守已定，庶事循習，玩愒易生，而君臣之相與如此，是以神流氣鬯，天地太和，克篤前烈，施于后昆，而萬世之長策建矣。所謂保天地之泰者，非邪？當其時，主無貳任，臣無隱忠，歡忻交通，而德威宣暢，故論開濟，則功軼于姬、妲，頌熙洽，則治匹乎唐、虞，而一時名臣碩輔，幸逢昌運，亦得以勒勳德于旂常，垂功名于竹帛，猗歟休哉！真千載一時之遇也。今天子光撫鴻圖，祇遵成憲，講學臨政，寒暑必親，嘉言忠謨，納聽靡倦，公卿百執事，相與勵翼于下，而天子恭己南面，以聽之內，寧外謐，時和年豐，黠虜來庭，炎荒奏凱，斯亦泰運之再昌已。而執事尙欲聞保泰之說，則愚將何詞以獻乎？竊以爲欲登太平之理，莫若致隆于上下之交，欲隆乎上下之交，莫若憲章乎召對之典。夫人情狃于法之所常行，而惕于意之所開，舉今辨色而入，日出而視之，頃刻而退矣。習則玩，玩則不可振，故不若閒一召對之爲益也。蓋有六善焉：閱世務一也，察材品二也，明德意三也，密事幾四也，定國是五也，激忠悃六也。請得實以祖宗故事，熟數于前，而執事試垂聽焉。夫人主雖神聖睿智，而四方庶務，弗能周也。錢穀刑獄，各有主者，召而問之，則幽

隱畢達。故屯田鹽法。欲計其宜。而臨淮洛陽。得畢慮于下矣。邊備虜情。欲定其算。而鈞陽華容。得決策于前矣。故以閱世務。率作考成。可弗眩也。夫退而具疏。則詞可飾也。思而陳詞。則端可匿也。惟卒然問之心術立見。能否莫逃。故呂震與儀智並對。而諛直見。楊士奇與蹇義並對。而遲敏見。故以察材品。則明闇回正。可弗欺也。上意猶的也。射者爭趨之。故諸司奏請。必令稽舊章。侍臣以此知上意之在守法。召問天下何時太平。朕安得如古帝王。大臣以此知上意之在興治。故以明德意。則措汙嚮往。可弗違也。夫造膝而密語者。不可以先傳也。從容而納誨者。不可以牘盡也。假令議廣詔條。而可令多人知乎。出廠帖。議改命。可外泄乎。故以密事幾。則轉移變化。可弗窺也。衆議畢集。可否易淆。不惟僉夫與正士殊科。卽君子意見。亦有同異。如移師彰德。楊榮以爲是。士奇以爲非。舉伏伯安爲使。蹇義以爲可。原吉以爲不可。黎利請立陳氏後。張輔蹇夏曰勿許。榮士奇曰許之。此其心皆體國。而所見各殊。惟折以宸衷。則衆論一矣。故以定國是。則盈庭聚訟。可弗亂也。夫入侍帷幄。出奉乘輿。內寄腹心。外資謀斷。人人自以爲親已矣。有君如此。其忍負之。祖宗朝。相與盛事。藏在祕府。愚不得徧觀。卽如泰和長沙華容之所私錄。毗倚眷顧。迄今誦之。猶爲感動。況親當其盛者乎。故以激忠悃。則御恩幸遇。可弗負也。斯六善者。皆已事之明驗。蓋于法制常行之外。而時用吾鼓舞不測之權。故聖智日益。觀聽日新。賢才樂爲之用。而天地常泰。且初雖似勞。久而情誼洽。彌見其適。初雖似煩。久而要領得。彌見其簡。又何煩勞之有。愚又聞二祖諸臣。皆從事乎草昧。劬勤間。而宣德宏治。所親禮。乃其輔導之舊。蓋未登大寶。而相與已素矣。且孝宗十載。始召諸臣面對。其召也。雖內侍不及知。夫恭默思道。是惟不言。言乃雍沈。幾觀變。是惟不行。行乃果宸衷獨發。固不可測也。今

上勵精圖治。日臨羣臣。益明習國家事。且將舉祖宗故典。以備熙朝盛美。蓋有待焉。草莽愚生。傾心拭目。於是舉也。久矣。若釋此而他求。保泰之道。則愚何知焉。

問王者與民信守者法耳。古今宜有一定之法。而孟軻荀卿皆大儒也。一謂法先王。一謂法後王。何相左歟。我國家之法。鴻織具備。於古鮮儻矣。然亦有在前代則爲敝法。在熙朝則爲善制者。豈行之固有道歟。雖然。至於今且敝矣。宜有更張否歟。或者謂患不綜覈耳。古今論綜覈者。莫如漢宣帝。然當其時亦五日一視事矣。僞增籍者受賞矣。若此者可謂行法歟。宣優于文。豈爲通論。而或者亟其歎服。抑宜美元。似知大體。而或者深刺其非。孰爲當歟。夫欲綜覈則情僞有不可窮。更張則善制有不可必變。誠不知所宜從也。願熟計其便。著于篇。

法不可以輕變也。亦不可以苟因也。苟因則承敝襲舛。有頽靡不振之虞。此不事事之過也。輕變則厭故喜新。有更張無序之患。此太多事之過也。二者法之所禁也。而且犯之。又何暇責其能行法哉。去二者之過。而一求諸實法斯行矣。執事發策考荀孟之異論。稽國家之舊章。審沿革之所宜。求綜覈之實效。愚嘗伏而思之。夫法制無常。近民爲要。古今異勢。便俗爲宜。孟子曰。遵先王之法而過者。未之有也。此欲法先王矣。荀卿曰。略法先王。而足亂世術。不知法後王。而一制度。是俗儒者也。此欲法後王矣。兩者互異。而荀爲近焉。何也。法無古今。惟其時之所宜。與民之所安耳。時宜之。民安之。雖庸衆之所建立。不可廢也。戾于時。拂于民。雖聖哲之所創造。可無從也。後王之法。其民之耳而目之也。久矣。久則有司之籍詳。而衆人之智熟。道之而易從。令之而易喻。故曰法後王便也。往代無論已。明興高皇帝神聖統天。經緯往制。博稽濶

采靡善弗登。若六卿傲夏。公孤紹周。型漢祖之規模。憲唐宗之律令。儀有宋之家法。采勝國之歷元。而隨時制宜。因民立政。取之近代者十九。稽之往古者十一。又非徒然也。卽如算商賈。置鹽官。則桑孔之遺意也。論停解。制年格。則崔亮之選除也。兩稅三限。則楊炎之田賦也。保甲戶馬。經義取士。則安石之新法也。諸如此類。未可悉數。固前代所謂陋習。敝政也。而今皆用之。反以收富彊之效。而建昇平之業。故善用之。則庸衆之法。可使與聖哲同功。而況出于聖哲者乎。故善法後王者。莫如高皇帝矣。天府之所藏。掌故習之所頒。有司守之。大小相維。鴻纖具備。自三代以來。法制之善。未有過于昭代者也。然今甫二百餘年耳。科條雖具。而美意漸荒。申令雖勤。而實效罔獲。屯田興矣。土曠猶故也。鹺政舉矣。蜚輓猶故也。清句數矣。乏伍猶故也。積粟課矣。空廩猶故也。豈法之敝而不可行哉。故議者謂宜有所更張。而後可以新天下之耳目者。愚竊以爲不然也。夫高皇帝之始爲法也。律令三易。而後成。官制晚年而始定。一時名臣英佐。相與持籌而算之。其利害審矣。後雖有智巧。蔑以踰之矣。且以高皇帝之聖哲。猶俯循庸衆之所爲。乃以今之庸衆。而欲易聖哲之所建。豈不悖乎。車之不前也。馬不力也。不策馬而策車。何益。法之不行也。人不力也。不議人而議法。何益。下流壅則上溢。上源窒則下枯。決其壅。疏其窒。而法行矣。今之爲法壅者。其病有四。愚請頌言而毋諱。可乎。夫天下之治。始乎嚴。常卒乎弛。而人之情。始乎奮。常卒乎怠。今固已怠矣。幹蠱之道。如塞漏舟。而今且泄泄然。以爲毋擾耳。一令下。曰何煩苛也。一事興。曰何操切也。相與務爲無所事。事之老成。而崇尚夫坐嘯畫諾之悖大。以此求理。不亦難乎。此病在積習者。一也。天下之勢。上常重而下常輕。則運之爲易。今法之所行。常在于卑寡。勢之所阻。常在于衆彊。下挾其衆而威乎上。上恐見議而畏



乎下。陵替之風漸成。指臂之勢難使。此病在紀綱者二也。夫多指亂視。多言亂聽。言貴定也。今或一事未建。而論者盈庭。一利未興。而議者踵至。是以任事者多卻顧之虞。而善宦者工遁藏之術。此病在議論者三也。夫屢省考成。所以興事也。故采其名。必稽其實。作于始。必考其終。則人無隱衷。而事可底績。今一制之立。若曰著爲令矣。曾不崇朝。而遽聞停罷。一令之施。若曰布海內矣。而畿輔之內。且格不行。利害不究。其歸而賞罰莫必其後。此病在名實者四也。四者之弊。熟于人之耳目。而入于人之心志。非一日矣。今不祛四者之弊。以決其壅。疏其窒。而欲法之行。雖日更制。而月易令。何益乎。夫漢宣帝綜覈之主也。然考其當時所行。則固未常新一令。創一制。惟日取其祖宗之法。修飭而振舉之。如曰漢家自有制度耳。且其所任魏相。最爲稱上意者。亦未嘗以己意有所論建。惟條奏漢家故事。及名臣賈誼。晁錯等言耳。當其時。雖五日一視事。而上下相維。無苟且之意。吏不奉宣詔書。則有責。上計簿徒具文。則有責。三公不察吏治。則有責。其所以振刷綜理者。皆未嘗少越于舊法之外。惟其實事求是。而不采虛聲。信賞必罰。而真僞無眩。是以當時吏稱其職。民安其業。政事文學法理之士。咸精其能。下至技巧工匠。後世鮮及。故崔實稱其優于孝文。而仲長統極其嘆服。荀悅論美元帝。而李德裕深以爲非。良不誣矣。然則今之欲求治理者。又奚以紛紛多事爲哉。高皇帝畢智竭慮。以定一代之制。非如漢祖之日不暇給也。列聖相承。創守一道。非有武帝之紛更中變也。百官承式。海內嚮風。非有許史霍氏之專制撓法也。成憲具存。舊章森列。明君賢臣。相與實圖之而已。毋不事事。毋泰多事。祛積習。以作頽靡。振紀綱。以正風俗。省議論。以行國是。覈名實。以行賞罰。則法行如流。而事功輻輳矣。若曰此漢事耳。吾且爲唐虞。爲三代。則苟卿所謂俗儒也。

問古之君子興建鴻業。聲施後世者。世必目之曰英雄。曰豪傑。是二名者。豈非偉丈夫之通稱歟。乃論著家又各析其名義。匪直英雄與豪傑有辨。卽英與雄亦從而分之。謂有英而不雄者。有雄而不英者。其說然歟。否歟。歷代英雄豪傑。見於史冊者。不可勝舉。然亦有卽標題爲號者。如蜀之四英。周之七雄。戰國之四豪。漢之三傑。其人材行聲績。果皆不愧其名歟。將其人品又各有高下歟。近世儒者謂真正英雄。必自戰兢中來。又謂豪傑未必聖賢。聖賢必爲豪傑。而古唯三聖人足以當之。則其說豈不尤異歟。夫英雄豪傑。美名也。士以是稱。可以爲難矣。乃儒者猶雌黃之不少假。則尙友者何所取則歟。試言之以觀其志。

古瓌偉奇特之士。樹鴻業于當時。垂鴻稱于後世者。豈獨其才之過人哉。蓋尤係于養矣。養有淺深。則其才有純駁。才有純駁。則其建立有鉅細。才得于天者也。養繇于人者也。才欲恢。欲宏。欲奇。欲儻。養欲微。欲深。欲精。欲奧。兩者若相反焉。然微深精奧者。所以爲恢宏奇儻也。故古之善養才者。不恃其得天之異。而勉其修己之純。鬪如虓虎。不敢以言勇。懼其剛之易摧也。鈺如莫邪。不敢以言利。懼其鋒之易折也。神若蒼蔡。不敢以言智。懼其算之易窮也。力若九牛。不敢以言任。懼其趨之易躓也。煉之至精。而斂之至密。韜之至深。而蓄之至厚。夫然後其神疑。其氣專。發之不可禦。索之不可窮矣。人徒見其事業聲稱。照耀今古。抑孰測其所以致之者哉。今夫兩間清淑之氣。麗于形象。在天爲星辰。在地爲河嶽。在土石爲寶玉。在飛走爲麟鳳。在人則爲英雄豪傑。是英雄豪傑者。固均之二氣之間。鍾人倫之首出者也。然有辨焉。劉孔才云。聰明秀出。謂之英。膽力過人。謂之雄。有英而不雄者。有雄而不英者。智勇並異。則英雄兼焉。淮南解曰。

才過千人謂之豪。萬人謂之傑。此英雄豪傑之辨也。總之皆以其智力絕殊。不可以尋常尺度論耳。自古迄今。所以樹立人紀。綱翊世運。決大疑。排大難。建大功。立大節。必此四人者爲之。然而品格異焉。不可不察也。夫人非無才之患。有才而能善用之爲難。四人者其機智勇決。既與凡民迥異。則未免過于自恃。而有眇焉輕天下之心。紛錯未交。而謂幾不足與晰也。艱阻未識。而謂功不足與圖也。考衷叩繯。則固未有灼然先幾之見。確然不可奪之守。一挫其銳。則折北而不振矣。是純乎氣者也。夫千鈞之弩。不以麋鼠發機。萬石之鐘。不爲尺挺成響。物理有分。感應有節。不可易也。四人者負其才具。則不能安于無事。往往不勝技癢。曲牽于應世之迹。而輕試其所長。是以見彈求鸚。或欲速而不達。投珠抵鵲。或見小而妨大。此與虛憍恃氣者。固有間矣。然而其彊可撓也。其躁可激也。其驕可乘也。其欲可參也。以綜天下之務。則得失參焉。不可與謀成也。是識不能勝其才者也。等而上焉。嚴乎內外。審于施應。既不沾沾以自喜。亦不汲汲以從時。自度其智。可與幾也。將謂天下之故。非己莫能矚耳。自度其勇。可與斷也。將謂天下之事。非己莫能成耳。其晰微制決。持危定傾。能于轉盼咄嗟之間。而豎俶儻不羣之績。此四人者之能事也。然而其光外朗。其氣內盈。尋之不易其方。而測之可窮其際。是兼得乎養而未盛者也。品之優也。等而上焉。智周萬物。而不自用其明。勇蓋萬夫。而不自任其力。隨事而應。弗膠于成心。循理而行。弗牽於功利。朕兆未萌。法象未著。淵然獨慮。而百姓莫見其迹。不世之功。永世之澤。驀然丕建。而百姓莫知其然。天下所謂智者勇者。舉莫得而望焉。此朱子所謂真正英雄豪傑而聖賢者也。品之上也。愚嘗以是汎觀古今之迹。總挈人物之量。其英雄豪傑。優劣高下之辨。大都不越此四者。顧更僕未易數也。姑卽明問所及者言之。周之衰

也。王綱弛維。諸侯力政。于是縣宇分裂。稱爲七雄。戰國之末。貴臣握柄。資贍游談。于是列國公子。號爲四豪。漢高坐屈羣策。以建篡堯之業。則張良蕭何韓信三臣者。皆人傑也。而漢之得天下。由是焉。昭烈知人待士。以噓炎劉之燼。則諸葛亮董允蔣琬費禕四子者。皆英雋也。而蜀之存亡。因之焉。卽史傳所紀。固各有英雄豪傑之目矣。試卽前四者之等。以概此數子之長。則七雄者。彼哉無以議爲也。平原卑卑不及格矣。孟嘗春申廣交養名。背公死黨。姦人之魁耳。信陵威信于彊秦。義存乎弱趙。急人之難。不居乎功。蓋猶有烈士之風焉。惟其挾威震主。內疑外忌。則君子所不道者。其在三四之間乎。三傑遭際興運。各奮才智。推轂漢祖。卒成帝業。信乎爲代寶矣。子房英略蓋世。而貌若處子。功成身退。超然遠引。比之何信。爲最優焉。三品之上者乎。董允蔣琬費禕。端謹節士耳。雖事無過舉。然天之所授。非特異也。有忝英稱矣。孔明望重于臥龍。力抗乎漢鼎。君臣契合。投袂匡時。至于出師獻納之言。寧靜澹泊之語。出處議論。庶幾王者之佐焉。蓋入其域而未優者乎。之數子者。皆以蓋世之才。際功名之會。雲蒸龍變。鷹揚虎視。考其平生之所建樹。可謂偉俊卓犖矣。然其中或得分有多寡。賦才有兼偏。細節多疏。則不能無負。俗之累。氣質偏勝。則不能無瑕類之存。蓋所謂衆材之尤也。非衆尤之尤也。必也。其大禹乎。鑿龍門。排伊闕。別九州。宅四隩。績固偉矣。然且不矜不伐。而莫與爭功。愚夫愚婦。而凜若勝子。彼視地平天成。于吾身何有輕重也。其周公乎。除兇殘。驅虎豹。立綱紀。陳禮樂。功莫大焉。然且吐哺握髮。下白屋之士。不驕不吝。履赤烏之安。彼視勝殷。遏劉于吾心。何有加損也。其孔子乎。學殫累世。而不以智聞。力抉門關。而不以勇聞。在鄉黨而恂恂。居朝廷而唯謹。固儼然儒者也。及其卻萊兵。反鄆讎。墮三都。誅正卯。卽慷慨奇節之士。決背奮臂。極力而不

能辨者。乃不動聲色。徐引而振之。既振。油然而退。無矜容。無盛氣。此豈世之君子。所可與量尺寸哉。蓋此三聖人者。受之于天。既皆得夫渾淪磅礴之氣。修之于己。又皆懋夫沈潛純粹之學。其所基者密。而宥而所蓄者完。而固也。故能決大疑。排大難。建大功。立大節。紓徐委蛇。而不見其作爲之迹。嗟夫。非天下之至聖。其能孰與於此哉。故朱子謂真正英雄。皆自戰兢中來。而聖賢豪傑。唯此三聖人足以當之。信不誣矣。然則世之君子。受天地特厚之才。而有志于三聖人之事者。顧可不慎所養乎。養之道。無欲其本也。慎動其要也。析義窮理。沈幾察微。瑩乎若夜光之內朗。洞乎若止水之獨鑑。所以養智也。抑其彊陽。銷其客氣。深乎若彊弩之握機。韜乎若寶劍之斂鍔。所以養勇也。尸居而龍見。淵嘿而雷聲。聖人之事也。卽史冊所載。瓌偉奇特之士。猶將姑舍是焉。而況其下者也。蓋嘗聞紀涓子之養鬪雞也。始虛憍而恃氣。馴之十日。則應景嚮矣。又十日。然後其德全。而異雞無敢鬪者矣。此養德之喻也。故英雄豪傑之從事于學也。若紀涓子之養雞。則幾矣。



# 明張文忠公全集

## 文集四

### 勅建涿州二橋碑文

涿密爾京邑。當四方孔道。朝覲貢獻。仕旅商賈之所必經。其北有河二。自西山諸泉來者。曰胡良河。距城七里。自紫荆關外。鐵鎖崖入者。曰巨馬河。距城二里許。每伏秋水發。洶湧暴至。倏忽卽數十尺。行旅走避不及。歲漂溺者。常數百。行人者病涉。兆民咨嗟。聖母慈聖皇太后。在先帝時。夢若有神告言。宜作功德事。以福國祐民。太后意念之不忘。今上建元之首年。會州民有奏乞建橋濟衆者。太后憶與夢符。遂語上。以欲建橋意。上曰。興作大事也。請得與輔臣計之。出以太后意諭臣。居正臣因言。時詘舉羸。古人所戒。上始卽大位。一切宜與民休息。茲役太勞民。且費鉅。恐有司亦未能辦。奈何。上曰。聖母自以宮中供奉金。募工爲之。一夫不役于民。一錢不取於官也。臣頓首曰。幸甚。乃發帑金五萬兩。詔工部。以農隙鳩材。發春戒事。命司禮監太監馮保。擇內臣廉幹者。督工。保舉內官監太監劉濟。命工部尙書朱衡。擇司屬中精敏者二人。相其役。衡舉郎中易可久。賀幼殊。上曰。往欽哉。毋擾民。毋冒費。毋淹時。毋苟且塞責。諸臣奉命唯謹。乃以二年正月之十日興工。諸臣夙夜在公。出入有稽。厚值以儻工。民爭趨之。蓋五閱月而遂告成事。爲胡良河橋一。巨馬河橋一。高廣各二丈許。長三十餘丈。皆甃以巨石。鋼以鐵錠。除道屬之。兩橋間伏龍宛虹。巧侔神造。而費不過七萬。役不過數月。往嘉靖間。建琉璃河一橋。費三十餘萬。作者數萬人。茲二橋之費。

不當四之一。而堅緻精工。乃過之數倍。居者頌。行者謳。方軌並駕。徒衆摩肩。望之窿窿。屹然信天下之鉅觀也。事既竣。上手詔。以二橋工成。聖母功德甚大。命臣居正紀其事。臣觀易益之繇曰。利涉大川。孔子贊之曰。損上益下。民悅無疆。自上下下。其道大光。而五之辭曰。有孚惠心。勿問元吉。夫惟宏濟大川。而寧損己之有。不傷民財。是以舉措光大。而闡澤無疆也。夫天下未有十利之事也。勞民以便民。病寡而利多。仁者猶將爲之。茲役也。誠不忍斯民之墊溺。而思以拯之也。卽上以詔令。水衡出錢。閭左興役。責之有司。如期而辦。凡以利民。夫誰曰不可。乃聖母與皇上。視民之溺。由己溺之。旣以澇漉引救之矣。而又不煩有司。不擾閭閻。至出其脂盞之資。以爲萬姓造福。茲非所謂損上益下。而有孚惠心者乎。以是而獲元吉。受介福。奚俟問矣。雖然。有方之仁。可得而名言也。無方之仁。不可得而名言也。昔齊宣王。不忍一牛之穀觶。而舍之。孟子許其心足。以保四海。今天下之廣。兆民之衆。蒿目而仰上之澤者。何限。涿獨以在眉睫之地。呼號之聲。一徹天聽。遂皇皇思以拯救之。弗少後。所謂一牛之穀觶耳。推是心也。將舉天下而怙戴之。無俾一夫不被其澤者。而後上之心始慰。此之功德。寧可以算數計耶。而又何以名言之乎。不可名者。臣將與天下相忘於無言矣。可名者。臣謹恭紀其事如右。而係之以詞曰。瞻彼涿鹿。爲京喉舌。匪無莊廩。河水所嚙。哀我人斯。淪胥以滅。欲度無梁。如食斯噎。浩浩洪流。平陸成渠。下民其咨。行旅卒痛。聲聞于天。我后曰。吁。視而弗救。慮殫爲魚。乃召司空。乃命匠作。往卽爾職。爰諏爰度。作之汜渙。屬諸郊郭。水昏而裁。日北而落。帝復諄戒。我后至仁。匪以厲衆。毋擾甸人。捐金爲之。期以利民。歡聲載途。荷鍤雲屯。曾不踰時。兩橋並建。象彼閣道。橫絕天漢。輪蹄縮紛。士女泮渙。來遊來過。以謳以怵。曰。我后德配地無疆。拯此淪溺。寘之



康莊女媧鍊石。我后造梁。補天奠川。厥功匪彰。上帝鑒觀。介以繁祉。繁祉維何。保茲天子。克昌厥後。本支百世。亦祐我民。永賴□□。明明天子。后篤生之。穆穆后德。天子成之。粵求治平。惟孝與慈。千秋萬禩。固此丕基。

### 勅建承恩寺碑文

皇朝凡皇太子諸王生。率剃度幼童一人爲僧。名替度。雖非雅制。而宮中率沿以爲常。皇上替僧名志善。向居龍泉寺。慈聖皇太后。今上皇帝。追念先帝及其替僧。以寺居圯壞。欲一新之。而其地湫隘。且濱于河。勢難充拓。乃出帑儲千金。潞王公主及諸宮眷。所施數千金。命司禮監太監馮保。買地於都城巽隅。居賢坊。故太監王成住宅。特建梵刹。外爲山門。天王殿。左右列鐘鼓樓。中爲大雄寶殿。兩廡爲伽藍祖師殿。後爲大士殿。左右庫房禪堂。方丈香積僧房。凡九十有五。莊嚴法事。靡不畢具。寺成。因官志善爲僧錄司。左善世。以住持之。而賜名曰承恩。余惟承恩有二義焉。施給園剋。精舍崇重三寶。上恩也。以大悲智力。拯拔沈苦。躋諸彼岸。以大光明燈。普照沈迷。示之覺路。佛恩也。思報上恩。則必虔恭朝夕。勤修法事。以祝慈壽。聖恩千萬禩。思報佛恩。則必恪守戒律。發深信心。以求速證。毘盧正果。庶毋負於聖母。皇上勗建之意也。於戲。後之居此者。宜諦思之。工始于萬曆甲戌年。告成于乙亥年月。謹述其剋立始末。勒之于石。以垂不朽。而繫之以偈曰。佛恩廣大浩無邊。毘盧光明照大千。拔諸沈苦證涅槃。如以寶筏濟迷川。慈恩浩浩亦如然。巍巍功德不唐捐。舍衛城中給孤園。梵刹萃起開中天。琳宮玉除寶莊嚴。間以寶樹鬱慈芊。寶華芬敷色殊妍。華雲鬢雲垂四埏。法輪常轉妙義宣。法燈常明爇幽纏。我願緇俗諸有緣。普霑法潤沃心田。誦

我重宣此偈言。永祝慈齡萬萬年。

重修海會寺碑文

佛法之大。舉華藏世界海。一一皆有微塵數。諸佛不爲多。於一毛孔中。納世界海。微塵數不爲礙。寺之名爲海會者。以此。其寺在都城之南。創于嘉靖乙未。穆宗皇帝嘗受釐于此。歷祀既久。棟宇弗葺。榱桷將毀。皇上卽位之二年。函夏乂安。四民樂業。聖母慈聖皇太后思所以保艾聖躬。烏奕允祚者。惟佛寶是依。乃出內帑銀若干。俾卽其地更建焉。旣集議。慈聖皇太后暨潞王賢妃貴人以下。咸出貲助之。會遊僧有範成銅像一軀。無所庇覆。司禮監太監馮保。因請移置其地。復出內儲大木。以爲殿材。遂以年月日始事。命□□監董其工役。於中爲殿三。皆三楹。方丈一。凡五楹。鐘鼓樓二。配殿十二。禪堂十。僧房四十。有奇。前爲山門。繚以周垣。殿宇靚深。廊廡曼衍。重閣層軒。翬飛丹煥。像設獲以安妥。僧徒於焉遊集。煌煌乎都邑之盛觀也。又於其外。拓地六頃。收其租入。以爲焚修供具之資。揆厥勝因。必由善建。恭惟慈聖皇太后體坤元之載物。同慈利之好生。發至誠之心。證大乘之果。將以保皇躬。翊皇度。納八荒於華嚴勝界。漉羣生於沈淪業海。巍巍功德。不可名已。是以宮壺出其琛寶。誓御效其誠悃。工不逾時。役不告勞。是宜刻之貞石。告厥成功。昭示來裔。銘曰。天睠鴻德。受命孔固。誕育我皇。時維聖母。恩隆罔極。載釐允祚。皈依竺範。宅美希夷。乃闢靈宇。在邦之圻。珍輪內帑。民悅子來。丹刻有輝。金容麗設。中座耽耽。飛簷轆轤。印度重開。耆山有截。禪慧攸託。神足來遊。都人瞻仰。徒衆幽求。魚燈螺梵。無缺春秋。福德佑仁。儲祥委祉。皇心悅豫。宮闈燕喜。於萬斯年。施于孫子。元風廣播。皇輿載安。道合無爲。功存不刊。勒于貞珉。永垂大觀。

自古帝王建國。肅恭羣祀。列在祀典。大祝頌之。士民不得奉。而民間所爲號祝歌舞。其事誕漫。祠官不主也。惟岱宗之神。自繩契以來。秩在祝史。通乎上下。今天下郡國皆有東嶽廟。而京師則廟朝陽門之東。相傳唐宋時已有國朝正統中。益恢崇之。歲遣太常致祭。燠旱則禱焉。而都人士女。祈祉禳災。亦各自財以祠云。臣嘗讀睿皇帝所製廟碑。大要歸于厚民生。順民欲。明德遠矣。百餘年來。廟寢傾圮。神將弗妥。士女興嗟。聖母慈聖皇太后聞之。曰。吾甚重祠而敬祀。其一新之。然勿以煩有司。乃捐膏沐資若干緡。皇上祇順慈意。亦出帑儲若干緡。命司禮監太監馮保。擇內臣廉幹者董其役。工始于萬歷乙亥八月。迄周歲而落成。其殿寢門闕之右。廊廡庖湑之制。大都不易其故。而撓者隆之。毀者完之。聖者藻飾之。又于左右建鯨鼉樓。東爲監齋堂。規模瓌麗。迥異疇昔。巋然若青都紫極矣。旣告成事。上以聖母意。詔臣爲之記。臣聞聖王先成民。而後致力於神。亦有爲民而傲福於神者。故禦災捍患。祭法所載。何可忽諸。且聖人以神道設教。偕居東方。其德曰生。往牒所稱。觸石生雲。膏雨天下生也。冥運陰騭。赫如雷霆。使人弗罹于天憲。亦生也。君人者。恩則慶雲。威則迅雷。要歸于永底蒸民之生。而愚夫愚婦。刑賞所不及者。神實司其禍福之柄。蓋亦有陰翊皇度者焉。祀之非黷也。不寧惟是。臣仰闕聖母。垂恩儲祉。保護皇躬。將廣建功德。以祈萬年允祚。雖無文成秩。矧又祀典所載。而皇上孝奉慈闈。仰答元貺。雖節用之旨。時佩而有其舉之。莫敢廢也。今賴天地之靈。山川之佑。豐膺屢報。四夷咸賓。是禦災捍患。允符祀典。而睿皇帝所稱厚民生。順民欲者。實在茲矣。臣謹恭紀其事。而系之以辭。曰。瞻彼岱嶽。是爲天孫。乘震秉籙。生化之門。位鎮一隅。仁流八

極率士是臨。矧茲京國。京國有廟。肇禮百年。弗繕其故。何以告虔。惟皇祖清。肸蠭徵應。乃新神居。聿遵茲命。既拓其基。亦除其廡。琳宮中起。繚垣外周。厥宇峩峩。厥靈濯濯。誰謂邦畿。儼彼喬嶽。維嶽有神。維帝之德。后則基之神。介繁祉。篤我帝后。泰山之維。泰山之久。亦佑下民。自天降康。時雨而雨。時暘而暘。臣拜稽首。勒此貞石。億萬斯年。昭垂罔賴。

勅建慈壽寺碑文

寺在都門阜城關外八里許。先是我聖母慈聖宣文皇太后。常欲擇宇內名山靈勝。特建梵宇。爲穆考薦冥祉。皇上所允。遣使旁求。皆以地遠不便瞻禮。乃命司禮監太監馮保。卜關外地營之。出宮中供奉金若干兩。潞王公主。暨諸宮眷。助佐若干金。委太監楊輝等董其役。時以萬歷丙子春二月始事。以月日旣望告竣。而有司不知也。外爲山門天王殿。左右列鐘鼓樓。內爲永安壽塔。中爲延壽殿。後爲安寧閣。旁爲伽藍祖師大士地藏四殿。繚以畫廊百楹。禪堂方丈有三所。又賜園一區。莊田三十頃。食其衆。以老僧覺淳主之。中官王臣等典領焉。寺成。上聞而喜曰。我聖母齋心竭虔。懋建功德。其諸百靈崇護。萬年吉祥。恭惟我皇上。聖心嘉悅。因名之曰慈壽。而詔臣紀其事。臣惟佛氏之教。以毘盧檀那爲體。以宏施普濟爲用。本其要歸。惟于一心。心之爲域。無有分界。無有際量。其所作功德。亦不住於有相。不可思議。故曰洗劫有盡。而此心無盡。恆河沙有量。而此心無量。至於標宮建刹。崇奉頂禮。特象教爲然。以植人天之勝。因屬羣生之瞻仰。則固未嘗廢焉。惟我皇上。覺性圓明。妙契宿證。蓋自踐祚以來。所以維持之者。惓惓焉約已厚下。敬天勤民爲訓。至如梁胡良河以資利濟。減織造以寬杼柚。蠲積逋以拯民窮。慎審決以重民命。其一念

好生之心。恆欲舉一世而躋之仁壽。故六七年間。海宇蒼生。餐和飲澤。陶沐元化。無小無大。咸稽首仰祝我聖母億萬年。保我聖主。與天無極。此之功德。寧可以算數計哉。猶且資佛力以拔迷途。標化城以崇皈仰。要使苦海諸有。悉度無漏之舟。闔浮衆生。咸證菩提之果。斯又聖人所以神道設教。微意也。臣謹拜手稽首。恭紀日月。而系之詞曰。於昭我皇。秉乾建極。薄海內外。罔不承式。誰其佑之。亦有文母。覃鬯皇風。紹休三五。永惟穆考。神御在天。思廣勝因。以植福田。我皇承之。樂施靡惜。永延皇圖。冥資佛力。乃營寶刹。於兌之方。左瞰都城。右眺崇岡。力出於民。財出於府。費雖孔殷。民不與苦。厥制伊何。有殿有堂。丹題雕楹。玉甃金相。繚以周廊。倚以飛闥。畫棟垂星。綺疏納月。有湧者塔。厥高入雲。泉彼不周。柱乾維坤。維大慈尊。先民有覺。普度恆沙。同歸極樂。譬如我皇。博施羣生。千萬億國。小大畢寧。惠路旁流。慈雲廣庇。如是功德。不可思議。民庶咸祝。天子萬年。奉我聖母。慈禧永安。臣庸作銘。勒茲貞石。志孝與仁。與天無極。

### 勅建萬壽寺碑文

初禁垣艮隅。有番漢二經廠。其來久矣。莊皇帝嘗詔重修。以祝釐延貺。厥功未就。今上踐祚之五年。聖母慈聖宣文皇太后。諭上若曰。剏一寺以藏經焚修。成先帝遺意。上若曰。朕時佩節用之訓。事非益民者弗舉。惟是皇考祈祐之地。又重之以聖母追念薦福慈意。然不可以煩有司。乃出帑儲若干緡。潞王公主暨諸宮御中貴。亦佐若干緡。命司禮監太監馮保等。卜地于西直門外七里許。廣源闡之西。特建梵刹。爲尊藏漢經香火院。中爲大延壽殿五楹。旁列羅漢殿各九楹。前爲鐘鼓樓。天王殿。後爲藏經閣。高廣如殿。左右爲韋馱達摩殿。各三楹。修簷交屬。方丈庖福具列。又後爲石山。山之上爲觀音像。下爲禪堂。文殊普賢。

殿山前爲池三。後爲亭池各一。最後果園一頃。標以雜樹。琪株璿果。旁啓外環。以護寺地。四頃有奇。法輪妙啓。龍像莊嚴。丹堊藻繪。爭輝競爽。工始于萬歷五年三月。竣于明年六月。以內臣張進等主寺事。上賜之名曰萬壽。而詔臣爲之記。臣聞古之聖王。建皇極以臨區宇。斂時五福。其一曰壽。而臣子祝頌其君。亦曰報以介福。萬壽無疆。曰於萬斯年。受天之祐。是人君以德致福。無先于壽。而爲之臣民者。思以仰酬洪造。發紆忱悃。舍頌祝之外。蓋亦無以也。我皇上聰明天啓。圖治妙齡。恢皇綱。接帝統。廣至治于無疆。錫嘉祉於羣臣百姓者。不啻淪肌而浹髓矣。薄海內外。日所出入。含生之倫。莫不翹首延睇。仰而頌曰。天子作民父母。爲天下王。其庶幾萬年有國。以福我蒸黎乎。夫林茂而鳥悅。淵深而魚樂。魚鳥之情。何期於林淵哉。所寄在焉。故凡億兆之命。懸於一人。天子明聖。則生人禔福。故億兆之情。莫不願人主之壽者。斯亦魚鳥之願。歸于茂林深淵也。然則茲宇之建設。雖役民生之力。用天下之財。而可以祝聖母萬壽者。臣民猶將樂趨焉。況役不民勞。費不公取。用以保國。又民功德無量。爲臣子者。其踴躍而讚頌之。詎能已耶。謹拜手稽首。恭紀其事。而系之以詞曰。惟君建極。斂福錫民。民有疾苦。如在其身。巍巍大雄。轉輪宏教。毘盧光明。大千仰照。佛力浩衍。君亦如然。其以悲智。濟彼顛連。琅函貝葉。藏之天府。以翊皇度。自我列祖。沿及我皇。紹成先緒。表此勝因。共躋極樂。祇奉慈命。復軫民瘼。毋煩將作。乃發帑儲。鳩工庀財。龍宮蔚起。鸞域宏開。翼翼峩峩。有截其所。仰俾神造。俯瞰淨土。凡斯鉅麗。前武之繩。聿追來孝。旋觀厥成。景命有僕。永錫純嘏。既相烈考。亦佑文母。保茲天子。億萬斯年。本支百世。蟄蟄綿綿。

昔阿育王獲佛舍利三十餘顆。各建塔藏之。散布華夷。今五臺靈鷲山塔是其一也。我聖母慈聖宣文皇太后。前欲翺寺於此。爲穆考薦福。今上祈儲以道遠中止。遂于都城建慈壽寺以當之。臣居正業已奉勅爲之記。顧我聖母至情精虔。不忘始願。復遣尙衣監太監范某李友輩捐供奉餘資。往事莊嚴。前爲山門天王殿鐘鼓樓。又內大雄寶殿。旁伽藍殿。外爲十方院。延壽殿。諸圍廊齋舍。庖福罔不悉備。復賜園地。以供常住之需。工始年月日。成于年月日。計費金錢若干緡。聖母復命臣記之。臣竊惟聖人之治天下。齊一幽明。兼綜道法。其燦然者。在先古帝王。垂成憲著章程于世矣。乃有不言而信。不令而行。以慈陰妙雲。覆湮滌海。饒益羣生。則大雄氏其人也。其教以空爲宗。以慈爲用。以一性圓明。空不空爲如來藏。卽其說不可知。然以神力總持法界。勞漉沈淪。闡幽理。資明功。亦神道設教者所不廢也。我聖母誕育皇上。爲億兆主。養成聖德。澤洽宇內。施及方外。日所出入。靡不懷服。至如寧靜以奠坤維。建梁以拯墊溺。儉素以式闡帷慈。惠以布恩德。含生之倫。有陰蒙其利而不知者。所種孰非福田。所證孰非菩提者。乃益建勝因。廣資冥福。託象教以誘俗。乘般若以導迷。斯可謂獨持慈寶。默運化機者矣。先是虜酋俺答。款關效貢。請于海西建寺。延僧奉佛。上可之。賜名曰仰華。至是聞聖母作五臺寺。又欲令其衆赴山進香。夫醜虜嗜殺。乃其天性。一旦革彼凶慝。懷我好音。臣以是益信佛氏之教。有以陰翊皇度。而我聖母慈光所燭。無遠弗被。其功德廣大。雖盡恆河沙數。不足以喻其萬分也。乃拜手稽首。庸記歲月。而繫之以詞曰。於維慈氏。闡教金庚。以般若智。濟度羣生。普天率土。莫非化城。法雲慧日。布濩流行。雁門之西。亦有靈鷲。七級浮屠。巋然特秀。阿育獲寶。散布緇流。南飛一粒。永鎮神州。塵劫幾更。山川不改。重建妙因。機如有待。惟我聖母。天性慈

仁。總持陰教。覆育蒸民。莊嚴寶刹。於茲靈壤。龍宮巍巍。人天共仰。皇穹眷德。降福穰穰。既佑文母。亦佑我皇。定命孔固。寢隆寢昌。臣庸作頌。億載垂光。

特進光祿大夫柱國太師兼太子太師成國公追封定襄王諡恭靖朱公神道碑

今制異姓不王。惟元功佐命有大勳勞於國者。歿乃得追封焉。明興以來。朱氏王者三人。東平從文皇帝靖難。用決策力戰。封平陰。死土木之難。今定襄。又以忠勞。受知三聖。得賜封如其祖。夫朱氏之先。豈亦古神明之胄耶。何其歷世之遠。寢隆寢昌也。初。世宗肅皇帝南幸承天。道衛輝。行宮夜火。侍衛倉卒。不知駕所在。獨王與陸都督炳。翊上以出。世宗常言。諸從我於難者。功當與開靖等。頃余侍今上於便殿。會有司奏王卹典。引令甲。非軍功不王。上獨顧余言。希忠者。事皇祖。有扈蹕功。皇祖遇之甚厚。朕今推皇祖意。王之不爲踰制。遂定封爲定襄王。諡恭靖。孝哉。冲聖。乃能追念先德。不忘逮其所親信故臣也。定襄王者。諱希忠。字貞卿。其先鳳陽懷遠人。七世祖亮。從高皇帝起義。以功授燕山中護衛。正千戶。六世祖肇。封成國。追封東平武烈王。能。五世祖平陰武愍王勇。曾祖太師莊簡公儀祖。太傅恭僖公輔義。考太傅榮康公鳳母成國夫人陳氏。王生而警敏。絕人。稍長。通尚書周易。兼涉韜鈴。有文武智略。嘉靖丙申。襲封成國公。年甫二十二。初拜表謝恩。世宗望見王。丰度秀整。獨偉視之。自是遂被恩顧。承天水。奉命告祭顯陵。戊戌。上皇天泰號。充捧册表進使。禮成。加太子太傅。世宗將有事顯陵。召王與勳輔諸臣於慈寧宮幕次。及文華殿南城。議南幸。并册立東宮事。日見親信。己亥正月。世宗御啓祥宮。召諸大臣見皇太子。特命王扶掖皇太子以行。因指示皇太子曰。此汝將來師保也。二月。使持節册封穆宗爲裕王。聖駕南巡。佩都扈副將軍。



印掌行在左府事。至衛輝。以身衛上。出於火。渡河。侍御舟。賜詩命和。王操筆立成。上謂輔臣曰。勳裔中。如此人才絕少。稱善者久之。是歲秋。充神機營總兵官。庚子。提督團營。及五軍營。王堅明約束。拊循將士。軍整以和。壬寅夏。掌五軍都督府事。督營如故。秋。加太保。丙午。加特進榮祿大夫。庚戌。加特進光祿大夫。柱國。九月。虜穿塞。直薄近郊。王部署諸將卒。晝夜捍禦。虜知有備。遁去。解嚴。加兼太子太師。壬子春。穆宗加冠。持節掌冠。癸丑。改掌後府事。壬戌。加太師。王力辭不獲。乃拜命。穆宗踐祚。奉勅監修世宗實錄。知經筵事。戊辰。持節册立。今上爲皇太子。是歲夏。以疾請解府事。優詔不許。再請。乃許之。壬申春。今上加冠。持節掌冠。六月上。嗣登大寶。復勅監修穆宗實錄。知經筵事。上眷倚方隆。而王以疾不起。時九月三十日也。王歷事三朝。中間代祀圓丘三十有九。方澤二十有七。他中祀尤衆。主進士恩榮宴者十。先後蒙被恩澤。賜泛舟太液。賜肩輿。賜祕書。賜禁中乘馬。廕子爲錦衣者三。加歲祿至七百石。諸衣帶金幣器物。人口之資。不可勝紀。其卒也。上震悼。爲王輟朝。一切賻祭營葬。皆視舊制有加。至特進。封王爵。尤爲異數云。王器宇凝重。至性夙成。始弱冠。卽受知世宗恩寵。舉無與比。然以是益斤斤勤恪。每奉命攝祀。必端肅薰沐。致其精潔。臨祭。登降周旋。咸中準度。儼直西內。夙夜在公。不敢言私。世宗在位久。以威嚴馭下。雖素所親任。輔舊。往往被遣斥。惟王以忠慎自結于上。無少替。世宗嘗稱之曰。恪恭敬慎。曰忠謹勤誠。又曰。卿可謂爲臣。允忠。故獨被隆眷三十年。無絲髮不當。上意指者。逮事穆宗。及今上。以三朝勳碩。百辟具瞻。而小心翼翼。始終一節。進止殿陛。皆有常度。不失尺寸。事父榮康公。冠帶侍養。立終日。不敬仄。母陳太夫人病亟。王方直西內。不敢歸。憂形於色。世宗見而異之。以問輔臣。具以實對。乃諭令歸視母病。無何。陳夫人卒。王哀毀。

骨立與其弟左都督掌錦衣衛事太保公希孝友愛篤至朝夕過從怡怡如也撫庶弟希慎無殊同胞與士大夫處貴而能降久而彌敬飲酒至數斗千雖大醉終不失一語諳于國家典故而口呐呐若無所知每廷議大事常遜居後不敢發論或稱引片言咸中肯綮世宗晚年諸大典禮卽輔臣有不及知者常命問王以王少在左右明習故事也然不問亦終不言其周慎如此余嘗以爲王兄弟孝謹如石慶石建而才略過之其重厚可屬大事如張安世而文雅風議安世遠不及也桃李不言下自成蹊王生平篤厚謹飭未嘗自表異希稱譽而士大夫咸傾慕之唯天子以爲國器歿之日弔客皆爲掩涕嗟乎非其中心誠信孚於人烏能得此乎王生正德丙子八月二十三日享年五十有八配張夫人前中府都督女早卒遂不再娶子男一時泰後府都督僉事管錦衣衛南鎮撫司事娶陸氏武惠公炳女孫男四長應楨聘恭順侯吳公繼爵女次應槐次應桂孫女二太保公將以十二月奉王葬于北澤山賜地與張夫人合乃奉其狀詣余而泣請隧道之銘余與王兄弟相善諗其素履皆如狀所云不虛乃爲之銘曰黃河若帶泰山若礪誓固云然疇克永世桓桓東平濟德彌昌六葉而生實維定襄猗王挺生萬夫之望敦悅詩書淵謨亦壯弱冠分符寅戴肅祖入參帷幄出總翰虎於赫肅祖恩威靡恆終始惟王腹心股肱帝昔南狩王屬都護身翊宸躬以康天步虜闖郊原王典戎兵振我常武以衛神京秉珪攝事於郊於社夙夜敬恭以迓純嘏光佐三朝總領班行天球在序瑞羽高翔胡不耆耄大星宵墜帝曰吁哉厥有勞勩封以大邦錫之休命絲綸孔爍初終克令昔王先人寶善於躬名其二子曰孝與忠惟王與弟金昆玉季不紹先猷引繩勿替我銘其功以勒景鐘千秋萬禩與明無窮

特進光祿大夫柱國太保兼太子太傅掌錦衣衛事後軍都督府左都督贈太傅諡忠僖朱公神道碑

錦衣領禁旅。直宿衛。又理詔獄。察舉不法。實兼古司隸金吾之職。嘉靖間。肅皇帝以威嚴馭下。大獄數起。羣言事忤旨。輒逮繫錦衣訊治。或杖之於廷。有立斃者。而當事亦以鷲擊爲能。偵伺校卒。猛若乳虎。一旦不如意。所夷滅不可勝道。京師爲之重足。自太保朱公視衛篆。代猛以寬。罷遣諸陰鷲校卒。一切務從長厚。於是廷杖者咸得不死。而京師之人。皆始帖席。今上踐祚之元年。有賊挾刃至宮門。驚蹕。捕得。下東廠治。賊冀緩死。妄言有主者。於是內外錯愕。索賊甚急。然余心知其誣。乃見上言斯事重。請令錦衣衛與東廠雜治之。上曰。可。公旣受命。卽獨宿外舍。燕居深念。多設方略。密偵之。如是十餘日。乃得其情。趣具獄。上戮止一人。餘無所問。當是時。微公縉紳禍且不測。其所存活。不啻數百千人矣。夫韓厥存趙。慶流子孫。王氏以百口保符彥卿。世食其報。以公之德如此。而年不踰中壽。祿不逮子嗣。何哉。昔人謂天道是耶非耶。余竊悲其志。爲之敍其行事。俾後世有稱焉。公諱希孝。字純卿。鳳陽懷遠人。自其先祖燕山中護衛東平武烈王能。以文皇帝佐命元勳。始封成國公。平陰武愨王勇。死事。土木傳莊簡公儀。恭僖公輔。及父榮康公鳳。兄定襄恭靖王希忠。族滋大。定襄與公皆陳夫人出。公以嘉靖甲午。授錦衣勳衛。時年十七。事世宗肅皇帝。見稱謹敏。戊戌。皇穹宇大廟成。以恩授都指揮使。掌衛事。甲寅。陞都督同知。奉勅提督緝捕。尋轉右丁巳。轉左。戊午。累功加太子太保。特進光祿大夫柱國。召入內直。壬戌。加少保。癸亥。加太保。甲子。賜肩輿。莊皇帝立。加兼太子太傅。今上在東宮。總理侍衛。及登極。加歲祿三十六石。廕一子錦衣百戶。最先後

磨子爲錦衣者七。賜歲祿至百石。金幣蟒衣寶鈔書籍牲醪之類。不可勝紀。公歷事三朝。終始一節。當肅皇帝時。定襄以上公陪國議。而公內領羽林。仗飛之士。周廬宿衛。外持節刺舉不法。兄弟貴寵。於羣臣無兩。然公忠信謙慤。恂恂如也。其家事治言。於國無隱情。稱于士大夫無異詞。上或密問邊漕事。公手自裁對。無不當意指。而終不泄上一語。故以肅皇帝之雄察。卽親信勳戚。罕能保終者。唯公兄弟事之順焉。終身未嘗一被譴責。今上以公先朝耆舊禮之尤厚。卒之日。爲之悼惜者久之。輟朝賜棺斂。命有司治塋兆。諭祭有加。贈太傅。諡忠僖。公卿以下。咸奔走弔唁。宿衛士有痛哭失聲者。其忠情誠信。孚於上下如此。奉事榮康公及陳太夫人。能以色養。病則籲天求代。與定襄友愛篤至。定襄薨。哭之晝夜不絕聲。以是疾不起。撫其庶弟金吾君希慎如同胞。又好拯人之難。卹人之急。死弗棺者。幣弗掩者。登山而呼庚癸者。捐貲濟之。不少吝。起家將種。素嫻輶鈴。明習國家故事。而居常悛悛。言若不出口。其敬禮士大夫。造請延接。久而彌篤。好讀書。所購古圖篆名筆甚富。亦有精鑒。能辨真贋。及他細行。可稱述者。尤衆。不具論。論其大者如此。余嘗謂公兄弟。重厚可屬大事。如張安世。而文雅過之。孝謹如石建。石慶。而才略則二石遠不及也。論者以爲知言。公生正德戊寅。卒以萬曆甲戌。年五十有七。配湯氏。靈璧侯女。封一品夫人。後公數月亦卒。長子時豐。早夭。立姪孫應梅嗣。以廕授錦衣衛指揮同知。聘武清伯李公偉孫女。其弟金吾君。以年月日奉公與湯夫人合葬于鞏梓莊之新阡。持都督余君蔭狀。詣余請隧道之銘。余雅善公。具知生平。乃敘事而系之以詞。曰。東平靖難。平陰死忠。爰及定襄。世奏膚公。赫赫太傅。二難並美。咸以一德。媚於天子。入參帷幄。出領押衛。邦之司直。王之爪牙。曰有疏附。曰有禦侮。公實兼之。腹心肱股。歷事三朝。擁佑勛勤。惟

忠惟恪守宗祊高而不危滿而不有聞命則俯循牆而走國之所重喬木世臣矧有令德宜于民人胡天降割老成凋謝定襄既逝公亦捐舍承帝曰嗟予懋乃勳錫之崇典賁于幽闔元宮楚楚終焉安處九原可作惟公歸與



# 明張文忠公全集

## 文集五

光祿大夫柱國少傅兼太子太傅吏部尚書建極殿大學士贈太保諡文簡豫所呂公墓誌銘

萬歷庚辰元日。豫所呂公卒於家。計聞上輟朝一日。詔所司議卹典。諭祭十有一壇。遣官營葬。贈太保。諡文簡。廕一子中書舍人。諸視常數有加。而公之子祠部興周。遣人持吳大參國倫所爲狀。來請余志公墓而銘焉。按諡法。平易不訾曰簡。一德不懈亦曰簡。余與公同政府。知公深。公爲人。外溫而心辨。中毅而貌和。於事。訥訥不輕爲可否。於人。恂恂不苟爲異同。嘗曰。大臣協心體國。苟利社稷。嫌怨共之。安事羯羠其間。無論彼己。僕伎。卽賢者各是所見。政本之地。斷斷而爭。如國體何。世儒嚶嚶。猥小曹參而卑丙吉。然則虞廷云。寅恭者非邪。自余柄政。與公共事者六年。內奉冲聖。勤緝熙。外贊密勿。定計畫。莫逆於心。莫違於口。六年如一日也。蓋誠所謂不懈者。斯可以爲簡也已。上嘗手書賜公曰。樞機克慎。曰同心夾輔。知臣莫如主。信哉。按狀。公姓呂。名調陽。字和卿。別號豫所。西粵桂林人也。其先楚興國之大冶人。洪武初。從軍戍天長。後踐更。桂林曰鑑者。始卽家桂林。是爲公會祖。鑑生綱。綱生璋。呂氏文學自綱始。世爲郡諸生。而璋以貢爲徐聞令。徐聞人尸祝之。璋二子。長應陽蚤卒。次卽公正德丙子中春。母張夫人夢巨蟒入室。紫光煜煜。寤而生公。公生十九年。爲嘉靖甲午。舉於鄉。庚戌。賜及第。第二人授翰林院編修。癸亥。遷國子司業。乙丑。擢春坊諭德。隆慶改元。遷南京國子祭酒。尋改國子祭酒。是冬。擢南京禮部侍郎。戊辰。改禮部。

侍莊皇帝講讀。踰年改吏部。尋以吏部左侍郎兼翰林學士掌詹事府事。壬申上初卽位。拜禮部尙書。頃之上問余孰可與卿同事者。余以公對。上在東宮亦雅知公端慎。遂召爲文淵閣大學士。與機務踰年。進太子太保。甲戌修穆廟實錄成。加少保。直武英殿尙書如故。丙子一品秩滿。進少傅。兼太子太傅。吏部尙書。直建極殿。公先後歷官垂三十年。半守史局。三任成均。四歷鄉貳。春坊典內制。詹府教習庶吉士。少宗伯。日侍講讀。凡總修嘉隆實錄者再。分校丙辰。副辛未。典甲戌會試考者三。所事成稱。在禮部釐正典章。自宗藩外戚中常侍不得踰制。有所希請。諸曹郎吏廩廩奉職。由大宗伯入內閣。若大喪若大婚若崇親薦號若降夷受俘。諸鉅儀曠事。咸藉公相成。以當上心。上優禮公。稱先生不名。數命分獻郊廟。釋奠先師。時遣中官給賜上尊珍膳。兼金文綺乘馬什器之屬。不可勝計。多自昔輔臣所未嘗蒙。公故病肺。又患足痿。顧念恩厚。未忍言去。久之益劇。戊寅秋。乃疏乞骸骨。上固不許。諭留甚溫。疏十上始得請。賜帑金文綺。乘傳歸。仍遣御醫視疾。行人護行。聽其子興周以祠部扶侍公於家居。一歲疾良已。會歲暮。公晨對客。食飲如常。日中忽不語。越三日元旦。自起櫛沐。端坐卒。年六十有四。公沈密簡重。人莫窺其際。嘗游國學。從祭酒永康程先生談名理。後公爲祭酒。遂以永康學教授諸生。先德而後藝。以其身爲型範。爲詩若文。古雅醕厚。不事摹擬。性尤澹泊。雖蟒玉未嘗去澣衣。門無私謁。所樹惟恐見知。所急惟恐見德。頃平古田及懷遠府江當事者。皆從公受策。然公不自言人。故無所藉以頌公。公先娶朱夫人。一歲卒。繼張夫人。名家子。能以賢孝佐公。初第時。將父母邸中。躬暨張奉匕。箸上食惟謹。夜中其父母咸中煤毒。公從夢中心動。若有促之起者。卽與張夫人起視。則父母俱僵臥不能言。急汲水沃之。乃甦。人以爲孝感。久之以編修滿。



封父母如其官。奉之歸。蓋封四年而奔父喪。及禫。又喪母。哀瘁骨立。後以少保總裁實錄成。贈曾大父。大父。皆如公官。妣皆一品夫人。配張。累封一品夫人。少傅滿。廕一子中書舍人。先是南都會恩。廕一子入監讀書。及卹廕。凡三。而公四子。長興周。既舉進士。爲祠部。次興齊。又以公歸之明年。舉於鄉。次興文。興武。振振濟美。世且滋大。周娶湖廣參議宋廷表女。齊娶太僕丞秦致恭女。文聘封川令陶景女。武聘興國吳參政國倫女。女四。少者未字。壻舉人毛如綸。諸生蕭如蒞。常任孫一。嗣簡。聘延郡丞屠炳言女。公雖籍桂林。數往來道興國。省族展墓。比其歸也。視所治新第。徘徊不能去。又新媾於興國。語吳大參曰。吾先君命諸孫名皆從興。以示不忘故鄉。明年。吾其以家來。菟裘於斯矣。會公卒。不果。公質行多長厚。余獨心服。其在政府。斷斷乎有古大臣之風焉。銘曰。稽古盛際。同寅協恭。百僚師師。以治時雍。譬伯與仲。響和景從。誠一無他。深厚有容。在漢丙吉。今也則公。主少不疑。仰德乃風。內寧外謐。波恬漠空。吏稱民安。時熙歲豐。守和自近。孰知其功。我銘貞石。以著樸忠。

光祿大夫柱國少師兼太子太師吏部尙書贈太保諡襄毅楊公墓誌銘

晉地表裏山河。其人瓌瑋多大節。能以功名自顯。往古無論。自余登朝。則見故少師太宰楊公。心竊嚮慕之。公亦與余爲忘年之契。公在本兵久。又徧歷諸鎮。躬履戎行。練習邊事。余每從公問。今中國所以制禦夷狄之策。及九塞險易。將士能否。公悉爲余道。所以如指諸掌。故自余在政府。所措畫邊事。蓋得之公爲多。今上登極。首命公還秉銓衡。余受先帝遺託。方欲與公同心戮力。共佐休明。而公已矣。嗟乎。天不慙遺一老。用輔英主。惜哉。然其生平所建立。咸足以方駕往昔。炳耀後禩。余知之素深。謹識其大者。用垂不朽。

公諱博。字維約。別號虞坡。幼穎敏。讀書能五行俱下。十七舉於鄉。弱冠登進士。授陝西整廬令。調長安。用治行第一。徵爲兵部武庫司主事。陞郎中。會肅皇帝南狩。承天起閣。學翟文懿公爲行邊使。以公參幕府。起遼左。至甘肅。行萬餘里。所至輒有疏記。悉得其肯綮。至肅州。屬番數百人。遮道邀賞。文懿欲勿予。不能予之。恐來者益衆。無以應之。公請文懿坐堂上。嚴儀衛。跪諸番轅門外。數之曰。相公奉詔勞軍。若等宜傾巢遠迓。乃泄泄若此。何也。諸番咸懾服。莫敢仰視。久乃釋之。稍賚其先至者。諸夷落聞之。方懼。以後至見讓。莫敢復來。文懿以公爲敏。入朝。薦公才堪大任。嘉靖辛丑壬寅。虜數入宣大山西。公爲職方郎中。羽檄旁午。應機立斷。其所規畫。靡不當。上意指安南不庭。廟議發兵討之。公請先之以文告。會安南請降。公謂小醜不足煩王師。宜許以自新。因上便宜六事。肅皇帝用其策。交人遂款服。至今已從職方。出爲山東督學。憲副陞參政。丙午。以僉都御史。巡撫甘肅。初。罕東諸屬番。畏土魯番侵擾。避居肅州境上。久之。其衆滋繁。邊人患之。公召諸番酋。犒以牛酒。因語之曰。若輩久羈於此。旣不能歸。胡不爲久遠計。諸酋曰。爲計奈何。公曰。此去某處。水草甘美。吾爲若築城堡。作渠壩。給耕具。使若等定居。長爲藩蔽。如何。諸酋咸頓首曰。幸甚。公乃築白城威虜金塔等七城。稍給與牛具器用。諸酋率其部落數千人。徙居之。離塞遠者。四五百里。河西益少邊患。乃鑿龍首等渠。墾田萬餘頃。又請以巡按御史兼督學政。如遼東例。富而教之。肅州遂爲重鎮。虜畏不敢近塞。間一入盜。將士奮擊。斬首百四十餘級。上賜璽書加獎。晉副都御史。庚戌。丁母憂。西人擁道泣送。車不能行。是歲。虜大入薊。薄都城。癸丑。起公兵部侍郎。經略薊鎮。築潮河川墩。以遏虜衝。簡將士。汰冗弱。軍聲大振。事竣。詔遂留督薊遼保定軍務。無何。虜復寇古北口。號二十萬。連營百餘里。公

擐甲登陣。督諸軍禦之。桀石藜射。所殺傷甚衆。一虜先登。及雉。我軍斫其腕墮。虜氣沮。乃退。公募死士。持火器。夜襲其營。一夕四五驚。虜衆宵遁。捷聞。賜豸緋衣一襲。晉右都御史。廕一子錦衣衛百戶。明年虜以萬騎入馬蘭谷。公督兵擊走之。幾獲其酋。打來孫。公在薊二年。虜再犯。俱不得利去。乙卯。入爲兵部尙書。尋加太子少保。丙辰。丁父憂。戊午。詔還本兵。時尙未終禫。會虜圍大同。右衛急。公倉卒奉詔。率師援之。累縋而往。虜聞。公出關。曰。楊少保至矣。遂遁。右衛圍解。詔晉公太子太保。兼左副都御史。暫留經畫。大同事。築牛心等墩堡二千八百餘座。濬濠塹三十里。五十日而畢。會虜入薊鎮。督臣被收。又移公鎮薊。公至。虜遁。乃召公還理部事。加少保。癸亥。虜復寇薊。督臣易之。不爲備。虜穿塞入。至通州。烽火通於甘泉。日夜圖上。守禦方略。虜尋引去。上怒而誅督臣。乙丑。以一品再考。廕一子國子生。丙寅。改吏部尙書。肅皇上賓。穆宗踐祚。請錄忠諫。舉遺佚。蠲逋肆赦。海內大悅。丁卯。一品三考。加少傅。兼太子太傅。再廕一子國子生。公疏辭恩廕。三請乃許。其在銓衡。所建論甚衆。大率以錄舊德。抑浮薄。課功能。禁競趨爲務。以故遊談之士。頗不便之。左右侍臣亦不悅。公遂爲所媿。謝政歸。久之。上寤。乃起公。以冢宰理本兵事。萬歷改元。詔公還吏部。以一品四考。晉少師。兼太子太師。仍廕一子國子生。所賜賚甚厚。癸酉。奉命分獻夕月壇。疾作。扶歸。遂懇乞骸骨。給傳歸。數月而卒。上震悼。爲輟朝一日。賜祭葬。贈太保。諡襄毅。廕一子爲中書舍人。蓋公生平行履。其大者如此。他固不能悉記也。余嘗謂世有大人。有偉人。其志翩翩。其行巖巖。其處於世也。卓然如秋峰之聳峙。昂然如雞羣之野鶴。偉人也。其志淵淵。其行桓桓。其處於世也。巍然如泰華之蟠礴。浩然如滄溟之含納。大人也。二人者。語其才美標格。則大人似不若偉人之奇儁。要以閱深奧衍。不言而信。不

怒而威。使人望而歸之。世以爲衆父。爲善龜。則大人之與偉人。大有逕庭矣。余觀公在朝廷。則朝廷重。在邊鄙。則邊鄙重。國有大政。議者盈庭。或日中不決。公纔出數語。衆已稱善。排大難。批大節。應手而釋。恢恢尙有餘力。九邊之士。聞公來。如見父母。驩躍鼓舞。白刃在前。不驅而赴。嘉靖中。疆場多故。肅皇帝以威斷馭下。本兵督臣大者誅。小者斥。未嘗終三歲不更置也。惟公以敏練稱上意。眷遇之隆。始終弗替。在甘肅時。嘗疏發威寧侯仇鸞之姦。鸞被收下獄。後更貴。幸爲大將軍用事。銜公甚愛。值分宜當國。縱其子干政。頤指百官。公在本兵。數以事見忤。相與排根中之者屢矣。而竟不得閒。其後威寧誅。分宜敗。而公望愈重。隆萬之間。老成彫謝。唯公巋然如魯靈光。爲海內所倚。此其望實器業有越在風格之外者矣。嗟乎。非大人而能若是乎。公所著有虞坡文集。詩集。雜著。歷官奏議。行於世。生正德己巳月日。卒萬歷甲戌月日。壽六十六。其先宏農華陰族也。國初有善甫者。徙蒲。遂爲蒲人。曾祖謹。祖選。父瞻。四川按察司僉事。皆以公貴。贈如其官。曾祖妣張。祖妣趙。妣田。皆贈一品夫人。配段氏。累封一品夫人。諸子皆才賢。段夫人生俊民。嘉靖壬戌進士。太僕少卿。俊士。萬歷甲戌進士。鳳翔府推官。俊彥。官生。俊卿。隆慶武舉第一人。管錦衣衛事。指揮使。女三。長適州學生景宣。次適舉人馮淪。次適嵩縣守備孫仲全。側室賀氏。何氏。賀生子俊臣。官生。何生。女一。孫男七。元禎。元祥。元祉。元禕。元祺。元祐。孫女十四人。太僕兄弟。將以年月日葬。公王莊之原。勅建塋次。持閣學張公狀。屬余爲之銘。曰。世有大人。龍德正中。吾聞其語。今見于公。維公之德。智圓行方。忠不近名。言不泥常。李郭無文。韓范無武。公也兼之。吉甫召虎。九牛在肆。良庖趙起。公徐礫之遊刃。有餘。大棟將傾。見者懷懼。公徐正之。退無德色。桓桓世廟。緯武經文。公媚天子。者定策勳。穆穆莊皇。垂衣

拱手公佐太平。聲色不有。迨於今皇。兩作繼明。詢茲黃髮。還公宰衡。我求一德。惟公是與。不弔昊天。奪我心侶。有謀孰諮。有難孰夷。山頽木壞。愴矣其悲。惟帝念功。榮稱顯錫。光光天寵。賁此元室。不亡者壽。不朽者名。百世之下。眎此刻銘。

中憲大夫都察院右僉都御史霽寰吳公墓誌銘

隆慶己巳二月廿日。都御史孝豐吳公。以病卒於家。先數月。今天子詔廷臣。舉海內諸遺佚。故臣可大用者。議者咸欲以公應詔。會公卒。不克薦。祠部乃疏其巡撫貴州勦賊功。得賜諡祭。遣使臨視塋兆。恩卹甚渥。然不及公生時錄用。俾費志以歿。惜哉。按狀。吳氏之先。淮海人也。宋南渡。徙孝豐。明興。代有聞人。至吏部公松。家大顯。松二子。長曰麟。由御史歷山東憲副。次曰龍。由吏部郎中歷參政。公憲副子也。母方氏。封恭人。公方在娠。其大母張宜人。夢神女遺之子。曰以爲而孫。至大期。又夢庭中柱石。千仞屬天。憲副公亦夢舍後山。高出雲端。巖巖嶽立。及生。遂名之曰維嶽。長字峻伯。別號霽寰。公少秀穎絕倫。十歲能屬文。弱冠舉浙江丁酉鄉試。第五人。明年登進士。授江陰令。會崇明賊起。邑與鄰壤。故無城郭。民大恐。公設備甚嚴。賊不敢犯。居三年。用廉能徵入。爲尙書郎。主比部奏牘。奉詔詳定問刑條例。稱旨。著爲憲令。丁未。同考會試。庚戌。虜穿塞。直犯郊圻。先帝怒。收兵部尙書下吏。趣具獄。將誅之。公從容言。尙書無大罪。擬從末減。上不從。竟誅尙書。當是時。廷中皆稱吳郎長者也。慮囚江西。所平反萬五百餘人。其尤著者。徐滾。以母故。擊殺發冢之人。劉福德。以義殺里中不孝子。皆抵死。公特原之。人服其允事竣。居大父母喪三年。起補駕部郎中。尋以按察副使。督山東學校。修秩祀。表節行。飭三氏子孫。奉約束。以風齊魯諸生。每試諸生。差

第其文畢。卽按籍察舉素無行者。褫其衣巾。笞斥之。卽以文在高等。亦不貸。齊魯之士。蒸蒸向風焉。遷湖廣參政。江西按察使。拜僉都御史。巡撫貴州。兼制湖北川東道。數上書言便宜事。詔皆如議。士酋楊珂與其叔雄進有郤。兵連數十歲不解。公使人諭珂自縛。待以不死。珂頓首伏罪。事聞。賜白金文綺。遂移兵誅王世麒於清浪。捕宋廷武於草塘。俘王阿利於平伐。諸夷畏服。境內以平。會有尙書言貴州撫臣嚴急好興事。不可以治夷者。得旨改南。而公先有仲弟之喪。居常邑。遂謝病歸。歸五年而卒。公自少雖以文雄於時。而明練吏事。嫻於當時之務。故所至有聲。事事精辦。然性高簡。不能當世取容。頗爲庸衆人所嫉。屢致顛阻。初舉進士。射策大廷。忌者匿其卷。不得進。抑居下列。在江陰。御史行縣。謁孔廟。故事。令以下皆蒲伏道。候御史車過。乃起。公獨立俟橋門外。御史深嘆之。始爲郎。太宰熊公知其賢。欲薦補銓部。屬以不往謁執政。議格不行。督學山東三年。一字不交於當路。巡撫貴州。有使者出。所部左右言使者貴人。遇之宜有加。公不從。延接而已。使者以爲憾。其被謗頗亦繇是。然公不以寡偶之故。易其所操。謝病山中。讀書談道。不復求用於世。病且革。循戒其子弟曰。某子甲所饋朱衣。毋以斂。其勵節守義。終身不變如此。蓋嘉靖之季。天下言風節者。稱浙中吳公云。公生以正德甲戌六月四日。卒纔五十有六。初娶長興臧氏。封安人。贈恭人。生子稼。端邑學生。娶歸安陸侍郎女。女三。長適華亭國子生馮繼可。次適烏程國子生嚴應桂。次適錢塘郡學生茅用吉。繼娶永嘉陳氏。封恭人。生子稼。翊。聘秀水項吏部女。稼登。聘烏程閔茂才女。女一。許聘烏程閔世南。初公校土南宮。所舉戴記士僅十人。皆海內名雋。其最顯者。余與今少保濟南殷公。並在政府。婺源汪公。爲御史中丞。故餘姚胡公。爲太常卿。國子祭酒。嘉興陸公。爲太常少卿。餘五人。皆至藩。

臬郡守其卒也。汪公狀其行，殷公表其墓，而余爲之銘。銘曰：謂公不達，而膺仕是都，謂公達耶，而讒口郝婁，舍命不渝，誰毀誰譽，吁嗟云乎！展也夫。

封通議大夫兵部右侍郎兼都察院右僉都御史鏡川吳公暨配贈淑人合葬墓誌銘

鏡川吳公者，今少司寇百朋之父也。其先吳人也。宋紹興間，有十五世曰慥者，爲青田尉，自青田徙義烏之元圃家焉。代有聞人。五世祖某，某生某，某生希采，以尙義捐貲賑乏，有司聞於朝，爲旌其閭，事具郡志。中大父文高，父瀾，母蔡氏。其生以宏治辛亥四月廿四日，其官止鹽城縣學教諭，其貴以子司寇君累封通議大夫，兵部右侍郎，兼都察院右僉都御史。其卒以隆慶己巳十月十四日，其壽七十有九。其配初娶蔡贈淑人繼金封淑人，其葬在白瑕山之原。其平生行實，則鄉人少宗伯諸君爲之狀，而乞余銘。狀曰：公諱璋，字德純，鏡川其別號也。初穎異絕人，長受業于陽明先生之門人山陰朱中，學益進，歸補邑弟子員，善爲文，督學使者咸奇之。然以數奇不第，嘉靖辛卯，始應詔超等貢於京師，授永城縣學訓導，飭躬端教，士皆樂從。寧陵尹缺，部使者檄公視篆，數月，邑中大治。遷鹽城縣學教諭，其教士悉如永城。時嘗一攝邑事，邑亦大治。如寧陵然。自以官薄不足展厥志，頗厭宦游。癸卯，司寇君舉於鄉，公乃歎曰：吾有子矣，遂棄官歸。結廬城東山中，讀書談道，晏如也。丁未，司寇君舉進士，授永豐尹，治邑稱最。拜監察御史，累遷都察院右僉都御史，撫治鄖陽。已，又從鄖陽轉撫南贛，皆封公如其官。隆慶改元，今上登極，用建儲覃恩，是時司寇君以勦賊功，晉貳兵曹，遂益封公通議大夫，兵部右侍郎，兼都察院右僉都御史。最凡三益封，而其父瀾、母蔡夫人，俱以例賜贈。於是公移書司寇君曰：吾少苦學，亦欲自見於世，然官不過邑博，今汝貴

爲三品通顯矣。又蒙上恩推及三世無以報。自今以往汝之身吾不敢有矣。己巳司寇君從留曹被召改今官過里省公公老目眊不能視司寇君不忍離上書乞侍養公固遣之曰奈何以我故遲君命會司寇君所上書亦寢不報遂涕泣而行至京師數月而公卒司寇君號痛幾絕然公本教以急於王事勿卹其私固亦無憾也公少有至性事父及母淑人以孝聞又推產分讓其弟與鄉人處恂恂濡不爲崖異鄉人化之所爲卹孤調急事甚衆不載載其鉅者如此初配淑人蔡氏卽母蔡淑人再從女姪也少婉嫵秀慧年十歲通女經女誡諸書父母奇愛之欲擇佳婿以公蔡甥有異質遂以歸公乃克相公以媚于舅姑實生司寇君期月淑人遂卒生宏治壬子十二月廿二日卒正德庚辰六月十二日距淑人之逝蓋先公四十餘年及是始啓其窆而合葬焉公子男六長百元庠生娶虞氏次百忠早卒娶傅氏次卽司寇君娶王氏累封淑人俱蔡出次某某孫男十某某孫女五曾孫男十曾孫女三往司寇君以御史按楚及撫治鄖陽俱有異政嘗爲余言吾所兢兢於官守者皆以大人之教也余楚人又與司寇君同舉進士故志其事而爲之銘曰嗚呼是維長者吳公之阡雙璧合焉爾之後蕃且賢爾之深澤且綿天之報施善人固其然

## 素菴戴公墓誌銘

戴氏之先浙之湖州德清人也自素菴公客遊京師從先皇帝分封於郢居郢者三世及今上皇帝龍飛而素菴之孫良齊君用翊戴功歷陞錦衣衛指揮僉事戴氏蓋三徙而其後益顯良齊公雖發家武籍然好儒學所交皆當世宿學知名之士用能紹麻恢業以大其宗嘗勸素菴公艱難造次歿四十餘年而未



有銘諸幽者。持狀屬余。請修其闕。余鄉人也。誼不能辭。按狀。公諱景春。號素菴。父諱禮。官兩淮鹽運司政。除武岡州生三子。長景暉。仲景暘。公其季也。初武岡公之官時。獨與長子俱。而以仲子與公。託諸其友。留京師從學。無何。武岡公卒於官。而長子留楚。不知所之。仲子居京師者亦歿。以是戴氏譜牒世系。及武岡公宦跡官名。俱莫可考。公時甫十二。羈旅寓越。乃棄儒治生。贅於仁和倪氏。成化丁酉。先皇帝將大封諸王。募人充儀衛。公以良家子應募。事先皇帝於西館。宏治甲寅。從之安陸。以善制香。得幸先皇帝。嘗親灑睿翰。書咏茶詩以賜之。正德丙寅。保陞總旗管理伍事。方欲大用公。而公以疾乞老。遂徙居七里灣。竟卒。公性沈重寡言。人罕測其喜怒。訓子姪。必以孝友禮法。與鄉人處。好名檢。不爲苟容。里中少年有毆母者。公欲與其父直。諸有司。寘之重典。少年懼。叩頭流血請改。公乃許之。而其人亦痛自創艾。卒爲善士。爲鄉里所重如此。幼失父兄。間關南北。備嘗艱阻。能以勤儉力業。積微至鉅。蓋公之歿六年。而上龍飛入踐大位。凡先皇帝舊臣。靡不依日月之末光。或從輿隸。取尊官大爵。而公以早逝。竟不獲遇。至其孫乃顯。豈非命哉。然其鑠懿淵積。庇於後者遠矣。距公生于年月日。葬某山之原。銘曰。龍欲升天。雲爲翼。真人之興。多士集。先皇藩僚。盡英雋。公也。桓桓乃其一。一朝五位昇皇極。翊戴諸臣俱顯陟。吁嗟靈兮。倏已化。附翼攀鱗。恩世及。故簪遺履。蒙宸憶。賞以世延。賁殊錫。譬彼黍稷。公所植。身不及獲。孫乃食。七里新阡。漢江側。終焉允臧。卜云吉。福汝後嗣千萬億。

### 處士立齋高翁墓誌銘

高處士者。兵部武選主事尙志祖也。始武選與余同舉於鄉。嘉靖甲辰中會試。以病不能廷對。丁未復與

余同舉進士。是時武選年三十餘。而處士翁尙無恙。及出宰海寧三年。用廉能徵擢今官。而處士乃卒。卒年七十有七。高氏在邑中。稱爲德門翁。旣壽考。而其子孫復貴。而是人愈益嚮慕之矣。嗟乎。閱閱轡轂之家。賢豪炳煜之士。席位藉柄。以矜名行。猶不能庇其後嗣。而委巷野老。煦煦慕義。慶流子孫。何哉。語曰。人舉陽善。鬼錄陰德。彼茫茫然者。其有知乎。其無知乎。非通於幽明之故者。又孰能無惑焉。按狀翁諱綱。字惟振。系出宋南平王崇文之後。其先自大原徙也。始祖能靜。能靜生鳳儀。鳳儀生旭政。旭政生伯溫。伯溫生翁。十二歲而歿。翁獨與母楊氏。居常自傷。已不及養其父。歲時伏臘。悲感動人。故事楊至勤。楊以守節而終。有司特表其墓。翁毀瘠盡瘁。哀思終身。族黨稱孝焉。高氏故多貲。及翁少。孤家益落。素所貸者。人皆負之。翁揣知負者盡窘。曰。奈何以利故。重困吾鄉人。乃棄券折負。不復責償。癸未歲大飢。疫死者相枕。翁率子弟。撤複屋材爲櫛。躬荷鍤埋之。其治產取足衣食。不求餘。度稍足自給。卽以周宗族貧者。里中新銳少年。或用睚眦。怒鬪致訟。公徐以一二言折之。少年往往感伏。忿訟亦解。其爲人所愛慕如此。今上詔郡國三老。孝弟力田。七十以上者冠帶。有司以翁應詔。歲終飲臘。常與賓焉。翁於是始一攝冠履。見官長。自他足不及城府所。武選在海寧時。用威嚴。誅鋤強梗。邑中翕然稱治。翁獨貽書誡之曰。邑吏佐天子牧養小民。宜用寬仁。行陰德。何乃獨任法乎。翁故長者。性喜忍。不傷物。卽所言不達吏理。其意殆近厚矣。翁所居一都。里中諸長老。素椎不業儒。迺翁獨好儒。羣子弟延經師教之。諸長老見翁所爲。盡駭異。不喜。翁不爲變。至翁子孫。竟以儒顯。而一都亦自是彬彬多文學之士。埒於他里。於是諸長老則人人喜。多公能變厥俗也。斯可謂一鄉之善士矣。翁配管氏。繼配薛氏。生五子。長允迪。爲益府長司。娶周氏。管出也。次允恭。

允升允中允達薛出也。女二長適陳生宗儒。次適張生文弼。孫男九長。卽武選君尙志。公孫女八。曾孫三長。薦邑庠生。次重慶。幸慶尙幼。曾孫女一。以年月日。窆于雲臺橋之陽。先訃至京師。武選君尙余悲曰。吾幼長于祖。今歿而不吾見也。哀哉。請爲之銘。銘曰。繡林峩峩。大江所經。精縑靈結。鬱生逸人。澤及枯骨。古曰周文翁也。編氓比德。齊仁不彫。自飾不式。而成。韜光隱耀。以裕後昆。毋曰蓋高。索之冥冥。視履考祥。鑒此刻銘。

遼府承奉正王公墓誌銘

余在史局。好具問先朝事。見老璫數輩。語及孝廟時。輒悲咽。嗟乎。敬皇帝之澤。入人深矣。其後見遼府承奉王君。亦宏治閒人。至論曩事。尤能歷歷道也。嗟乎。敬皇帝。誠聖主也。墮弓遺烏。猶且重之。況其舊臣乎。宜爲志。志曰。王君諱大用。字惟賢。霸州大成縣人也。事敬皇帝冠時。才弱冠。侍乾清坤寧。爲奉御。而慈壽皇太后居仁壽宮。公在三宮間。端慤自媚於上。積功勞。陞兵仗局左副使。毅皇帝親閱近侍。儀貌魁傑者。選置左右。三月。陞御馬監左少監。是時。帝方好武。中貴人皆習騎射。裘馬從獵上林諸苑。而公獨周慎。謙抑。乃帝願喜公。賜蟒服三襲。遂陞太監。內苑乘馬。加賚祿米二十石。無何。毅皇帝上賓。公侍大行几筵。會今上入繼大統。中貴人從代來者。皆新幸用事。而君自以先朝舊臣。弗爲下。諸新幸並忌之。遂出爲遼府承奉。君在內庭久。明習國家事。及至。則悉條司中諸敝蠹。啓王釐正之。府中頓肅。莊王薨。今嗣王幼。國太妃主政。太妃賢。諳習書史。沈敏有斷。事無大小。皆與決之。君亦殫忠畢慮。克稱委任。當是時。太妃賢聞天下。亦以有君輔之也。乃王嗣爵。以君國之耆碩。恩禮尤殷。王英敏聰達。才智絕人。羣臣莫敢望也。而君每

事獻替。卽有不可。輒力諫。諫或犯顏。王察其忠悃。恆嘉納焉。而性峭直。以莊見憚。刻廉自律。不受私賂。莫可干以私。侍御胡公按楚者。嘗顏其堂曰忠誠體國。議謂無愧云。然君始用也。特被恩寵。業通顯矣。以弗能少下親貴。竟老外藩。嗟乎。人之遇合。誠有命也。觀其卓然大節。終始不渝。其誼有足稱者。藉令久禁闈。筦樞密。如近代懷恩蕭敬輩。豈足多耶。按狀公大父諱希景。父福能。母李氏。兄四人。琪璋現瑞。皆早卒。公所以撫養諸子者。備至。多不悉錄。生宏治戊申十二月卒。年日卜江陵郭西磨旗塚之原葬焉。銘曰。生于燕。老于楚。孰曰信美。而非吾土。出於朝。相於藩。孰曰位屈。而名則尊。彼何爲兮。唯唯諾諾。此何爲兮。蹇蹇諤諤。吁嗟君兮。尙寐無覺。重冥之下。亦足樂矣。隆然者邱。峯而崇。鬱哉佳氣。煙雲重重。公乎公乎。藏骨于其中。

## 勅封承德郎刑部山西司主事雲谷曹公墓表

語曰。不知其父。視其子。不知其主。視其所使。此言積習率化然也。河南有隱君子曰雲谷曹公。余不識雲谷公。而識公之仲子亨。今縉紳中所稱曹仲子者也。始仲子憲副于楚。扼強宗室。治巨獄。有能名。楚人思之。遷浙江參政。無何。奔雲谷公喪歸。明年。遣使持其鄉人所爲撰述公之行實。走京師。求表其墓。乃余則又獲知公之潛德。隱行曰。嗟乎。曹仲子之賢。蓋由世德云。雲谷公者。諱大夏。字子禹。汝寧新蔡人也。先世祖曰世隆。居縣東胡莊。至曾大父英。始自東徙。縣西九溝坡。大父端。父鳳。舉進士。稍遷至都察院右副都御史。母劉孺人。當武皇帝時。豎瑾竊國政。勢若烈焰。一旦不如意。所夷滅者。不可勝道。而都憲公獨抗直。不爲少屈。遂爲瑾所陷。至鬻其產以贖產。且盡。都憲公益窘。公曰。吾聞嶢嶢者易折。皎皎者易污。大人以

直道忤時命也。苟不負所學。雖終窶何憾。是時公方弱冠。其器識卓異如此。踰年而都憲公卒。卒六年。公以儒士應試。有司不錄。乃退而躬耕。嘉靖十三年。仲子始舉進士。授刑部主事。十五年。大祀覃恩。封公如其子官。公傷都憲公之志。爲書誡仲子曰。嗟乎。吾先大夫以修正蒙難。爲世名臣。至于予而中廢乎。夫不辱其先之謂孝。移以事君之謂忠。而勉哉。毋忘吾所欲承繼先志者矣。仲子則祇奉公命。不敢墜。以故曹仲子之仕。所至輒顯名。守兗州日。積俸金爲公壽。公卻之曰。吾欲汝以清白養。不欲汝以金養。且吾自食其力。何用金爲。二十九年。仲子徙浙江參政也。自楚歸省。是時公年六十餘。仲子念公老。業不欲行。公故強飲食。振步以示尙健。曰。趣行矣。毋以吾爲念。仲公不敢留。去一年所而公卒。公生而瑩朗。聲如鐘磬。既長。博學無所不該。尤善禮射楷書。性至儉。恥爲豪侈。其治產取足衣食。不求餘。夫豪子弟。襲父兄餘焰。乘堅策肥。過詫閭里。乃其常態。而公以都憲子。恆力田自斂約。同齊民。當是時。邑中賢士大夫。皆多公能。摧強爲弱也。與人交。無論貴賤。賢不肖。皆處之無忤。所見卽善。雖疏遠。必願慕交納。卽惡。亦矜容不峻。絕人曰。太渾矣。公曰。不然。夫分別善惡。賢賤不肖者。有司之事也。吾爲鄉人。與世大同而已。安所不可。而欲沾沾自異乎。于是邑中人愈益多。公按狀載公之爲人如此。隱不違親。貞不絕俗。殆近古所謂逸民者與。夫世未嘗無瓌偉倜儻之士也。或遠跡于鹿豕。或泥蟠于巖穴。乏青雲之媒。闕驥尾之援。長湮滅而無聞者多矣。曹公以碩人之德。棲遲考槃。卽如勸都憲公以守正抗節。與所以訓迪其子者。斯亦無愧于當時之士矣。乃竟不獲顯於時。彼眦睢洩。紆金紫而縮章綬者。是遵何德哉。先民有言。譬彼農夫。是穰是稔。雖有饑饉。必有豐年。曹公之賢。至其子。乃章所謂不于其躬。于其子孫者乎。公生成化甲辰。終嘉靖辛亥。

年六十八配張氏封安人三男子長直庠生先公卒次卽亨次亶崇府典膳五女子長適元鎮仲高生季庠生蕭儒餘皆殤孫男五女三以年月日葬于□□之原史張氏取公行事勒之于石以詔後人嗚呼凡厥子孫尙其瞻哉

# 明張文忠公全集

## 文集六

### 人主保身以保民論 辛未程

天之立君以爲民也。人君明於天之意。則所以自愛其身者。必不輕矣。夫以天下之大。林林總總之衆。而無君則孰與治之。人主以其身託於天下君王之上。而無民則孰與守之。故世之愛戴人主也。莫不願其安富尊榮。而長爲君者。非獨愛其君也。有之以爲利故也。人主之自愛其身也。亦莫不欲其壽考寧固。而長爲君者。非獨愛其身也。有之以爲天下利故也。故貴以其身爲天下者。乃可以託天下。愛以其身爲天下者。乃可以保天下。善乎宋儒魏氏之言曰。人主保身以保民。蓋言人君子民之道也。而愚又推之于天。今夫父母之于子也。上以屬宗祫之重。而下以爲昌後之圖也。故其愛之也甚殷。而憂之也甚切。勞之以其所不堪。而約之使弗納於邪。其爲子者。一舉足出言。而不敢忘焉。惟恐一旦以其身之虧辱。爲父母憂。故子之愛其身也。非以自爲也。體父母之愛。爲久遠計也。大君者。吾父母宗子也。又天之所甚愛者也。賦之以聰明聖智之資。而畀之以崇高富貴之寶。使天下曾不得睨視而跋望焉。佐之以侯王君公之長。而授之以禮樂征伐之權。使天下曾不得矯命而雄行焉。其愛之甚何也。以爲民也。天下有強掩弱。衆暴寡。懷知而不以相教。擅利而不以相分。絕國殊俗。僻遠幽遐。不能以被德承澤。然後舉天下而授之一人。號曰天子。使之齊一其亂。而均適其欲。衣食其饑寒。而拊循其疾苦。然後天之意有所寄焉。故人主之身。非

一人之身。億萬兆人之身也。天以民之故而愛君。而人主不思愛其身。以保民。則無乃孤天所以付託之意乎。然而人主之愛其身也。與衆庶異。不可以不察。庶民之愛其身也。常患無以養之。人主之愛其身也。常患無以制之。何也。凡人之情。有不得。則其欲有節。而用不窮。無不得。則其欲易恣。而反至于困憊。人主之於天下也。奚不得哉。其威足以忱惕。其勢足以奔走。可致之。欲交於前。而可畏之。機伏於後。始於娛樂。終於憂患。而民與身始交病矣。明主知其然。故常有以節之。黼黻文章。所以養目也。而冕旒蔽之。不極其觀。鐘鼓管磬。所以養耳也。而黯纊塞之。不淫于聽。八珍在御。側載臭苙。所以養口也。而一餐告飽。不求其餘。深宮曲房。筦簟緹帷。所以養體也。而應門擊柝。鼓人上堂。女史授環。彤管紀過。不求其娛。負辰以居。旬陳營衛。所以養安也。而蟲飛會盈。辨色眎朝。日中考政。日昃不遑。不求其便。張官置吏。建侯樹屏。所以養尊也。而疑丞後先。卜筮左右。太史奉諱。工師誦詩。御警幾聲。士庶傳謗。不求其徇。禮樂刑政。整齊約束。所以養威也。而虞賓在位。三恪助祭。夏士在庭。殷士在廟。讐民在甸。夷隸在門。不求其同。凡所以養之者。必有所制。不得極欲。譬之百官有司。事有所稟。不得專命。若然者。豈故拘攣齷齪。屈萬乘而躬韋布之行哉。其節之者。正所以愛之也。夫物也者。所以養性也。非以性養也。以性徇物。養生者慎之。而況于人主乎。是以古之帝王。善保其身者。使欲不窮于物。物不屈于欲。則其欲有節矣。欲有節。則神定。神定。則無越思。欲有節。則氣完。氣完。則無過動。欲有節。則事簡。事簡。則無濫費。是以惛心溢志之事。不滑其和。而煩擾掎剋之政。不逮于下。精爽通于天地。而德澤洽于寰宇。含生之倫。仰上之德。象主之指。各便其性。安其居。處其宜。爲其能。三光明。六符正。羣生遂長。五穀蕃殖。海隅日出之邦。彫題鑿齒之民。莫不重譯貢琛。斂衽稽顙。



以戴天子。天子者。端委恭已而南面焉。澹然無爲。寂然無聲。而萬幾咸理矣。中心悅懌。四體康豫。而壽考且寧矣。故古之聖帝明王。在位久者。皆歷世百千萬歲而不化。其民就之如日。望之如雲。愛之如父母。而歸之如流水。矯手頓足。謹呼祝頌。欲萬世而爲君者。豈非保身以保民之明驗歟。晚近世則不然。以天下之大。奉一人之身。而常苦其不足。口厭甘脆。而天下始有藜藿不飽者矣。身厭絢綺。而天下始有短褐不完者矣。居厭廣麗。而天下始有宵啼露處者矣。其弊至于離志解體。而不可收拾。則漢唐宋之季世是已。嗟乎。彼其身之不保。而又何以保民乎哉。夫彼之愛其身也。亦無以異于古之帝王。而成敗相反。榮辱異趨者。古之帝王。以養之之道愛之也。而彼以戕之之道愛之也。故事有順而相賊。反而相成。美疢之滋毒。不若藥石之生我也。柔曼之傾意。不若奇醜之益德也。是以明主不以天之所愛爲樂。而以命之靡常爲懼。不以天上奉其身。而以其身爲天下。使其身常有餘。而無不足。其民常安樂。而無患難。誠以天之愛我者甚殷。而託之甚重。故也。嘗觀無逸一書。敍商周之哲王。所以壽永命。而配上帝者。不外乎抑畏恐懼。卑服康功。忠臣之愛君。固如此也。而世乃有曰。有天下而不以恣睢。命之曰桎梏。嗟乎。人主之欲保身。以保民。豈必若拘儒所云。神農憔悴。堯瘦臞。舜黧黑。禹胼胝之爲勞哉。又豈必如術家所云。吹噓呼吸。吐故納新。熊經鳥伸。鷗視虎顧之爲養哉。惟不以天下與其心而已。不以天下與其心。則內者不出。而外者不入。內不出。外不入。則耳目聰明。而心志寧一。何事之不節。何功之不成。而必曰以恣睢。夫使人主無常身。而百姓無常保者。必斯言矣。抑愚聞之。燔火之方微也。一指之所能息也。及其燎原。雖江河之水。弗能救矣。鴻鷗之未孚也。可俯而窺也。及其翺翔浮雲。雖蒲且之巧。弗能加矣。人心之欲。其幾甚微。而其究不可窮。

蓋亦若此矣。是故養善心者貴豫。主敬之存之。典學以明之。親正人君子以維持之。禁於未發。制於未萌。此豫之道也。所以保身保民者也。

葬地論

論作於萬歷六年。得請歸葬時。其堅任己見如此。世人談其因圖風水。致有僭占者。恐先父至愚。不如是也。懋修言。

世言葬地能作人禍福。謂葬得吉壤。家必興隆。得惡地。家必衰替。若影響梓鼓之符應者。悉妄也。夫人死則精神消散。魂氣飛揚。其奄然僵臥者。體魄也。譬之人寐。則陽神出遊。觸感成夢。當其夢時。栩栩然不知身之在於牀第也。人死大夢也。不復覺者也。易稱精氣爲物。遊魂爲變。精魂氣也。故能感而通靈。變而化物。是以人稟正氣之厚。及強死而氣未散者。類能爲鬼神。作禍福。若體魄塊然無知。與土石等耳。雖得吉地。豈能使之通靈乎。故古不墓祭。以爲祖考之神靈不在於是也。詩言文王在上。於昭于天。傳言忠臣義士聖賢之流。死或爲五星之佐。故傳說栖神於箕尾。蕭何降精于昴宿。記言骨肉斃于下。陰爲野土。其氣發揚于上。爲昭明。焄蒿悽愴。此百物之精也。神之著也。夫以死者爲有知。則其靈在魂。而不在魄。靈既不在。是又安能司人之禍福。夫人之情。豈不皆欲子孫累世貴顯。富厚不絕哉。方其生時。魂強神王。智能思力能行。然欲爲子孫圖慮長久。亦有不能盡如其願者。死後枯骸。乃能庇覆其後人乎。若謂憑藉地靈。乃能垂蔭後世。凡欲爲子孫計者。速死而已。惡用生爲乎。書言作善降祥。作惡降殃。易曰。積善之家。必餘慶。積不善之家。必餘殃。斯天道也。然亦有不盡然者。今日家之興替。皆係于葬之吉凶。則人欲避殃而

趨祥者。惟取必于地而已。又惡用作善爲哉。且災祥禍福之柄。旣係于地。則彼蒼蒼者。又將安所司乎。天包乎地。地不能大于天。災祥善戾之感。在天道猶不可必也。而況于地乎。上古人死。則舉而委之于壑。後乃歸而掩之。當其委壑之代。人亦有貴有賤。有榮有枯。有貧有富。有壽有天。彼無葬地也。是又孰爲之乎。旃裘之國。親死則棄之于野。經月不視。俟虎狼野獸食盡。以爲送終。西方之俗。盡從火化。彼諸國人。亦有貴有賤。有榮有枯。有生有死。有貧有富。又孰主之乎。今吳越之間。有水葬者。魚鼈之腹。人之邱隴也。彼其子孫。亦有通顯貴盛。累世富厚者。是又孰爲之乎。黃帝葬于橋山。藏衣冠耳。堯葬濟陰。坎而不墓。禹葬會稽。不改其列。殷湯無葬處。王季葬楚山之尾。欒水齧其墓。見棺之前。和而文王。不以爲戚。魏惠王將葬。雪深及牛目。反棺而旋。改期而葬。彼皆身爲帝王。而葬禮如此。然其子孫。爲天子諸侯。歷世享國者。千有餘年。此其尤大彰明較著者也。至若匹夫編戶之氓。貧窶窮約。或掩骼荒邱。寄骸叢壘。而子孫崛起暴貴者。又不可勝數也。是遵何術哉。上古死而不葬。中世葬而不墓。近古墓而不擇地。不拘時日。今之言相地卜兆者。皆叔季希覬之私。謬妄無稽之論也。且青烏之書。始于郭璞。彼固精于其術者。葬其親也。宜得吉壤善地。而身爲王敦所殺。後裔無聞。若曰。災禍之來。有必不可逃者。則人之博求吉地。欲以避殃致祥者。又胡爲者哉。近世言堪輿者。皆宗江右曾楊二姓。今江右之區。貴門世族。踵相接也。乃二姓之後。未聞有顯者。彼其祖何獨不求一善地。以自庇其後人乎。又何工于爲人謀。而拙于自爲謀乎。若曰。地可遇而不可求。則人亦惟遇之而已。何以求爲。夫人固有未得吉地而顯貴。已得吉地而衰替者。禍福之應。然乎否耶。至如江南巨室。停喪待地。有子不葬父。孫不葬祖者。纍纍淺土。或被盜發。或因山興訟。竭貲求勝。至于滅

門逮死而後已者。將來之福。尙屬杳茫。見前之禍。輒已蒙被。吁嗟愚哉。可悲也已。或曰。膏沃之壤。華實必茂。剛鹵之區。根莖靡託。物理如此。何得言無地脉乎。此殆不然也。夫地之美者。以其能生物也。然使樹枯木朽。株于其閒。亦未有能生者矣。今言地之善者。能使枯骨復華。僵屍再起乎。若謂風藏氣聚。則體魄安妥。或閱千百年而不化。不則有風吹倒轉。蟲蟻嚙食之變。使死者體魄不安。禍及子孫。此大惑也。夫人死。枯木朽株耳。雖不化奚益。戰死之人。脂膏草野。肉飽烏鳶。而其子孫。亦有富貴顯赫者。安在其能貽子孫之禍乎。且體魄無知。亦無安與不安也。或謂古者建都立邑。皆必據形勢。相水泉。故曰。我卜澗水東。灋水西。惟洛食。今民間作一室。猶必求向背之利。納陰陽之和。何獨陰宅可無擇乎。此又不然也。夫建邑築室。爲生人計耳。故必據形勢。相水泉。擇向背。納休和。而後生人蒙利。體魄無知。何所愛憎乎。又何關于生人之休戚乎。或謂術家之說。往往多驗。苟無其實。安能逆觀于將來乎。此又不然也。夫相地之法。如射覆然。未有的然。知其中之所存者也。有地于此。使三人視之。一曰吉。一曰凶。一曰先凶而後吉。或先吉而後凶。而貴賤榮枯。貧富壽夭者。生人之所必有也。他日出于吉。則言吉者驗。出于凶。則言凶者驗矣。出于先凶而後吉。或先吉而後凶。則言先後者驗矣。而世皆傳其驗者。不傳其不驗者。故謬悠荒唐之說。不聞于人。而臆度幸中之談。獨存于世。況術家者流。每挾奇以誑俗。飾淺以驚愚。而流俗之見。未有不惑于禍福之說者。故其術難窮。惡在其爲多驗乎。或曰。禍福之說。固不可以是拘拘爲也。然以祖考之遺體。委而棄之。略不介意。于心寧能忍乎。子之言葬也。如之何。曰。葬者。藏也。欲人弗見也。人死。則厝之于草莽之中耳。平衍窳奧。茲焉允藏。毋居險仄。恐其崩也。毋近水澤。恐其陷也。掘地爲坎。衣周于棺。土周于槨。反壤樹之一。

瞑而萬世不視矣。其速化耶。吾烏乎知之。其不化耶。吾烏乎知之。其化與不化。又何足休戚耶。反哭而虞。設主于室。奉神靈而永孝思焉。而送終之事畢矣。若夫世之延促。家之隆替。命也。吾何知焉。君子強爲善而已矣。吳季子適齊。其子死。卽葬于贏博之間。深不及泉。其高可隱也。掩而號之曰。骨肉歸復于土。命也。若魂氣。則無不之也。無不之也。而遂行。彼以爲此。天地之委蛻也。無之而不可藏也。奚以故國之歸。勝地之求乎。嗟乎。若季子者。可謂明也已矣。可謂遠也已矣。

翰林院讀書說

玉堂夫子學統天人。道通今古。主盟于詞賦之壇。樹幟于文章之府。天子嘉其誼。重其望。選四方文學之士。二十有餘人。往從之游。於是文學之士。彬彬然。望風景附。雲集於函丈之下。鼓篋旣竣。升席而坐。迺進諸文學于庭。而告之曰。方今治道休隆。德化浹洽。夔龍稷契。比翼于廊廟。羣臣百寮。師師濟濟。一時人物之盛。蔑以加矣。聖天子迺猶傾念。豐芑網羅。草澤特選。爾諸士登諸詞苑。開木天之館。以爲藏修。聯師儒之任。以爲董正。其於爾諸士。亦有厚望焉。若亦知天子之所以儲養之意乎。諸文學揖而對曰。自代謝繩結。文旨肇興。謨誥拾于簡編。大雅久而不作。王風旣萎。體格世殊。迨至有漢。方隆董賈。擅其芳聲。遷雄端其槩。夙風乎。猶有三代之遺音焉。旣而淳氣益漓。駢麗乃作。濫觴于齊梁。猖狂于盧駱。唐宋而還。風斯下矣。夫鳴盛華國。潤色鴻業。非文其孰能爲此也。迺今聖化昭明。觀人文以化成。天下而某等適遇其會。又有夫子倡于上。而起其衰。踵作者之芳規。嗣前獻之遺軌。此其時矣。又何讓乎。于是夫子飄然微哂。愀然作色。而嘆曰。噫。吁。嘻。陋哉。測淺者不可以圖深。見小者不可以慮大。子實佔畢之儒。未聞昭曠之論。是

以爲此言也。來吾語汝。蓋學不究乎性命。不可以言學。道不兼乎經濟。不可以利用。故通天地人而後。可以謂之儒也。造化之運。人物之紀。皆賴吾人爲之輔相。綱紀風俗。整齊人道。皆賴吾人爲之經綸。內而中國。外而九夷八蠻。皆賴吾人爲之繼述。故操觚染翰。騷客之所用心也。呻章吟句。童子之所業習也。二三子不思敦本務實。以眇眇之身。任天下之重。預養其所有爲。而欲藉一技。以自顯庸于世。嘻。甚矣其陋也。且道德者。事之實也。文詞者。德之華也。故尙行則行有枝葉。尙言則辭有枝葉。訓誥典謨。聖人豈殫精極慮。作意而爲之者哉。幾微內洞。文采外章。揚德考衷。啓發幽祕。不求文而自文耳。乃吾見一人焉。辨若懸河。藻若春工。含吐鄒枚。方駕陸謝。及考其實。曰是人也。德薄人也。才辨之流。虛浮之黨也。若而人者。諸君願爲之乎。又嘗見一人焉。辨不驚世。譽不響俗。其言呐。身不勝其衣。粥粥若無能。及考其實。曰是人也。忠信人也。君子之徒。聖賢之歸也。若而人者。諸君願爲之乎。何則。根本固者。華實必茂。源流深者。光瀾必章。是以君子處其實。不處其華。治其內。不治其外。夫恢皇王之緒。明道德之歸。研性命之奧。窮經緯之蘊。實所望于爾諸君也。是之不務。而文焉從事。若曰文詞而已也。豈徒爲爾諸君之累。毋亦忝天子之命。而虛其望乎。又何令名之有。于是諸文學。赧焉自失。蹶然負墻。逡巡而退。曰夫不聞建鼓之音者。不知拊瓠之足差也。不覩懸黎之珍者。不知燕石之非寶也。某等智識淺昧。未燭于理。又執固陋之見。足已而不問。夫子發以閎深之辭。引以大道之要。迺今廓然發矇。已昭矣。敢不夙夜。以求無負于天子之寵命。

## 來鴈說

顧舍人宦居京師。有鴈集于邸舍。迫就不驚。容止閒暇。有宗卿作而言曰。休哉。瑞應乎。夫鴈負陰抱陽。候

時眠宿也。此其背元渚之岑寂。爲人寰之清微。殆以章瑞表應兆先舍人矣。客聞之。以問陳先生曰。斯言是邪。先生迺爾嘆曰。然哉。休哉。休哉。然哉。抑猶未循厥本。夫觀物測微。揆類表應。此璞士之思也。非所以議于廊廟之模也。宗卿之言過廣。不乃甚乎。客曰。何爲其然也。羽毛得氣先。自古而記之。矧其耿特之禽。婉儀斂翮。引翁駢蹠。邕邕肅肅。似擾而馴。殆漢氏之所爲協律豫神者也。夫子其有遺聞耶。先生曰。烏謂此乎。且夫魏鷹鸞雉。詭毳殊章。今昔之所珍也。虞人負罟。倚機入林。卽鹿射驪。翟飛跌者衆矣。虞人靡得。以爲瑞也。頰鱗綺甲。世之所希也。漁子揄九罟。以游江河。河則舛之類。詭族險喙。浮沒揚波。迂纏者夥矣。漁子靡得以爲瑞也。夫物固靈而未必遇。不必靈而傳者矣。此何以稱焉。客曰。然則夫子何以休旃。先生喟然曰。嗟乎。茲難以微喻已。然而茲事雖細。皇風之所概也。迺余秉藝文之權。惟始終之表。惡可嘿焉。惡可嘿焉。蓋試論之。夷隆時也。禩祥適也。顯沒會也。建德章號者。赴時希光。摛盛者。近適雍休。履祉者。附會論世。釋化不越三者而立教也。故事有微而必章。亦有顯而弗揚。彼舍人優優委蛇。迺矜矜于休媵。藉令遘替運而立諱朝。雖疊珍纍異。方跼躅匿沒。豈能以揚芬而撒茂哉。客聞之曰。惟聖人君役萬物。中智以降。則萬物之爲役者也。方今天子神聖撫運。休光累葉。湛恩澤淳。溢于罔極。猶遴登不髦。俾寓內一技之士。亦得効諧陳慮。以黼黻鴻猷。是以氓庶闔悅。遐近欣欣。協氣充牣。嘉況叢集。熙雪表瑞。滴露飛甘。仁麋皎兔。靈爵之貢。日旅彤庭。嘉繇異道之祥。盡升清廟。而天子猶攜悒不居。下令若曰。此大誇靡。敕示中外。自今毋得獻而諸福之物。郡國什一聞上。羨溢圖牒者。尤不可殫述。人人謂致華平之草。家家蘄致林氏之騶。跂足致燠。延頸成瘠。海內喁喁。然無不望上兼瑞。命總百靈也。昔者爵集省第。黃霸揚其聲。鸞降庭。

木蕭怨表其政。皆遇好誇之主。居偏駁之朝。處疏濼之位。猶援物著化。垂跡後來。而舍人以明體慧質。遭逢隆盛。附鴻漸之翼。應鳳毛之簡。珥筆金闈。刷彩瑤闥。目陶天藻。手櫟雲英。夫旣以習觀太平之業。而沐浴膏澤。譽被其文章矣。歎彼蜚鴈。烝然戾止。其心若啓。可則可儀。夫羽毛之應。豈必致信符籙。然而引興協思。不可少也。王生有言。世衰道微。僞臣虛稱者。殆也。世平道明。臣子不能宣者。鄙也。蓋情有積而思宣。美有稽而斯鬯。性有觸而斯起。舍人焜燿希會。迺得以因物託義。被飾趣指。播之悠逖。以昭其和休焉。夫感上奮內。據盛歸美。而輸布忠藎。臣子之職也。抒道情以通諷訓。藻士之致也。推上盡下。鋪衍宏變。以極廣遍。卿大夫之事也。詩云。翩翩其羽。亦集爰止。藹藹吉士。媚於天子。又云。交交桑扈。有鶯其羽。君子樂胥。受天之祜。茲其所謂不休也。若迺眩異測應。以幾寵援。而惟輓況。不亦惡乎。豈其然哉。

## 義命說

先儒謂義命有正合者。若堯舜之有天下。仁者之必壽。積善者之獲福。是也。有不合者。謂若孔子不得位。顏淵之早夭。是也。以愚綜其實。殆不然。昔者。夫子蓋罕言命。至于義。則諄諄而不已也。何則。造化之數。陰陽之變。運之所遭。氣之所遭。有不可以常理測者。仁者不必壽。壽者不必仁。聖人不必有天下。有天下者不必聖。善者不必獲福。福者不必善。堯舜以聖人而有天下。然其子丹朱。商均。竟以不肖。不能守其業。孔子希世之大聖也。歷聘世主而不遇。遂于魯。厄于陳蔡。故曰。匪兕匪虎。率彼曠野。吾道非耶。回也。屢空。夷齊求仁得仁。竟餓且死。然操溫之徒。暴戾篡奪。至無行也。身爲帝王。屢世富厚。試使孔顏夷齊。與操溫之徒。絜德度義。不同日而語矣。此亦何相去之遠耶。然猶有所解者。以爲人之稟氣不同。或貴賤素定于天。



故也。若夫百里奚在虞而虞亡之，秦而秦伯太公涓濱之釣叟也。年八十老于磻溪，遇文王而爲師，尙父公孫宏五十舉賢良，不合退牧羊于海濱，一朝而爲漢相，一人之身耳。然成敗異變，先後相反也。此其于義命合邪否邪？世之善惡禍福參差異等，其相去不啻什伯者，可勝道哉！何則？大鈞播物，坱圠無垠，行或止之，使或尼之，旣申重之，又摧敗之，數有不可窮，理有不可解，故夫子罕言之也。而曲士寡學，必使牽合推測，以驗天人之際，不亦惑哉！雖然，命不可必，可必者義也。命之所在，雖聖人有所不能違，義之所在，雖造物者有所不可奪。韓子曰：禍與福存乎天，賢不肖存乎我。在我者，吾將勉焉；在天者，吾何知哉！是故孔子不以厄易其聖，顏淵不以窮易其仁，伯夷叔齊不以餓且死棄其義，衡且擊之，彼將安之；升且沈之，彼將順之。是故得之不喜，喪之不戚，生之不貪，天之不怒，彼其視富貴福澤貧賤憂戚如波濤之于巨石也。豈以其紛然者動于中哉！是所謂義也。孔子曰：富而可求也，雖執鞭之士，吾亦爲之；如不可求，從吾所好。然哉！雖聖人固亦唯知有義而已。彼蒙蒙瞶瞶者，固將行險以僥倖，而狷忿之流，又不達順受之正，屑屑焉與造物者較其多寡，責其期效，不得則怨憤熱中，屈原以之自沈，賈誼以之哭泣，申徒狄鮑焦之流，負石蹈海而不悟，是何異以蠡測海，以丈度天，欲以區區之義，上下造化之運，不亦誤乎！是故學者亦唯循吾義而已。至于命，非所可與也。或曰：今之談義命者，異于吾子之說，何哉？任數者則曰：生死之數，窮達之遇，分定于天，不可易也。任人者則曰：天定固能勝人，人定亦能勝天，凡此皆一隅之說，知其一而未知其二者也。譬之稼也，耕耘播種，人也。雨暘豐歉，天也。雖有神農后稷，不能必其歲之豐，而田作之功，自不可以不力。彼任數者，不知耕耘播種之在人，而一歸于歲；任人者，不知雨暘豐歉之不常，而取必于力作之。

勤吁惑亦甚矣。人生而有利害之情。則不能無推測之智。是以紛紛議論。而卒無所歸也。可勝嘆哉。

擬韓信諭燕書

信已破趙。用李左車之計。使人遺書燕王。臧荼曰。蓋聞聖人不違天以立事。智者不悖時而建功。是以伊尹醜夏歸亳。微子去殷。卽周彼二賢者。皆審天命之歸。以決去就之義。是以福慶流于無窮。聲名著于後世也。往者天下同患。苦秦豪杰蠶起。漢王與項羽戮力攻秦。懷王約諸將曰。先入關者王之。漢王先破秦。當王關中。羽倍約。奪漢王關中。而王之巴蜀。又以私意易置。侯王盡王其將相功臣于善地。而徙其故主于長沙。已又弑之。漢王因天下不平。發蜀漢之士。還定三秦。縞素而問弑君之罪。天下豪傑雲合響應。皆棄楚而歸漢。故天命之數。歸于漢王。愚知所知也。魏王豹背畔無親。絕河津。距境而自王。僕受命徇河北之未附者。涉西河。虜魏豹。下四十餘城。遂擒夏說。闕與下。今趙又破矣。便欲乘勝北首燕路。而軍吏皆曰。趙破。燕固自宜聽從。若其從焉。又烏用多殺士大夫爲也。故按兵驛士。使人獻愚計于左右。僕聞周易垂知幾之箴。兵家審彼己之勢。鄭伯面縛。嚴王退舍。國小圖大。宋以敗亡。詩云。禍福無不自己求之者。願足下詳計而熟圖焉。今爲燕謀者。必曰。我有易水之險。漢兵遠來。勢孤援絕。而欲以長技取勝。是自速其危亡者也。且成安君有百戰百勝之計。阻井陘之固。連燕齊之兵。南面而爭權于天下。然僕以偏師鼓行而前。不崇朝。破趙二十萬衆。遂斬成安君。泚水上。夫燕之恃以自蔽者。獨趙耳。昔號破而虞亡。韓降而魏懼。前事之不忘。後事之永鑒。故凡爲足下謀者。皆危亡之路。不忠于足下。不可用也。爲足下計。莫若息兵。徹

備以身自託于漢。僕請爲足下報漢王。卽燕封足下。剖符世世。與漢終始。無極。孰與勢窮力蹙。坐而待亡乎。計不出此。以區區之燕。遠託于孤絕垂亡之楚。而欲鼓螳臂之勇。以抗乘勝之師。僕之所慮。薊邱之壤。不可以圖存。成安之事。復見于今日矣。故願足下詳計而熟圖也。危亡之端。禍福之機。迅如發矢。不預揆之。後悔何及。

擬唐回鶻嗚沒斯率衆內附詔宰相李德裕撰異域歸忠傳賜之羣臣賀表會昌二年

伏以聖主中興。九譯戴同文之治。名王內附。十行承賜札之恩。仰舜德以咸賓。誦堯言而不忒。聲施蠻貊。歡動寰區。竊惟聖人以六合爲家。則邇者安。遠者至。天子以四夷爲守。則要服貢。荒服王。嘉靖殷邦。爰致氏羌之享。丕單武烈。聿來肅慎之庭。凡彫題漆齒之氓。盡圖王會。若辨髮貫胸之長。咸隸象胥。蓋上仁所不懷。必至誠所能化。惟茲回鶻。世長北蕃。樹芽乘突厥之衰。通道值貞觀之盛。燕然請吏。犬羊竊比於中華。靈武徵兵。蛇豕薦窺乎上國。泊葉護狃東都之勝。致懷恩句朔漠之師。金縉和親。不解南侵之禍。邊城互市。竟淪北面之盟。烽煙時徹於甘泉。車駕頻煩於細柳。屬關隴腥羶之後。徒事羈縻。當藩臣跋扈之秋。未遑經略。百年胡運。尙寬膏斧之誅。一統皇輿。忽覩獻琛之會。此蓋伏遇聖竄聰明。天錫勇智。垂衣而治。際河清海宴之期。乘鉞有虔。鼓雷厲風飛之烈。坐明堂而朝羣后。惠中國以綏四方。冠帶月支。旅應騶牙之瑞。梯航日出。咸輸象齒之珍。神威交鬯於遐荒。德教誕敷於鞮譯。遂使可汗遺胄。繫組來朝。特勒大酋。縉戈款塞。豺狼伏其兇性。鴟梟懷我好音。雖夷情之叛服靡常。要聖澤之涵濡無外。丹書錫誓。旣崇日逐之封。赤芾疏榮。仍懋秩訾之賞。載履宸慮。特詔台司。褒武義貞烈之臣。輯異域歸忠之傳。遠稽秦漢。近探

皇唐始戎由余之見幾終尙可孤之著節寫諸琬琰播狼胥瀚海之聲炳若丹青掩麟閣雲臺之美袞鉞中嚴於筆削絲綸下逮於兜離感以至誠喜溢淄青之詔陳之大訓榮逾飛白之書俾觀古以知今用變夷而之夏信王者懷柔之大德妙聖人鼓舞之微權彼呼韓請朝特位侯王之上乃寶融歸款邊蒙圖傳之頌然未有襲我冠裳爲王屏翰稽顙而臣闕下穹廡獲齒與內藩推心以置腹中文字遂通於殊俗允矣聖朝之盛事昭哉史冊之休光臣等材謝請纓籌疏借箸元戎十乘期廣六月之詩干羽兩階幸覩七旬之格瞻龍顏而有喜肅虎拜以揚休伏願居安慮危柔遠能邇如天覆幬益隆下濟之謙未雨綢繆彌切外寧之懼戢干戈囊弓矢萬方偃武以修文役印笮朝冉駟億載宅中而圖大

# 明張文忠公全集

文集七

辛未會試錄序

隆慶改元之辛未。復當會試天下士。屆期。禮部尙書臣晟。侍郎臣希烈。臣大綬。以請。上若曰。茲籲俊登獻。惟重典。其命輔臣居正典試。學士調陽。輟講筵事副之。臣祇奉明命。不勝大幸。伏念臣一介草茅。經術淺陋。往荷先帝簡拔。侍上於潛邸。時時誦說所聞。得效啓沃。及上登九五。錄用舊學。卽召臣入贊機務。一歲中。遷至孤卿。夙夜兢兢。念皇上所以拔任臣者。卽捐糜一身。何足用報。惟當蒐羅天下才雋。以布列周行。共熙帝載。庶足以仰酬其萬一爾。有告臣曰。某也賢。克稱厥位。輒手記而心存之。薦達之恐後。某也能克任厥職。亦手記而心存之。薦達之恐後。然負奇抱藝。伏在草莽者。未有以聞也。乃今謬司校文之任。得以盡觀天下士。簡汰而蒐拔之。則所知益廣。所薦達益多。而區區圖報之忱。亦可藉是以少塞矣。豈非臣之至幸。至幸者。與。乃以二月己亥。偕臣調陽。及內外諸執事。陛辭入院。合兩畿諸省前後所貢士四千三百餘人。如故事。三試之。戒諸執事。咸旣乃心。試題必明白正大。無或離析章句。以爲奇異。無或避忌趨好。以長諛佞。掄文必崇尚雅正。無或眩華遺實。以滋浮靡。有能綜覽古今。直寫胸臆者。雖質弗棄。非是者。雖工弗錄。蓋閱二旬而告竣。遵宸斷。取四百人。梓其姓名。與其文之優者。爲錄。以獻。錄旣成。臣與臣調陽暨諸執事。聚而觀之。曰。文不近實矣乎。僉曰。實矣。士能盡如其文矣乎。曰。未可知也。雖然。旣以是取之。敢不以

是望之。顧諸士脫蒯屨而登王庭。猶未知上意之所嚮。與己之趨者。宜何如也。臣請告之。以定厥志。臣聞世之治也。恆自文而返質。其既也。恆自質而之文。昔者孔子欲損周之文。從夏之忠。而不可得。有能究禮之本者。則深嘉而亟歎之。誠達於時宜如此也。明興二百餘年。俗凡幾變矣。我皇上嗣大歷服。於茲五年。懸象布令。作則垂範。一切務剝剝枝蔓。以崇本質。省章奏之繁詞。握默運之元柄。言不靳工。期盡誠款。行不靳卓。取裨實用。側席寤寐。惟欲得忠信誠慤。直諒不欺之士。而任之。故臣敢以諸士進。夫帝有帝臣。王有王佐。霸有霸偶。今上所修帝道也。諸士固且願爲帝臣。其上一乃心。端乃志。毋作僞以亂真。毋矜名以示異。毋竅言而不中其實。毋詭故而近人情。寧拙而遲。毋巧而速。寧有瑕而爲玉。毋似玉而爲石。忠信直質。以事其上。若是斯可以爲帝臣。而無負於今日之舉矣。不然。是主與臣意異矣。臣主意異。不能治三家。況天下乎。臣事皇上久。竊有以闕上意之所在。故於諸士始進之日。而告之。以此。夫士有才而不以進。有司之過也。主德不宣。申令不熟。標準不立。約束不明。臣等之過也。主德已宣。申令已熟。而衆弗率。則士之過也。若是者。謂之躧冶之金。匠者睨而棄之。邦有常刑。臣不敢庇於戲。登茲錄者。可不勸哉。可不懼哉。

## 少師存齋徐相公七十壽序

往余讀中祕書。則公爲之師。公相業在嘉靖末。及隆慶初。而請老。今上嗣位。公年始及老。蓋家居者三年矣。余旣爲公門人。不自己。又從公政府之後。諸所爲佐國家者。一惟公是師。公生之辰。卽不及奉觴爲壽。禮宜有言。今世稱人仁壽者。以爲家人言耳。然其理不可易也。彼直以煦煦言仁。未睹仁體。夫仁於乾坤爲元。是天地之大德也。於人則無偏無黨。無反無側。無作好惡。君體之而相調之。公嘗善程夫子之言仁。

以訓學者。蓋其所自得也。故其相業。海內能言之。余未暇論。第觀庚戌而上。暨于嘉隆。君子小人之進退。士風民俗之清濁。朝廷邊鄙之休戚。如陰晴復開。如沍寒復燠。誰爲此者乎。公方且作而不辭。生而不有。功成而不居。應天之道。年未及而引退。夫貴以身爲天下。可以寄天下。愛以身爲天下。可以託天下。淵乎微哉。吾以此識仁體矣。天道無心。誦信皆仁。皇極無私。與物委蛇。子貢稱博施濟衆爲仁。孔子告以己欲立立人。己欲達達人。故人己一體。立達一心。是不必己。非不必人。名不必己。歸功不必己。出蕩蕩平平。可以爲天下。可以保真。可以引年。故廟廊亦仁。巖藪亦仁。匹夫匹婦。與被其澤。亦仁。一介不以取予。亦仁。由耕野而保衡。不以其故增益。保衡而復于耕野。不以其故貶損。未嘗不施。未嘗不濟。亦不必於施。亦不必於濟。是以常施常濟。常施常濟。故常仁。常仁。故常壽。昔漢安昌侯老長安。車駕數親臨問。而學士不免疵議。宋溫國居洛十五年。絕口不言事。上亦不之問。而豎卒遠夷。知名。稱真宰相。司馬。隱然倚以爲重。此遵何德哉。假令君實耄期無恙。天下固願之人。情如此。天道豈遠哉。故公之壽。不必吐內導引。而長生久視。可懸策已。大易爻義。乾元取象。或潛而勿用。或見而文明。或亢而有悔。或羣而無首。此之休咎。不占可知。公畢在田之業。崇用九之德。高而不亢。返于初潛。其道無疆。利永貞矣。天下方以公爲善。蔡何可一日無也。天子孳孳聖學。銳意太平。慕古憲乞之義。廩求舊之思。業詔有司存問。異日者。將禮三老五更于太學。固我公矣。夫仁於天下爲元氣。以佐天下爲元勳。故公位爲元臣。齒爲元老。無論家居矣。後來者遵公約。東庶幾畫一之治。竊比於宋元祐耆碩者。公何啻君實。願余於呂晦叔何如耳。

少師存齋徐相公八十壽序

今年吾師存翁徐老先生壽登八秩。九月二十日。其懸弧之辰也。先是居正等從閣中上書。言今中國有大慶。覃恩字內。則大臣致政家居者八十以上。有司以禮存問。九十以上。遣官存問。至于優禮輔臣者。舊則有不可以例拘者。嘉靖間。大學士王鏊謝遷。皆年屆八十。悉得遣問。今原任少師徐階。今年正八十。比之王謝諸臣。齒德相同。而勳業之赫奕。有非諸臣所能及者。臣等昧死。敢邀天恩。幸從遣官之例。以彰聖朝崇禮耆碩之美。上亟報可。降璽書。遣大行人往。又特賜白金文綺蟒衣。於是海內爭相傳頌。天子至意。而吾師洪勳茂德。又足以當明眷。煌煌哉。盛舉曠世所希。邁也。居正嘗謂士君子所爲。尊主庇民。定經制。安社稷。有自以其身致之者。不必身親爲之。而其道自行于天下。其澤自被于蒼生者。竊以爲此兩者。惟吾師兼焉。當嘉慶季年。墨臣柄國。吾師所爲。矯枉以正。激濁而清者。幸及耳目。其概載在國史。志在縉紳里巷者。長尙能道焉。此以身致治者也。比成功而歸老也。則挈其生平所爲。經綸蓄積者。盡以屬之居正。居正讀書中祕時。旣熟。吾師教指。茲受成畫。服行唯謹。萬歷以來。主聖時清。吏治廉勤。民生康阜。紀綱振肅。風俗樸淳。粒陳于庾。貫朽于府。煙火萬里。露積相望。嶺海之間。氛廓波恬。漠北驕虜。來享來王。咸願保塞。永爲外臣。一時海內。號稱熙洽。人咸謂居正能。而不知蓋有所受之也。此不必身親爲之者也。故此兩者。惟吾師兼焉。夫士君子修身理天下。孰非精神之所運用。天旣厚吾師精神。以發祥于事業。施之後世。皆可爲法程。蓋其運用也大而久。大可以扶皇極。錫庶民之福。久可以延世運。培萬年之祚。及其歸藏林壑。頤老煙霞。以其餘者。授之于人。而以其精者。斂而自壽。今壽躋八袞。而精強神王。其聰明步履。雖新壯少年。有弗如。本之天所以篤祐。原與衆異。而吾師自善爲調攝。以承天意。推此言之。自茲以往。度爲百



千蓋未可量也。居正將次第執簡而修祝焉。懋修曰：先公爲此文，方病危急，且屬續矣。趣懋修亟請許穎陽相公具草，及許先生稿成，而全未用，乃力疾自草，及爲徐師相請存問疏，皆自爲之。其尊師之心，將死不衰也。

### 壽封翁觀吾王年丈六十序

余與宣城觀吾王子同庚子鄉試。余時年十六，王子年三十七，王子博學邃養，厚積而晚發。余以童稚淺薄，謬爲有司所錄，獲從王子之後。其視王子，丈人行也，不敢肩隨焉。數年，王子始仕，爲理臨江府晉甯州太守，致仕，而其子道甫舉壬子鄉試第一，登進士，拜南宮，王子自其家來視道甫，會余京師，相與道故事，絅疇好，蓋去庚子之秋二十餘年，而余亦年三十七矣。顧視王子，則其貌蒼然而光，其氣盎然而揚，神清體健，無殊疇昔，而余以多病早衰，平居氣不充形，臨事力不副意。昔人所謂已成老翁，但未白頭耳。憶與王子並翼秋風，同聽鹿鳴，當其時，余爲少年，王爲壯夫，乃今轉盼之間，遂成陳跡，不惟浮名身外，無可控傳，卽吾所有之身，已非曩時之舊矣。是不亦可慨也哉！夫人身百年耳，而精神意慮，每隨血氣以爲盛衰，往往見人其盛時，氣若奔馬，顏若樛華，或奮於義氣，臨大難，決大疑，議不返顧，計不旋踵，虎視一世，而心雄萬夫，及其形摧力盡，志靡心灰，蓋有百鍊之剛，化爲繞指者矣。故騏驥罷於遲暮，強弩頓於末力，若是者，豈其勇怯彊弱頓殊哉？無道以馭之，而隨其氣以爲盛衰，是以日徂月化，而莫能自止耳。夫惟至人有道之士，其天定，其神凝，其天定，故不與世俱移，其神凝，故不與形俱敝。方其壯也，衆方馳騖，剽而彼或斂之若無，及其老也，人皆萎憊沮喪，而彼則鍊之愈銳，四時之變，生長凋謝，日交代乎前，而其守如一，則

有道以馭之也。故強弱氣也。榮瘁形也。不作而自強。不澤而常榮。非形非氣。湛然常存者。是不可得而名言也。嗚呼。非天下之至深。孰能與於此哉。今年七月十二日。王子年六十。道甫以余有世講之誼。斬余言以爲壽。余觀王子。年雖周甲。體力方彊。別來數十年。精神意氣。曾不少變。蓋若庶幾乎有道以充其形。而不隨氣以爲盛衰者。余也。知雖及之。力有弗逮。世務溷其虛明。趣舍滑其思慮。常恐日月易往。與衆俱盡。追維今昔。深用慨然。異日且當與王子杖藜擔笠。遺世獨往。登祝融。躡鹿門。以求所謂至人者。而證之。王子其肯從我哉。

## 翰林爲師相高公六十壽序

聖賢之學。始於好惡之微。而究於平治天下。好惡得其平。則因應無爲。不降階序。而萬務成理。書曰。天壽平格。保乂有殷。言天無私壽。惟至平格天者。乃壽之以保乂王家。夫相臣佐天子。理陰陽。順四時。長養萬物。總攝衆職。其道鴻矣。乃書稱格天基壽。保國乂民。不外乎平之一言。則致理之要。斷可識矣。今少師高公起家詞林。已隱然有公輔之望。公亦以平治天下爲己責。嘗與余言。大臣柄國之政。譬之提衡。與之輕重。與之低昂。而已無與焉。在皇極之疇。曰無偏陂。無作好惡。無偏黨反側。而後人無有比德。民無有淫朋。是謂平章軍國之理。余深味其言。書之座右。用以自鏡。其後與公同典冑監。校書天祿。及相繼登政府。則見公虛懷夷氣。開誠布公。有所舉措。不我賢愚。一因其人。有所可否。不我是非。一準於理。有所彰輝。不我愛憎。一裁以法。有所罷行。不我張弛。一因於時。無兢兢以貶名。無屑屑以遠嫌。身爲國相。兼總銓務。二年於茲。其所察舉汰黜。不啻數百千人矣。然皆詢之師言。協于公議。卽賢耶。雖仇必舉。亦不以其嘗有德於

己焉。而嫌於酬之也。卽不肖耶。雖親必斥。亦不以其嘗有惡於己。而嫌於惡之也。少有差失。改不旋踵。一言當心。應若響答。蓋公向之所言。無一不售者。公信可謂平格之臣已。夫皇極之道。人主所以斂福錫民者。而佐之實在輔相。今天子恭默虛己。委任丞弼。蓋將執皇極之要。以斂福錫民。而得公平格天之佐。提衡秉鈞。斡旋默運。則悠久無疆之業。自可不勞而成。天祐國家。亦必將錫之遐齡。畀之多祉。使海內熙熙登春臺。而享太平。公其躋於福壽康寧之域。如書所云者。必不誣矣。余無似。獲從公後。廿有餘年。茲又奉上手詔。諭以同心輔政。自惟駑下公之才。十倍於余。何足以仰贊其萬一。亦惟以公素所以教我者。而共相勵翼。以仰副主上之委託。則余亦有榮幸焉。今年公六十春秋矣。翰林諸大夫。將以公誕辰。奉觴於公。而徵余言。以爲祝。余惟公文章功業。炳輝烜赫。皆諸君所親見。旣已筆之史冊。光昭若來世。無俟余言。第論其學術之奧。基壽保國乂民。其道由此。且諸大夫列官詞壇。鍾公芳躅。他日皆有平章責者。其亦聞余言而得所師承焉。

門生爲師相中元高公六十壽序

天祐國家。必有耆碩魁壘之士。以據鼎軸而斡機衡。然後其主不勞。而休美無疆之業。可衍而昌也。自昔有道之長。莫如周。周之盛。莫如成王。成王時相業。莫如周公。史稱公相武王。五十有八載。其負黼屨而佐嗣王。又十有餘年。已乃還政而歸東周。留東周者又七年。蓋公是時。春秋高。閱天下之義理多矣。身爲太傅。操冢宰之權。而上不疑。周道以隆。天下歸德焉。老成人之重國家。固如此。今少師中元高公。相肅皇帝。及今天子。有年矣。入則陳王道之闕。啓乃心。納乎聖聽。出則兼冢宰之重。鳩衆材。庀乎主職。以余所睹記。

按公旦之往迹。抑何符也。公嘗授經天子。天子改容而師事之。比參大政。發謀揆策。受如流水。其著者。肅皇帝憑玉几而授顧命。天下莫不聞。論者乃罪及方士。汙讎先皇。規脫己責。公爲抗疏分辨之。君臣父子之義。若揭日月而行也。虜從庚子以來。歲爲邊患。一旦震懼於天子之威靈。執我叛人。款關求貢。中外相顧駭愕。莫敢發。公獨決策。納其貢獻。許爲外臣。虜遂感悅。益遠徙。不敢盜邊。所省大司農芻粟。以鉅萬計。曹沛淮徐間。數苦河決。公建請遣使者。按視膠萊河渠。修復海運故道。又更置督漕吏。諸申飭法令。會河亦安流。舳艫銜尾而至。國儲用足。是時方內乂安。四夷嚮風。天下翕然稱治平矣。公猶弗康。日兢兢與九卿百執事。講究實政。甄別吏治。問民所疾苦。撫摩而噢咻之。雖桑土綢繆。不劬於此矣。始公方柄用。遭忌者。言郝婁不可詰辨。公避居東山。意豁如也。居二年。再入政府。衆謂是且齟齬諸言者。公悉待之如初。未嘗以私喜怒爲用舍。踰年。再上書請解銓務。上手詔慰勞。恩禮有加焉。雖赤烏遜膚。不泰於此矣。公才略蓋世。又天子師也。而滋益恭親賢愛士。實能容之一事之善。稱不容口。一言之當。決若江河。雖吐握延接。不勤於此矣。昔公旦修此三者。令聞長世。爲國元老。而公之功德爛然。後先爭烈。年已六十。聰明步履。有踰少壯。其於上壽。猶掇之也。今天子基命宥密。孰與成王賢。其委任公。不在周公下。薄海內外。皆躡足抗手。歌頌盛德。卽余驚下。幸從公後。參預國政。五年於茲。公每降心相從。宮府之事。悉以諮之。期於周召夾輔之誼。以獎王室。此神明所知也。由此言之。國家休美無疆之業。溢於成周。雖有巧歷。莫之能得。茲於公而卜之矣。嘉平之十又三日。爲公誕辰。公所舉鄉會士百有餘人。斲余言介壽。而余爲舉其大者著於篇。夫春陽煦物。百卉咸榮。而迎曦含旭。桃李爲最。諸君皆公桃李也。公今行周公之道。萃宇宙之太和。躋一

世於仁壽而況近在門墻者乎宜其感悅愛戴倍於恆情云

重刊西漢書序

自孔子沒而春秋絕。後之論史者。乃獨稱遷固。遷據左氏國語。世本國策。作史記。而固承父彪之後。修西漢書。然子長之書。雖馳騁該博。類取雜家小說。以實之。其爲文多不馴雅。不如固之簡嚴明切。敘次有紀。何也。遷所涉獵者。廣帝王本紀。多尙書之文。世家列傳。又本左氏家語。及楚漢春秋。所錄上下數千載間。諸史百氏。靡不通貫。而固獨取漢書。成一家之言。以故其言醇而不駁。緝雜彩者。難爲工。製段錦者。易爲力。茲其所以異也。然固雖直述漢事。而褒貶論贊。比類引合。其意又有存于紀述之外者。敘周勃傳。而不錄其汗出沾背之恥。敘董仲舒。而不載其議和親之疏。忠厚之至。爲賢者諱。志郊祀。則備詳于淫黷之制。志禮樂。則三復乎仲舒劉向之言。凡皆有深意。非淺識者所測也。至其準陰陽。窮人理。總百氏。貫古今。訓辭爾雅。文質彬彬。蓋自史遷以來。一人而已。世儒皆喜譏斥前輩。或謂固貴諛僞。而賤死義。又謂敘司馬遷揚雄傳。不當取其自敘。而曲記其世系。不知作史之與立言傳道。其事不同。彼立言者。稱度衡量。不敢有一言之偏。以幾垂訓也。至于作史不然。要在紀其實耳。雖其是非頗謬于聖人。然或出于一時憤激之言。非可爲典要也。若固所述。定邪正。推幽隱。雖不可上擬于春秋。然下視蔚宗陳壽之儔。猥俗闊略者。可同語哉。今議者。不本其大旨。而特毛舉數事。以病固。愚竊以爲過矣。語曰。一人作之。十人聚而議之。正使此輩執筆操觚。與固絜其短長。所創作或未必逮固。而徒紛紛以議之。不亦恣輕詆之私。傷旁通之誼哉。三代而下。西漢之治。最爲近古。所尙皆淳朴忠厚。非後世所及。學者覽此。不獨可以觀良史之才。亦可考

知其世變也已。

刻灤州志序

余嘗披輿地圖。觀京師形勢。周覽畿甸。馮翊之區。未嘗不欣然仰皇居之勝也。今灤志可見矣。灤蓋碣石地。自黃帝肇域於涿。獯鬻遠遁。始被淳風。周時孤竹二子。以其國讓。又避紂居北海之濱。今其俗猶慷慨。狷忿。尚廉讓。有夷齊之風焉。然自黃帝以來。異姓迭興。皆在伊洛。崑函之間。則灤之距中州。蓋數千有餘里。或淪沒於夷狄。其幸者。乃僅同于邊郡耳。我國家建都幽冀。以控制蠻夷。則太行以東。薄海皆左輔之地。而灤之去京師。僅數百里。層巒疊嶂。週迴環拱。披拂皇風。密邇天邑。蓋屹屹乎重鎮矣。嘉靖乙巳。養吾陳子。以王命來守茲土。越明年。政成民安。百廢具舉。乃周視四封。躬按往牘。考世系之傳。遡土風之舊。喟然嘆曰。昔詩人咏歌周業。始乎二南。豈不以王風所被。自近及遠者乎。今灤土亦王郊也。予牧於茲。一方之事。闕而不載。上無以比于周風。下無以昭示來世。余有甚懼焉。于是蒐羅載籍。博訪耆舊。編摩閱葺。歲乃成帙。彙爲五卷。曰世編。曰疆理。曰壤則。曰建制。將以授梓。馳書請余爲之序。夫州郡之有志。猶國之有史。周禮職方所載。八索九邱。小史之帙。尙矣。蕭相入關。先收秦籍。襄郊之迷。識者病焉。夫以宇宙之寥廓。萬類之區分。古今之沿革。陵谷之遷換。山川方物。詭狀殊形。精察強記。有所弗逮。然據程按牘。半武不出于戶。而通塞畢諳者。以有志焉耳。且灤固北邊要郡也。自三代以來。雖漢唐盛時。猶不能盡隸中國。況五季而後。蠻夷猾夏。腥穢同風。寧復知有禮義綱紀。民彝如今日者乎。今幸而釋椎髻而冠裳。又幸而列于畿輔。爲聲教之所首被。蓋自黃帝至于今世之相去數千有餘載。而藩屏之勝。絕代懸符。文物之隆。後先

相望。則夫侈國家輿圖之廣。記斯地蠻夷之迹。以垂示于不朽者。微斯文。烏能有徵於後世哉。若夫證往古以昭鑒戒。則世編可考。經畫野以奠民居。則疆理可稽。壤則示惟正之義。建制昭民力之存。規畫經理。寓于彙括之中者。開卷可得矣。吾又安知後之宦于斯者。不藉以爲指掌之資乎。則是書也。其有繫于灑者重矣。敬贅數語簡端。俾省方者。有以觀焉。

### 送李漢涯之永清序

昔蜀蘇氏父子。皆以文章名於時。余自總角。則愛誦蘇氏文。觀洵之作。實勝二子。然二子之名。乃獨顯。何也。洵之走京師。歷抵諸公間。當是時。意在暴其子之所長而已。及其望實已著。軾轍之名冠海內。而洵竟老。無以自見於世。以故其名。寢以不章。若洵殆。斬其發。祕其光。讓其子以爲名者焉。李侯漢涯。少負奇氣。善屬文。爲當時名士。許少華輩所稱重。方侯壯盛時。屈指計日。謂卿相不足取者。然竟落落不偶。而其子元樹。元性。以學顯於時。元樹與余同舉進士。元性亦舉於鄉。旦夕且見進用。兄弟躡踵摩肩並起。少年有稱譽光顯矣。而侯年六十。乃得一縣令。嗟乎。人之處世。遇合誠有命也。若侯者。豈非命邪。抑亦靳其發。祕其光。讓其子以爲名者邪。然余聞之。厚積者遠發。蓄碩者用充。譬之於物。取精多而受氣足。則其發之必遲。華必實茂。侯之未去京師也。曾一再過余。余視其貌甚健。視聽明氣。沖沖然銳也。爲余言。今吏不能有益于民。爲寵賂以敗類者。凡皆欲自顧其私。富厚滋潤。爲子孫計耳。今吾起布衣。素貧。二子已幸自立。雖富厚滋潤。無所庸。凡吾所以來。亦欲以庶幾乎平生之蓄志。又焉求乎。觀此。亦足以見侯之心矣。夫其孕美含精。旣讓二子以成其名。而磊落瑰偉之概。數十年慳淪坎壈。百不試。一晚乃效用於時。而復無時俗。

所謂計子孫富貴滋潤者。則雲蒸龍變。憤發其所蓄。必有過人者矣。豈特如洵之終以文名家者哉。侯之行也。鄉士大夫。餞侯于郊。使不佞致詞焉。余觀侯之事。絕與蘇氏父子間相類。因紀其事如此。若其子之爲軾爲轍。功名所就。固可預料。然亦不必論也。

## 重刊大明集禮序

王者治定制禮。因時立制。累數十年。然後乃備。周至成王。周公始制禮作樂。漢儀之定。乃由武帝。雖文景之富。有未遑焉。而當時仲舒劉向王吉班固之儔。猶以大儀不具爲恨。蓋創制作則。更化宜民。若斯之難也。至我國家不然。高皇帝以神武定天下。承胡元極衰之敝。經制大壞。先王之典。無有存者。當是時。又攘除羣雄。殄逆討叛。迄無寧歲。而將相大臣。皆武力有功之人。至于稽古禮文之士。莫有任其責者。高皇帝天縱神聖。兼總條貫。天下甫定。卽命儒臣。興制度。考文章。以立一代之典。于是陶安定郊社。詹同定宗廟。劉基定百官。魏觀定祝祭。陶凱定軍禮。而曾魯徐一夔。董彝梁寅。又總其綱領。綜其條目。彙爲大明集禮一書。蓋編摩綴拾。雖出于一時諸臣之手。而斟酌損益。皆斷自聖衷。是以經紀無遺。巨細畢舉。夏商以後。議禮之詳者。莫如成周。而我皇祖之制。實與之準焉。自今觀之。周吉禮十。今集禮之所存者。十有四。周凶禮五。今集禮之所存者。二。至于軍賓嘉禮。莫不師其遺意。酌夫時宜。蓋纖悉委曲。雖頗不同。而通變移風。則後先一轍。然成周之典。具于治功平定之後。而我朝之制。定于傾側擾攘之間。緩急疏密。又度越前代遠矣。嗚呼。此豈非傳之所謂大聖乎。非大聖焉。能當此制作之任者乎。孔子稱夏殷之禮。文獻不足徵也。周監于二代。郁郁乎文哉。吾從周。明興百八十餘年。高皇帝作之于前。今天子述之于後。奕世載德。重熙



累績稽古禮文之事。褒然具備矣。則所以一民之行。而易民之俗者。又奚必遠有所慕諱。記曰。明其義者。君也。能其事者。臣也。其數可陳。其義難知。雖然。非數則義安所取徵哉。義非愚臣之所能窺也。數則有簡編存焉。因重刻而序之。用以陳其數焉爾。

贈畢石菴先生宰朝邑敘

善宦者流。嘗輕詆理學之士。以爲不適於用。且曰。爲政惡用學爲哉。夫守經據義。士所先也。聰明彊幹。吏所先也。欲爲政而從事于學。泥矣。張子曰。不然。吾聞古之君子。終始典于學。居則學于父兄宗族。出則學于君長百姓。莫非學也。跡之顯晦。烏能間之。昔者帝舜起匹夫。攝百揆。及爲天子。闢四門。明四目。達四聰。好問好察。邇言至。與其臣禹契皋陶輩。詢言陳謨。規誨不倦。推其言。殆若居木石而友麋鹿。無少異者。聖人之學。其純如此。廣漢延壽之倫。世所稱能吏。然闕於學術。不知道不能正己格物。而務爲一切。以求愉快。故終不可大用。試使理學之士。商功利。課殿最。誠不若廣漢延壽。然明道正誼。使天下回心而向道。類非俗吏之所能爲也。夫欲舍學以從政。譬中流而去其楫。蔑以濟矣。他日以告石菴子。石菴子曰。然。吾聞天之道。不息故久。君子之學。不已故純。詩曰。學有緝熙于光明。動靜者時。翳寂者境。顯晦者遇。不二者。心有所間。則不能緝熙。不緝熙。則光明息矣。往之一息。謂之古。來之一息。謂之今。古今之遼邈。曾不能以一息。而泥于顯晦之間乎。故學無間于顯晦。然後其志一。志一。然後其神凝。如是而暢于四肢。發于事業。則其政精覈。推此以言。則政亦學也。世言政學二者。妄也。無何。石菴子出而仕。爲朝邑宰。張子過石菴子。石菴子曰。吾何以辦朝邑哉。張子曰。曩子言之矣。今將去父兄宗族。而學于君長百姓。願無忘緝熙。以成

光明之治。石菴子曰。茲行吾有大懼焉。蓋學非言之難。用之爲難。恬而夷者非難。紛而劇者爲難。曩吾言之。今將用之。曩吾處其恬而夷。今吾處其紛而劇。夫以匹夫匹婦之勝。予愛憎毀譽之橫發。絲棼碁布之事。交集于躬。一或少懈。皆足以移吾之志而滑其心。茲行也。其克遂吾志而益其所不能者。在是其弗克有成。而隳吾學者。亦在于是也。吾奚爲而弗懼。張子退而謂人曰。石菴子學當益進矣。夫志成于懼。而荒于怠。懼則思。思則通微。懼則慎。慎則不敗。能思而慎。何替之有。詩曰。溫溫恭人。如集于木。惴惴小心。如臨于谷。懼之謂也。持此以往。雖以天下可也。況茲一邑。異時理學之士。爲善宦者。詆也。吾得用石菴子解矣。

## 贈荆門守黃君陸開封貳守序

黃君旣晉開封貳守。舊僚某子。曾爲文以贈之。黃君曰。吾思得史張氏文也。夫余之不能以言悅人也。君知之矣。君知之而必欲余言。是君不欲人以言悅己也。言者不悅人。而聽者不悅人。則雖有質直之詞。必不逆於耳矣。於是張子遂言曰。吾觀今之爲治者。而知吏之難也。夫吏之難。非治民之難也。事人之難也。非得下之難也。悅上之難也。夫事使之數不同。而人之材力有限。譬以什計也。間僻之地。事簡而慮優。吏之材力。五在上而五在下。其半猶及民也。稍繁。則逮下者什三而已。又繁。則逮下者什一而已。爲人上者。又以愛憎喜怒殿最之。則雖有倜儻卓犖之士。必不能以什一者事上。而以什九者逮下。何則。勢所趨便也。荆門山厚而土沃。往隸荊州時。在屬邑。最爲殷阜矣。及改隸承天。大工數起。徵賦百出。又當郢鄧蜀漢孔道。長吏日奔走救過不及。何暇治民事。黃君爲之比及三年。政成民恬。雖不逮于上。亦不貽戾于下。以故聲望旁達。擢晉大郡。然亦勞且瘁矣。蓋時之難也。夫開封之視荆門。則又繁矣。貳守尊秩也。會城勞蔽。

也秩尊則上之責之也。彌重勞萃則下之望惠也。愈難君能以其什一者事上而能以其什九者逮下乎。夫人趨亦趨。人驟亦驟。則無貴於爲士矣。往者余過荆門。謁象山先生祠。繼讀其文。觀先生在荆門時。與友人書曰。今治道益衰。吏爲機巧。溺意功利。失其本心。夫唯有志障百川而東之。其見知于庸人。必見知于識者。不蒙錄于上。必有利于于下。卓哉斯言。故先生在官。雖平屯田一事之微。必與監司反覆詳勘。務求便于民而後已。卽忤上不恤也。嗟乎。非有道獨行不改。能不受驅于流俗如是乎。今先生去此數百年。世之富貴尊顯者。蕭蕭然澌盡久矣。而先生名德爛然終古。擷芳薦藻。報祀不輟。其所得孰多孰少。此亦足觀矣。黃君與先生爲同鄉。數十年後。復躡遺跡。宦于此州。聞君在治。常飾新先生祠宇。朝夕瞻對。景行流風。必有感者深矣。今茲行也。余亦唯述先生之言行以告。遂致期望之意焉。

賀雲溪翁汪老先生八十壽序

世之言養生者衆矣。皆謂出于老氏。書傳于世者。獨五千言。皆天道元虛。上古皇農之道。而歸本于含神抱一。清淨自正。蓋聖人之學。內以修性。外以理人。其道甚近。而其效可睹者也。今世言神仙者。亡慮數百家。高者入寥廓。卑者雜污穢。其言幻幻漫漫。而莫得其紀。其效茫茫唐唐。而莫知其歸也。一切謂出于老氏。不亦誣乎。余爲此言。他日以質諸九江守。今致政汪公公曰。然。夫馳思于千里。不若跬步之必至。噉喙于象豹。不若糲糠之充腹也。言者率曰。沖舉曰。委蛇。沖舉委蛇之稱。日譁于耳。而其事了不可得。華山之下。白骨如莽。烏覩世所云者乎。莊生有言。養善馬者。去其害馬者而已。然則善養生者。去其害生者而已。夫人形太勞則敝。神太勞則竭。故曰。毋勞爾生。毋搖爾精神。將自寧。斯不敝之道也。今釋此不驚而希心。

滢蕩以觀非望。是安可幾也。公之言如此。蓋公之所以理性養形者。亦不外是云。今年春。公年八十矣。齒宿而德愈新。身老而神益王。余嘗見公語。或移日。及退。如初見時。無一語不倫次。至論家國事。從容道。故稱說往古。霏霏如屑瓊玉。有味乎其言之也。飲酒。或至夜分。坐客踰踰倦矣。公徐正衣冠。揖拱乃出。乃其聰明步履。卽新銳少年不逮也。嗟乎。彼學爲冲舉委蛇者。其卒有如公者乎。故知世所言悉妄耳。斯其得失之略。可觀也。春曦旣旦。淑景轉移。同鄉諸君登臥雲堂。歌南山之什。以觴公。張子曰。余論養生之事。而知公獲壽所繇也。作原壽。

玉林清賞詩序

雲溪汪公致政餘三十年。築于江南之野。襟亢雲林。踪絕城市。躬耕樂道。澹如也。太守定山袁公慕其誼。特渡江造其廬訪焉。飲于竹間。觴咏酣適。爲詩數章。是時。獨柱史龍洲君與偕。諸君皆莫從也。其後聞者。皆依韻賡酬。總若干首都爲一帙。題曰玉林清賞。夫長吏民之表也。賢士產之賢也。古者爲政。重于得人。而賢者又以道自重。故然明抗行。仲舉竇徐。談者躋之。世降道喪。斯義幾微矣。乃今穴居名彥。大夫垂訪。諸君感鳴鶴之應。邕邕焉。鏘鏘焉。夫亦行古之道也。斯事雖細。義有足稱者。詩云。子子干旄。在浚之郊。素絲紕之。良馬四之。大夫之謂矣。兼葭蒼蒼。白露爲霜。所謂伊人。在水一方。雲溪子有焉。是庸序之。以貽厥後。

# 明張文忠公全集

## 文集八

### 贈水部周漢浦權竣還朝序

荊州權稅視他處最少。居吳楚上游。舟楫鱗萃。稱會區焉。迺後稍稍寥寂。商旅罕至矣。漢浦周子始至。申甲令。釐宿弊。平物價。恤無貲。賦視舊額。務在輕貸。輿人誦焉。張子曰。余嘗與周子論始所建權。及後稍異者。其略曰。古之爲國者。使商通有無。農力本穡。商不得通有無。以利農。則農病。農不得力本穡。以資商。則商病。故商農之勢。常若權衡。然至于病。迺無以濟也。異日者。富民豪侈。莫肯事農。農夫藜藿不飽。而大賈持其贏餘。役使貧民。執政者患之。于是計其貯積。稍取奇羨。以佐公家之急。然多者不過數萬。少者僅萬餘。亦不必取盈焉。要在摧抑浮淫。驅之南畝。自頃以來。外築亭障。繕邊塞。以扞驕虜。內有宮室營建之費。國家歲用。率數百萬。天子旰食。公卿心計。常慮不能殫給焉。于是徵發繁科。急于救燎。而權使亦頗驚益賦。以希意旨。賦或溢于數矣。故余以爲欲物力不屈。則莫若省徵發。以厚農。而資商。欲民用不困。則莫若輕關市。以厚商。而利農。周子曰。卽如是。國用不足。奈何。張子曰。余嘗讀鹽鐵論。觀漢元封始元之間。海內困敝甚矣。當時在位者。皆捭擊言權利。而文學諸生。乃風以力本節儉。其言似迂。然昭帝行之。卒獲其效。故古之理財者。汰浮溢。而不驚厚入。節漏費。而不開利源。不幸而至於匱乏。猶當計度久遠。以植國本。厚元元也。賈生有言。生之者甚少。靡之者甚多。天下財力。安得不誦。今不務除其本。而競效賈豎以益之。不

亦難乎。周子聞余言，則心是之。雖余亦自謂唯周子可以爲此言也。無何，周子事竣代歸。鄉大夫諸君，祖于江上，徵余言以爲贈，而余以病不能文，因識其所以爲議論者如此。

## 贈袁太守入覲奏績序

凡俗之害於政者，姦民梗玩，伏機隱慝，以詞上之，覺謂之曰民蠹。貴家侈族，持吏短長，數干謁以撓正，謂之曰權蠹。此最大患也。吾郡幸無此二者，而昔之治者，往往稱艱，何哉？蓋其弊有二，所從來久矣。其一，宗室歲祿，仰給有司，異時諸宗中有號爲貧者，數十百人，日入公府，喧呼橫索，欲盡應所求，則民力不給，卽不應，輒喧呼醜詆。太守日與是曹，酬接不暇，又何暇治民事乎？其二，守庫藏吏，與諸王府中卒養廝隸，深相結納，因緣爲姦，鑿倖孔以生厲階，以故俗日以偷。政日以壞，公始至，則廉吏之素欺罔者，數人，諸與爲姦利者，又十餘人，皆抵罪，乃下令曰：宗室歲祿，隨所食邑輸至者，輒散之，不足者，均之。其不順令，比吏爲倖孔者，罪之。於是諸宗貧富，皆得以次贍給，喧呼者不至，公復明甚，不可罔，卽數百里外，有欲爲銖兩之姦者，畏公知之，咸弭耳懼伏，不敢動。三年，郡中翕然，公府無事。異時，太守坐府中，僕僕勞瘁，至日，吁不遑食。若有重負於躬，不得遂去，以解公恆，以暇日與郡中士大夫登覽賦詩爲樂，意訢訢相安，不知爲繁且勞也。此豈與曩者殊俗易民哉？事有機，政有要，公乘其機，握其要，而徐圖之，故其治不肅而成矣。竊聞公知舊過視公者，視公久，理繁劇，咸願公早晉大位以去。公獨曰：不然，此固非佳處，然其民雖愚，而不知僞，其士大夫有恥，而不敢以私撓吾法，是猶足爲也。嗟乎，荒陬陋區，幸得藉公化理，民不敢爲蠹，士不敢爲蠹，而向之所謂二弊者，又皆已剔去。雖公之心，亦安能遽棄吾郡之人乎？然公始在郎署，用文行著聞，往

天子軫念吾郡之民。借公出守。固非久勞於外者也。今將入覲。天子嘉公治理。必將簡寘左右。以酬其勞。而司銓者。又將上公之最績。以風天下。則公雖欲不棄吾郡之人。尙可得哉。顧常以爲君子之政。仁必久而後洽。功必久而後成。漢時守令。便於民者。輒賜璽書。褒美稍增其秩。不數易之。故世之言吏治者。稱兩漢。然余不敢遠引異代。卽如國初。守令久者。至十餘年。而何文淵劉德。皆用太守積勞。擢拜九卿。重任而責成。故良吏輩出。治亦近古。此皆近事可覆者也。今天子旣已軫念吾郡之民。爲擇良吏矣。而遽奪之乎。公子吾郡之民。旣已拯引之矣。而遽棄之乎。復祖宗之舊。久任賢良。以興治理。是所祈於天子者也。有往來夙以慰答民望。是所願於公者也。余不佞。謹述公治郡狀。并致其借寇之意。敢以告於銓衡。

又一首

荊州領屬城十三。疆域之廣。甲楚中。其稱繁劇難治。亦甲楚中。異時長吏三四輩。率不勝任去。俗日以敝。民且無聊。吏部議擇郎署中。有威望精吏事者。彈壓之。宜可治。于是定山袁公。以祠部出守茲郡。至則按諸吏素犯法。及民梗玩。與吏交手爲市者。數人。郡中震懼。莫敢爲非。迺均宗祿。舉積滯。察冤獄。覃德惠。政成民安。府中晏然無事。上治績。更爲諸郡最。三年以例入覲。歸州知州汪一勺等。戴公倡率之化。就余圖所以爲贈者。而余適以賜告歸。故得遙觀大化之成。迺不敢辭。序曰。昔者仲尼嘆王化之闕墜。慨然稱曰。苟有用我者。期月而已可也。三年有成。夫聖人之治。非必神化捷速然也。蓋亦有資於時焉。夫賜者之望。雨也。見霽霽而鼓舞。寒者之乞溫也。睹束爓而挾纊。周衰列國。力政疲民。思欲息肩於有德。苟有聖人起而拯之。直易易也。假令仲尼當唐虞之時。處比封之俗。殆與其民相忘於無事耳。所謂可與成者。安可得

見哉。是故聖人乘敝而達變。智者因難而顯功。民之嗷嗷。固賢聖之所資也。往者荆之俗。常壞於積偷矣。公徐至而救之。曾不數年。竟以大治。何則。勢激者易成。願得者易與。當此之時。民之思良吏。如嬰兒之望慈母。故董之以威。則民畏而感之。以惠。則民懷。其勢居然也。茲非所謂乘其時者乎。往余在京師。見今之仕者。咸重內而輕外。而天官宗伯之屬。最爲優崇。尤不樂出補爲吏。卽欲出。亦自擇善地。簡僻易治者。然後去。以爲常。公始在蘭省。用清望著聞。及出守是郡。人且謂公難之。公恬然不爲動。蓋其氣愈平。故其政愈精也。嗟乎。孰知繁劇盤錯。更足爲君子樹立資也乎。雖然。不擇難易而受任者。人臣之分也。均節勞逸而校功者。勸臣之道也。余不敢知其他。竊見今用守令。與遷轉之法。率不量地之難易。事之繁簡。一以資格爲斷。太守治郡有效。滿歲稱職。財得拜一級。爲按察使副。卽有卓絕異等。殫精畢力。亦不得慕常格。而優游簡僻。縱無他長。亦得積日累歲。擢陞是官。如是。是勞逸無等也。卽人心何勸。方今吏治頽靡。民俗疲瘵。意者且將少變今法。以重擇守令。而後可耶。夫欲重守令。則必顯能治劇難。有勞苦功多者。以風天下。如公宜何以處之。茲其行也。僭爲之言。

## 壽漢涯李翁七十序

往漢涯翁爲永清令。裁數月。輒自免歸。翁少卓犖多奇。望實炳煜有聞矣。然竟不第。老乃得一令。又鬱鬱不樂去。去六年。爲嘉靖丙辰。而翁年七十矣。是時其子諫議君。亦謝病歸。稱觴畫錦。光溢里閭。殆天畀翁以遐齡厚享。償其平生云。竊常以爲人間不可必者三事。其最難值者一。聰明才惠。而老壽不可必。夫妻偕老。而賢不可必。老且有子。又能大其家聲。不可必。人有賢子。或離親遠宦。糜于王事。執掌陟帖輿謠。睇



雲從慨。何得日侍左右晨夕之歡。此又最難得者也。翁既少負才名。年涉耆艾。步履尙健。聰明不衰。太夫人結髮竝壽。而兩子俱以學顯。何人之不可必者。天盡以畀翁乎。始諫議在朝廷。號爲伉直敢言。權貴人側目。翁與太夫人日夜涕泣。念歸其子。是時朝廷方欲釐制度。攘夷狄。以太平之業。而天子明察。百官惶恐。盡瘁莫敢言歸。乃諫議獨得歸。鳳誥有輝。宮彩交映。里中嘖嘖稱慶也。何人之最難值者。天子獨以與翁乎。夫不可必者。天與之。其最難值事。君與之。則翁之壽信非恆人所可冀也已。居正竊聞古之君子。澡心浴德。不有其身。以奉君親。故入以事親。出以事君。事君鞠躬盡瘁。莫敢云勞。則有議不返顧。而計不旋踵者矣。當其時。身君之身也。親安得有之。及其解負辭榮。怡然膝下。啜菽飲水。樂于萬鍾。當是時。身親之身也。君安得有之。是以仁君之御其臣。不以臣之委身於己也。而遂盡其力。故有賜沐之恩。有貤封之典。以體其私。父母之於子。不敢以其身爲己有也。而必致之君。故教之以莫逃之義。訓之以匪躬之節。以報乎上。故君子一身。君與親之隸也。諫議官瑣闥。爲耳目之司。非可一日闕者。獨念翁老欲歸。而天子遂許之。使諫議無靡盬之歎。翁得以介眉壽之福。是上之體其我者至矣。乃居正則願從翁乞諫議之身。以還朝廷。俾將以壽其身者。移之爲壽國壽民。翁其許我乎哉。

賀少宰鎮山朱公重膺殊恩序

愚睹載籍。漢大夫韋彪之議曰。求忠臣必於孝子之門。斯語豈不良然哉。愚蓋於鎮山朱公有徵云。朱公之鄉。爲吉之萬安。吉爲賢哲之區。在昔赫赫稱鉅公者。不一二數。頃歲以來。得公其人。又今昔希邁觀也。公沈毅春粹。與物無町畦。海內士慕公者。無不願一識公。且猶博綜邱索。與當世之務。凡古今隆替。名物

隱蹟。試一叩之。罔不犖然辨。洞然析。武庫未足喻其藏。江海未足方其畜也。公自登仕。迨今餘三十禩矣。周歷中外。所至輒留德美。垂嘉聞。勤民體國。鑿鑿皆有成效。茲不具論已。先是公以中丞秉節鉞。撫綏東土。方是時。三殿西宮之役。適且告急。會少司空缺。簡公寄之。公與大司空舉力協謀。飭材董役。卽隆寒甚。暑無間。昕夕兩宮賴以速成。主上念乃勞績。文綺藏經。頒錫隆疊。俾蔭其子一人。尋探庭論。遷公佐理邦治。皆異數也。愚每竊論公。勤以奉公。慎以居寵。三十年一日也。今所遭值。不負疇曩矣。古所謂事君以忠者。斯其無媿哉。今年愚承乏。與潯陽董公偕。得辨材省中。因之益熟公履。公居常簡重不發。至語當時大務。及官人舉士之要。苟利君國。則博引曲喻。不要諸常不已。光俊之業。熙明之治。實銳心焉。愚又與潯陽公云。朱公論諤。諤然罔不夙夜。念在公家。信其忠勤也已。公由中丞食三品。於茲三有歷年。令甲百司。周三載者。課其績最者進階。至三品。則榮其三世。並錄其後。考功氏以公績報聞。封拜贈敘之典。悉如例。不靳施焉。知公素也。潯陽公與愚。暨諸曹郎。偕爲公賀。大要謂人臣捐韋布。躋卿貳官。隆隆顯矣。矧襲先及後也。此可眇小視哉。公榮矣。乃公愀然若不自擇。頃曰。予先大夫。少爲伯氏。確夫公後。確夫公。其予嗣祖也。今荷主上恩。得幸襲寵榮矣。予本生祖。則熙齋公是焉。茲制於典。不獲霑一命。假泉壤有知。如子孫何。居無幾。卽列疏上請。乞以已封。移贈熙齋公。披吐衷臆。諄且篤也。皇上素以仁孝勸率天下。鑒公眞悃。詔許之。公拜命。不覺色喜過望。怡怡若有重獲也。潯陽公與愚。僉曰。鎮山公。其至孝哉。斯固業官之所以能忠也。已昔周宣平淮夷之亂。任召穆公。甸宣江漢間。其册命之詞曰。文武受命。召公維翰。毋曰予小子。召公是似。嗣公旣底績。錫之圭瓚。秬鬯山川土田。又曰。于周受命。自召祖命。夫始之遺。惟公分也。必曰召公。

是似若欲因孝以作之忠者。繼之寵。惟王恩也。必曰自召祖命。而光祖之孝。且於顯忠時。一昭揭焉。則三代盛時。君上所以命官作人。與臣子所以表樹助烈者。匪忠孝盍繇哉。此益信韋彪氏之言。非誕謾也。公保釐藩服。翊贊廟堂。積勞累伐。當與穆公之業。先後比隆。至主上眷遇拔擢之恩。其褒異乎公。卽周宣不啻已。今茲益懋往績。對揚休命。以弼成天子萬年之治。視召公稱祝于周廷者。成於廟器者。將不有同心哉。諸曹郎慶公沐此殊遇。造愚與潯陽公。謂不可無言以紀其盛。潯陽公復以屬愚。愚備述他日與潯陽公論公者如此。以塞諸曹郎之請。潯陽公亦謂愚他日有緒言也。因以質之鎮山公云。

送大曹長賜谷南先生赴留都考功序

昔延陵卓子。乘蒼龍翟文之乘。前有錯飾。後利鏃策。進則引之。退則策之。四牡避而欲逸。造父感於馭人之理。過而涕焉。愚竊嘆曰。今之人士。繩約於毀譽之中久矣。其幸而不爲造父之所覲哉。愚斯言。蓋謂南大夫賜谷君也。君起家進士。始以吉士讀書中秘。當其時。卽已揚聲藝苑中。薦紳先生咸推轂南吉士矣。嗣簡列銓部郎。周歷諸曹。事無細大。罔不由於矩矱。寓內策名之士。崇鉅冗屑。無問識不識。類能悉其素。而第其品。臧否淑慝。井井辨也。往年以考功入選部。適其際稍異故常。太宰翁欲嚴簡汰。以祛夙釁。君毅然當之。登俊斥回。不少牽避。藉藉當於衆心。計績敝勞。人謂君躋陟通顯。且旦夕矣。胡至罹此意外哉。主上廉君曩日。令以舊秩。暫移南中。且易其曹。列之考功。蓋考功在南中。視他曹獨要也。旨下在廷。士舉懽然語曰。主上神明哉。神明哉。其知南大夫矣。同舍諸大夫。訊君於邸。揖君曰。嗟君乃復此行。里諺云。美服人指。美珠人估。言責之者備矣。其君謂哉。君默然爲間曰。諸君第毋我念。昔人謂成敗利鈍。非所逆觀。豈

彼盲昧哉。蓋謂操之者有在也。愚茲行。得非操之者爲乎。愚曰。君言操者。無謂天耶。愚請以天之說。備質之君矣。天者。主在造物。顯鬱沈陟。通窒榮悴。更歷疊移。一瞬萬態者也。詎可常哉。總之不可與易之理。固可據而推也。杞梓榱桷。託根於沃阜。高者千仞。大者百圍。廟堂之棟。於彼資焉。其沾濡煦嫗。始之句萌。遼之拱把。漸之百圍。千仞。固天之所厚而培也。乃風霆霜雪。撼震摧落。則何利焉。然長養振拔。俾之凝厚。龐結。終以支大廈。堪鉅任。天之厚之。固於此益深且篤也。至於人。欲以遣大肩重。亦必挫抑坎壈。歷試備嘗。之以定其氣。而成其章。是以發之堅忍。礪琢之後。其容畜也必宏。而建樹也必遠。古碩彥名流。炳琅當代。焜燿千禩者。咸於困踣中起之。誠非倖也。彼襲芘而謬致隆危。擁腫而誤收匠石。雖以徼福。實以賈鑿。殆物之無幸。而帝心之所大不厚者。君茲之往。將謂杞梓榱桷之風霆霜雪。非耶。矧於此益淬其初。強立而定持之。他日主上掄卓犖操執之臣。以贊彪赫奇偉之績。且將急需乎君。君且挺身先矣。冲霄之羽。豈鑿於樊中千里之蹄。豈淹於櫪下哉。天之所篤厚而陰庇之者。於茲又自有前占也。語旣。君亦怡然顧愚曰。予荷主上恩。得今量移。幸矣。幸矣。寧期他日。第益淬厥初。則斯語益我矣。其心識之。君被命甫稱謝。卽束裝戒道。不及世俗栖語。同舍諸大夫。出祖於郊。咸黯然於君之行。而重爲之別。欲爲之詞。以致之君。愚於諸大夫。齒最後。當任執筆之役。迺不自虞鄙謬。因爲援天以慰之。復執蓋爲壽。申之曰。藹藹吉人。惟君子使分也。東西南北。惟命之從。遇也。靖共爾位。不擇事而安之。義也行乎其間。而莫之能違者。莫非天也。君業已知天。且能自定其天矣。愚何言。愚何言。

## 贈羅惟德擢守寧國敘

羅子惟德被命爲寧國守將之郡諸同舍謁子贈之言子聞惟德雅志嚮學者請以學論今夫勝重任引巨輻行千里于一日。騏驥誠力矣。逸而弗庸。力無從見也。斷蛟龍。刺犀革。遇磐錯而無厚。干將誠利矣。匣而弗試。利無從見也。是故士不徒學。而惟適用之貴。裕內徵外。懋德利躬。此勵已之符。而亦鏡物之軌也。國家造士。率以理學風示宇內。縉紳儒碩。相與闡心性。析仁義。彊志問學。烝烝盛矣。總之烜赫焜耀。偉然追古賢哲。固可口悉而指計也。迺懷詭者。元探隱索。以眩駭耳目。而誇侈無實。掠虛譽於聲響形影之似。斯又其下矣。學之利用也。誠難哉。三代亡論已。先漢人才。瑰瑋卓犖。彬彬鮮與爲儷。後世諸儒。或謂不學無術。或謂適道之難。且猶慊然少之。假令今庸言闊論之士。誠得際會操柄。其所興發建豎。視彼何如。大都任本實者。誠以達材。驚空言者。辨而無當。此其大較。不可明見耶。惟德結髮時。卽肆力心性仁義之學。不爲風習移易。其語人深而非異。遠而非侈。鑿鑿皆可底成績。且自奉簡薄。惡以物誘見汗。探其蘊。莫之能窮。叩其衷。無不可告。沈然澹然。可愛而不可厭也。夙夜處官。獄無細大。必躬自裁聽。不欲深發。巧摘而詳比。讞覆。又罔不惟明法之麗。此非實踐之士哉。願何有於寧。寧在南服。緣江阻山。控據歙池。吳越之會。屹爲留都重鎮。其民和俗阜。可朝令而夕視其成。以惟德寄之此地。布德行慶。鋤黠庇良。獎讓率屬。以綏輯其氓。恢恢乎游刃耳。其所表見。視今寧。曾什百耶。是故推心以敷之。政罔不若。率性以順之。道罔不遵。覃愛以沛之。仁罔不懷。端軌以協之。義罔不從。所謂騏驥以馳。聘効其力。干將以割。割顯其利者。非是之謂哉。惟德行矣。誠惟益究厥施。毋爭長于跬步。脆薄以自多。足使今世學者。咸知躬行君子之爲難。惟德將有辭於天下矣。詩曰。惟其有之。是以似之。體用之學也。書曰。非知之艱。行之惟艱。惟德其念也。

## 賀少司寇少崖傅公三品奏最序

夫人雖躬秉靈淑。蹈履卓異。然猶必潤之以學。蓋孔子筮而遇白賁之繇。曰舍之。謂其徒白而無采也。然世皆疾今之言學者。以爲夸侈而無實。夫夸侈無實。非學也。古之所爲學道術者。將以翦琢其理性。而磨瑩其瑕類。故質直守正。恢之以容節。廉潔潔膏之以惠木。訥愿樸濟之以通。彊毅有爲。裁之以識。夫然後足以宏道恢業。開物成務焉。嘗觀人材之生。大抵肖其土產。必學焉而後融之。楚之有江漢衡巫山磅礴。而水濟滂。故其人多任率簡諒。有礪礪侗儻之概。然其蔽也。徑直而不詘。鋒銳而鮮堅。世亦以此少之。往古勿論。卽如國朝。楊文定之謨弼。夏忠靖之康濟。劉忠宣之籌畫。皆世所稱元功碩輔。社稷臣也。然論者猶以爲質掩其學。風習未融焉。假令數公者。玩白賁之筮。覽髣髴之喻。則庶幾哉。詩書所稱。臯禹伊說之倫矣。自居正通籍朝列。十有餘年。見今楚材輩出。又斌斌皆興起於學。而少宰馮公。少司寇傅公。爲之楷範。馮公淵雅而通識。傅公清真而冲邃。皆余所嚴事者。嘗竊論兩公之爲人。譬之鏡也。夫鏡之有土蝕斑駁。鏡之類也。然世皆指其斑駁者。謂之古。而其駁落明瑩者。顧反以爲類。于時而不知貴。乃不知斑滅而。又明瑩者之爲古更甚也。故非有精鑿者。不能辨無駁之鏡。非有邃學者。不能瑩有類之質。夫兩公蓋鏡之明瑩而駁落者也。馮公別有紀述。不具論。傅公者。弱冠舉楚士第一。登進士。拜廬陵令。以政績異。等擢授兵部尙書郎。調考功。是時當考察庶官。人皆縮避不敢任。公乃從他部中驥領其事。而鑒別精覈。大允物情。已乃迴翔藩臬。周歷數省。而後爲御史中丞。巡撫山東。已又移督漕運。入佐司寇。所在輒有顯稱。乃其事余不能縷縷道也。其器幹之通濟如此。然又深中而豁外。達識而閎度。其居官不以一錢浼己。而能

恕己量物。所與交必天下名士。而能愚知并容。故自公卿以下。咸推轂之。謂公之生楚也。而弗類楚人也。此非有邃學厚養。詎能是乎。今年夏。公以三品任滿。天官氏上公之勞績。聞於天子。咸謂公卓才宏量。可以投大肩重。與余言類。於是天子嘉公行能。錫之誥命。封其大父母。父母又蔭一子爲太學生。恩賚甚渥。然余觀公之挾持醞藉。英英爲鼎鉉之器。蓋非可以累日積勞論者也。故舉楚先哲之事。以望於公。而獻其質學之說焉。雖然。今之惡言學術久矣。夫鏡之加以磨瑩。鏡之幸也。今以時鏡之足以亂古也。而遂厭磨瑩之工。以爲不必用。人之有學術。所以爲聖賢者也。今以世之學者。皆竊虛稱而躬穢行也。而遂以爲人之無所事學。是爲明鏡護癩。而爲聖賢存類也。不亦誤乎。夫事固有同行而異趣者。亡者東走。逐者亦東走。東走則同。而所以走則異。周人謂鼠之腊者曰璞。鄭人謂玉未理者曰璞。璞之名同。而實則殊也。可不辨哉。可不辨哉。

### 壽襄王殿下序

今祝人主壽者曰萬歲。祝侯王者曰千歲。夫人壽之不可幾以千萬。諗矣。而祝者咸願之。則世主侯王之與衆庶異也。夫物有便於己。則願常有之。無便於己。卽一日不能相守。日之中天也。有目者待以視。有足者待以行。雞三號。延頸跂踵。東面而睇。無不願萬年有日者。非愛之也。恃賴焉故也。五岳四瀆之居於方隅也。興雲雨。胎寶藏。以給人之求。人莫不禱祀而祈福焉。利在焉故也。人主者日也。侯王者岳瀆也。人主兼利天下。天下無不願以爲君。侯王澤逮一國。一國無不願以爲君。故人主萬歲。則天下之人。以萬歲蒙其利矣。侯王千歲。則一國之人。以千歲蒙其利矣。故世之祝人主侯王者。莫不願其千歲萬歲。何者。便於

已故也。非然者。且爲厲爲孽。將誹謗之。是承何千萬之有。襄之建國百年矣。世濟其德。以屏翊帝室。至今王益有聲江漢間。居正自家食時。聞王之賢。未見也。及過襄陽。竊從下風。望見顏色。王天下之賢王也。夫賢者使人愛而戴之。便而安之。居正竊聞太守汪大夫言。王雖處崇鉅。其自約結。恆如處子。士大夫過封內者。無問知與不知。必降接禮遇。下客已甚。其惠民也。渥而馭左右也。甚嚴。事涉有司。卽有司人百曲不罪也。左右人雖百直。猶不貸。務在詘已。檢下。以信有司之法。故自太守以下。至於編戶之氓。咸曰。王有大惠於襄之吏民。吏民靡有秋毫。可以報塞者。獨願王千歲有國。以重惠襄之人。此之爲德。不直一手一足便之而已。夫淵深而魚聚之。林茂而鳥獸歸焉。詩曰。投我以桃。報之以李。王所以投於襄之吏民者厚矣。非壽考祺福。將安用報乎。雖然。竊有願焉。王亦知夫敖氏之積粟者乎。周人有敖氏者。積粟盈囷。足支數十年。未足也。而問貯積於嗇夫。嗇夫曰。子之積厚矣。吾無以益子。子而計子之所有者。慎用之而已。夫圭撮之不慎。鍾筥洩之。鍾筥之不慎。尾閭洩之。江海雖大也。以奉漏卮。則沒世不能取盈焉。我嗇夫也。吾告子以嗇而已。夫神不可以驚用。嗇之則凝。福不可以驟享。嗇之則永。彊不可以厚恃。嗇之則堅。故聖人之言曰。事天治人。莫如嗇。王今年三十春秋矣。計三十之於千歲也。不猶積貯盈囷。而始去其圭撮者乎。王誠能少垂聽於嗇夫之論。無輕用其年力之富。以頤神而思永。則所謂千歲云者。猶近言之也。

## 封君堯溪劉先生七十壽序

今士大夫身服官政。不得歸侍父母壽。率靳能言之士。侈之爲詞。爛然累牘。蓋世之驚於文。日甚矣。張子居京師。與吏部考功劉子相友善。劉子之學。務在剝剝枝葉。歸究本實。不儕於俗。而求當於古。本之其父。



曰堯溪翁。堯溪翁者，楚隱者也。居衡山，好古樂道，以德化其鄉人。鄉里咸稱爲長者。張子與劉子居，開翁行誼甚悉。固知劉子之學有家承也。居數年，堯溪翁壽七十，於是鄉之大夫宦於朝者，廿有八人，咸謂張子曰：子善劉子，知堯溪翁，盍詞焉。張子曰：唯唯否否。夫劉子者，離於俗而當於古者也。奚以文爲哉。人之相與，情不至而後益之，以文信不至而後飾之，以禮。故深拱揖讓，饋詔陳詞，施之於交際，而父黨則無容。況其親乎。故曰：以敬孝易，以愛孝難。以愛孝易，使親忘我難。今夫布衣閭巷之人，身不越乎隴畝，疾耕力役，時得一鬻之味，以上其親，卽父子嘻嘻，終日相對，或箕踞袒裼，至忘爾汝，彼其於飾恭敬，悅耳目者，至淺鮮矣。然要以愛情深至，而天真驢洽，則黠於文者，固不若厚於實矣。且夫劉子之事其親也，又奚以余言爲哉。夫劉子始爲南昌令，南昌爲江西首邑，當四方孔道，百責之所叢委，世好之所熏灼。然劉子慮辱其親之故，夙夜勞瘁，修勅如處子，用廉能冠於諸邑。其在銓曹，終日扃戶省事，寡交，認認焉，以修其職業。爲務人之稱，劉子者，未有不本之堯溪翁者也。榮聞厚實，從中徵外，雖微吾言也。劉子之所以事其親者，豈其少哉。諸大夫曰：不然。夫力勤服事，怡愉愿慤者，士庶人之行也。中心慳怛，節文修飾者，卿大夫之行也。詩人以春酒介壽，稱彼兕觥，形之詠歌，不一而足，皆所以鬯堙鬱而長驩愛也。且夫君子者，豈務爲冥冥眈眈，獨修其身乎。亦將以垂範作則，敦行而善俗者也。今劉子獨以身在郎署，不得親執觥酌，奉一日之歡，而託之修詞，以宣其堙鬱，達其情愫，俾閭巷之人，睹其盛者，知慕，黠其榮者，興仁，用以長慈孝之風，而示爲子之節，故君子之於教也，非家至而日見之也。本之以情，秩之以禮，修之家庭之間，而孝弟之行立矣。獨文也與哉。於是張子謝曰：諸大夫幸以劉子之舉，有係於世教，非愚所及也。請書以貽堯溪翁，遂

以訓其里之有子者。

壽李母杜夫人七十序

杜太夫人者。御史中丞李公母也。中丞公早孤。太夫人身不越闕。茹苦堅操。以訓中丞公。遂致通顯。中丞公遊宦四方。恆奉太夫人爲養云。正嘗觀覽古人瞻雲陟屺事。蓋傷之焉。夫子之于親。其念誠篤矣。或意有所壅闕。不得自恤其私。獨乃流涕于雲霄。與歌于道路。若然者。卽有奉公許國之誠。豈不以返顧慮牽私懷哉。正數從中丞公遊。竊聞太夫人在壺內。持範嚴。居處節。願獨好釋氏言。其奉佛最謹。乃侍婢亦化之中丞公。奉觴爲壽。侍婢居旁。語釋氏事。太夫人卽大喜。爲益餐焉。是以太夫人體和氣適。壽七十矣。而聰明步履。恆如盛年。公亦因是得專積慮。忘返顧之懷。殆天以太夫人之壽。厚公而贊其勤勞之志也。然亦公有以致之焉。夫致壽有三。養備體腴者。壽。身榮志愜者。壽。施德于人人。皆欣戴慕願者。壽。備養者。奉甘隲。實腸腹者也。此編戶之氓。有力者能之。榮悅者。以貴逮親者也。此宦仕之人。乘堅策肥者能之。若夫德厚施于人。而惠愛潤乎物。得人歡心。以事其親。則非公卿大夫有道術者。未之由矣。自公爲巡撫。以敦大優裕爲治。遠近莫不洽悅。問者國家欲更新三殿。蒐材楚蜀貴州之地。億度用費。且數百萬。民惶怖逃匿。嗷嗷靡依。公不震不遽。鎮之以定。徐令有司曰。剏作國之大事也。而元元國之本也。本一搖。卽大事何賴。其務所以安之。然後度經費。審區畫。慎選良吏。分任其事。未數月。山中以巨木告者。項背相摩于道。事旣遄舉。而民不告勞。里中父老咸曰。今吾所以獲生者。繇李公。聞公有母事佛。慈愛不忍傷物。乃公所爲者。舉太夫人教也。吾儕念無以報公。獨願太夫人之壽於萬斯年。以享公之祿。養于無窮。此之爲德。不直

一口譽之一手戴之而已。茲非所謂德施於人而人皆欣戴慕願之者耶。夫鼓撼園則花放鳥羣噪而風生。衆動所嚮。天必從之。故太夫人之壽。天所以厚公。亦公有以致之也。正竊聽輿人之誦。而知太夫人之所以獲壽者繇此。因論次其語。以爲太夫人壽。

### 雲海子序

揚子雲白首著太元經。殫竭心力。而世無有稱之者。獨桓譚以爲必傳。今人讀其書。謂如墳典。邱索。談藝者。必歸焉。而不知當時人以爲祇足覆瓿云耳。夫流俗之情好。追慕往古。而輕忽儔類。信其習見。而奇所希聞。世人親見揚子雲名位不顯。又其所著非淺見。諛聞易用。窺測其見。詆訶宜矣。微獨子雲。卽古巖穴之士。殫精神於毫素者。有不以窮約自發憤者哉。其堙滅而無聞者。又何可勝道哉。雲海子遁世絕俗。閉門不交當世。而好著書。至老不倦。所著有太平本論。元叩集。余讀太平本論。上窮皇農之化。下述道德之意。大極寥廓之宇。細入肖翹之變。可謂辨矣。至讀元叩集。則又窮極幽深。鉤致隱蹟。索元珠于象罔。叩寂寞而求聲。吁。又何其閱覽博物君子乎。觀其託意幽遠。鑄詞險峻。讀者至不能以句。又烏能究其指歸。則世之知之者。蓋亦希矣。嗟乎。雲海子幸無輕出其書。世有博極達觀如桓譚者。必將特垂賞鑒。而何計乎流俗之知與不知哉。作雲海子序。

### 西陵何氏族譜序

法史氏年表。爲歐陽氏譜。法禮家宗圖。爲蘇氏譜。斟酌二氏。而剔其遠胄之謬。爲西陵何氏譜。何氏者。溧陽人。洪武朝始徙西陵。五世而至今太守公。以明經中第。歷躋通顯。於是何氏族甲於西陵矣。自漢以來。

取士悉重閥閱。士大夫推本世系。皆假借前代。託附名家。以自表異。龍門系出重黎。蘭臺遠宗於菟。諸如此類。不可殫記。至我國家。立賢無方。惟才是用。採靈菌於糞壤。拔姬姜於顛頓。王謝子弟。或雜在庸流。而韋布閭巷之士。化爲望族。昔之侈盛競爽者。溺於今之世矣。夫隆替靡常。而澤施有限。歷觀前代。侯王有土之君。及卿大夫。所以爲子孫計。慮深遠者。豈不欲固其本根。期世世弗替哉。然或數十世。或一再傳。而存者什一而已。彼其先世之澤。及身而已。溘者已漓。而不思懋德以醞醇。厚者已薄。而不知返薄以歸厚。如是。卽世家鼎族。亦烏有弗替者乎。故君子垂世作則。不在族之繁微。而視其德意之涼厚。不在貽之肥瘠。而卜其規模之恢隘。序之譜牒。以治其昭穆。爲之禮節。以聯其屬姓。教之敦厚。示之省約。以振其風靡。斯寢隆寢昌。寢流寢長之道也。余觀何氏譜。載先世行事。咸質直忠厚。又觀太守公居官長者。不侈世好。故知垂範者遠矣。嗚呼。何氏其世有興者乎。

## 錦冰集敘

錦冰集者。津南陳公在禮部時作也。按唐舊說。儀部員外郎。號瑞錦窠。祠部稱爲冰廳。公在部十年。週歷四署。而居儀制祠祭最久。已從祠部郎中。出守荊州。乃哀其集。題曰錦冰。蓋公所以深造厚蓄者。得之二司爲多也。余忝朝籍。得交海內名士。南宮爲盛。蓋諸曹咸綜理叢劇。而南宮所掌。皆國家徽章鉅典。禮樂制度之事。望優而務簡。士大夫得以餘力。寄意于文翰。今觀公集。瞻才麗藻。花爛映發。又綜故實。達時宜。有閎衍深沈之思。蓋力優則造深。慮間則思睿故也。夫士操翰揆藻。欲有施于世者。何可勝道。然卒鮮有聞者。何則。才局則抽之而愈促。故畀賦者不可強。務劇則負厚而慮疲。公旣卓犖多奇。家承世學。優游蘭

省慮殫神凝才儻而又成之以遇欲亡傳得乎顧余所深惜者以公素所樹植第令寘諸闕庭間必且爲國家彰黼黻之文揚治世之音而鴻漸之翼阻于一麾茲其故余未之解矣夫器有所宜而音有所諧夏璜周鼎朝廷之器也以陳於闔闔則視者駭朱絃疏越清廟之音也以鼓於委巷則聽者疑故余覽公集感其先後殊遇再三興慨世有識器審音自當辨之余言非諛也陳公閩人先世有綱齋先生恥菴先生并以學致通顯至於公猶光云

種蓮子戊午稿序

往甲寅不佞以病謝歸僻在林里談藝之侶屢絕於戶獨遼殿下好名重士時以文翰相與於甍響空谷遂忘其闕寂焉丁巳不佞再忝朝列今年秋以使歸謁王王手詩三冊曰此近稿也不佞受而讀之爲詩二百餘首他作亦稱是考其日月則自春徂秋方數月而已何篇什之鉅盛而文采之工縟乎蓋天稟超軼有兼人之資得司契之匠其所著述雖不效文士踵躡陳蹟自不外於矩矱每酒酣賦詩輒令坐客拈韻限句倚次比律縱發忽吐靡不奇出或險韻奇聲人皆燥吻斂袂莫能出一語王援毫落紙纍數百言而穩貼新麗越在意表傾囊瀉珠纍纍不置故其著述之富如此誠令與綴述之士應制分題爭場競捷則東方之袍不屬於之問矣夫人之材品不同或注輿立就或纍日乃成而談者咸右緩步之工謂疾趨之率嗟乎此可以語中常者耳夫世所以尙騏驥者謂其立至也所以貴鑿鄒者謂其立斷也若曠日積晷則鋌刀效于一割駑馬可致千里故曰兵寧拙速未觀巧之遲也于文亦然曹子建李太白文壇之飛將也或七步而紆偉詠或搖筆而賦清平卽其文粗者猶足以方駕朋儔沾潤後代世豈以是短之哉不

佞讀王詩。往往稱說曹李。而王逸才俊氣。略與之埒。豈千里之種。必產於渥洼耶。然子建沈抑東阿。太白飄淪江海。而王鍾毓特異。福與才齊。則天之所賦。厚脆又殊矣。不佞譎陋。爲文數日。才撰一篇。輒又棄去。然卒無以踰人。而王謬以爲談文之契。屬題評冠序。辭不獲命。僭爲序諸首簡。夫下乘末品。望駸驥之絕塵。當蹠蹕喘汗之不逮。又烏能窺其步驟哉。王栖心元勝。今上錫以真人之號。又獻材助國。捐祿救民。皆被勅獎。語具津南陳太守序中。不具論。論其文如此。

## 贈霽翁尊師吳老先生督學山東序

往嘉靖丁未。海內通戴記之士。畢試於禮部。是時翰林陳先生。比部吳先生。實董校閱。蓋中試者。總二十有二人。夫二先生。皆世所稱通識鉅儒也。諸士徵時厚倖。獲所依歸。及奉教於二先生久。則見其行誼卓犖。有瑰瑋鴻廓之觀。蓋私心幸慶之焉。竊計以爲如二先生者。誠令專造士之業。董作人之任。以其學樹幟於時。卽所振起。當不啻吾曹千百。而陳先生。則在內庭。以論思獻納爲職。不得處外。居數年。會山東督學缺。部議視諸曹中文行最著者。咸莫如吳先生。遂以先生行。乃居正竊言於衆曰。今茲先生之學。且大行矣。夫樂之於馬也。不擇駑良。然得駸驥。驟。則其御愈精。捶之於材也。不較枉直。然得梗梓。豫章。則其工愈妙。夫山東者。齊魯之區。其綜於儒學。蓋自古記之矣。斯亦先生之駸驥。豫章已。雖然。願有以質於先生。居正少時。見諸學士鉅公。稱人之文。曰某人。也。文也。他日。且爲節士。已。而果節士。某人。也。文也。他日。且爲才卿。已。而果爲才卿。彼所閱者。不越篇章。觚簡之間。而稽終究用。如執左券。以待合。靡不應者。今世學者。含菁咀華。選詞吐豔。蓋人人能矣。至究其實。則或行業。塾戾。先後殊詭也。豈昔之學者。達於衷。而今之

學者辯於口耶。夫嫖質而嬌飾。則視者眩。華積而葆石。則賈者嗤。故諷言者。棄德之寶也。緝采者。彫朽之飾也。攘竊者。剽文之宄也。挹波者。塞源之簣也。士有此四者。卽煜於春華。奚益矣。夫志意不一。不可以議行。趣舍滑觀。不可以識真。且欲興復古學。以新士業。唯在抑浮端習哉。異日者。見齊魯諸生。某也節士。某也才卿。曰此吳先生之徒也。則居正輩。且卻三舍避之矣。

